

A Wakak a Warwara oe Iesu Karisito e Luk i tumusi

A warwara talapor nigo

E Luk i tumus a buk ne. Bel i a halin ning a bonot pa pisir naur a kakak a asaerla ane Iesu. Pa bel otleng a te Juda, a te Grik. A hanua ngasna ngandek e Antiok ting na papar Siria. E Luk bel i oroi tar a ututnala ning e Iesu i toli. I kibas tastasman ka tanla ning la atatai oe Iesu.

Nating anuna titol a dokta, pa i tasman wakak a warwara Grik.

A buk ne a ningnigo na buk ning e Luk i tumusi, pa i tumus otleng a buk Aposel. I tumus a buk ne sur a tarai Grik lar tasman wakak a warwara oe Iesu pa lar tortorot onoi. Lar tasmani mang e Iesu i han purum ute sur ir alaun a taraila rop. E Luk i tumtumus otleng oe Iesu mang i hanot a barsan momol, pa i asangan anuna marmaris tetek a kapan a taraila pa tetek dala rop taktakai.

I tumtumus otleng ana ututnala ne: A atong leklek e God, a rakrakai ana Talngan Tabu, a niaring, pa lalaun anuna kapan a taraila pa gongon a tarai.

A tinan ana buk Luk:

A kamkama buk ne (1:1-4)

A agon ane Iesu pa e Jon a Tena Baptais
(1:5–2:52)

A titol ane Jon a Tena Baptais (3:1-20)

Di baptais e Iesu pa lamur e Satan i lari
(3:21–4:13)

E Iesu i titol to e Galili (4:14–9:50)

E Iesu i han usaot e Jerusalem (9:51–19:27)

A ararop a wik pa minat e Iesu (19:28–23:56)

A kamkamtur ulak ane Iesu kusun a minat, pa
anuna tinan kas (24:1-53)

¹ Tetek e Tiopilus,

A galis la tohoi pa la ka tolsot pas a tumtumus
ana ututnala ning i hanot arpotor imila.

² La ning la ka oroi tar a ututnala ne tur pasi ana
taim ning a ututnala ne i hanot, pa la sira asaer
a tarai ana Wakak a Warwara, la atai mila ana
ututnala ne.

³ Pa iau otleng, ia ka tikin otnan pas a ututnala
ne tur pasi ana taim ning i hanot. I maining a
nuki mang i wakak sur ar tumus tari tetek u,
Tiopilus a leklek. Ar tumus a ututnala ne arlar
ana armuri ot anunla,

⁴ sur ur tasmani mang a ututnala di ka asaer tar
u onoi, i momol.

*A warwara talapor nigo mang dir agon e Jon a
Tena Baptais*

⁵ Ana rau ning e Herot i king ting na papar
Judia, ning a tena artabar tetek e God a risana e
Sekaria, miting na kunum a tena artabarla oe
Abia. E Sekaria, anuna hane a risana e Elisabet, i
otleng a mangis a tarai ane Aron.

⁶ Dia naur a tena tostos na matana e God, dia
mur wakak a Warkuraila rop anuna Leklek.

⁷ Ika bel ta natundiau, anasa e Elisabet i pombo, pa dia ka lapun otleng.

⁸ Ning a pukakiar, ana pukakiarla na artabar anuna kunum ane Sekaria, e Sekaria i tol anuna titol a artabar na matana e God.

⁹ Arlar ana toltol a aslang* ning a tena artabarla tetek e God la sira muri, la aslang pas e Sekaria sur i ot ir kas ting na rumai artabar anuna Leklek, pa ir tun a utna ning a sasawana i toboh wakak.

¹⁰ Ning i tun a utna ning a sasawana i toboh wakak, a tarai a lotu ning la tur tumo lapiu la araring.

¹¹ A angelo anuna Leklek i hanot tetek e Sekaria, pa i tur ting na ris a sot ana logo na tun artabar, ning di tun a utna ning a sasawana i toboh wakak onoi.

¹² Ning e Sekaria i oroi i, a palaona i suren, pa i matmataut kol onoi.

¹³ Ika a angelo i atai i mange, “Sekaria, gong u matmataut, e God ka longor anum a niaring, pa anum a hane e Elisabet ir agon pas a natum barsan, pa ur pasar a risana e Jon.

¹⁴ Ur gas kol onoi, pa galis otleng lar gas ana nuna agon,

¹⁵ anasa ir itna na matan a Leklek. Bel ir gang a wain pa gang laulaula, pa ning belot dir agoni, ka bukus ana Talngan Tabu.

1:9: 1:9 Kisim Bek 30:7 * **1:9: 1:9** La tol ning a titol sur ir asangan la mang esining ir tol a titol a artabar. Dingla na tarai la nuki mang i arlar lar la ning la tumus a risanla taktakai ting na hatatla, pa esining a risana i hanot ir los a titol ning. **1:15: 1:15** Namba 6:3

¹⁶ Pa ir ben ulak a galis a tarai Israel tetek a Leklek a God anunla.

¹⁷ Ir rakrakai arlar ana propet Elaija, pa magirana otleng ir arlar onoi. Ir nigo tana Leklek, sur ir ben taum na tamtamana kakakla tetek na natnatunla sur lar aremoro ulak, pa ir ben a tarai a tabun longor sur a wakak a nuknuk anuna tostos a tarai, sur ir sang a tarai anuna Leklek sur anuna tinan ot.”

¹⁸ E Sekaria i deken a angelo mange, “Ar tasman mangasa i mang a utna ne ir hanot? Anasa mia ka lapun.”

¹⁹ Pa angelo i kelesi mange, “Iau e Gabriel, a sira tur na matana e God. I ot i sune iau sur ar atai u, pa ar los a wakak a warwara ne tetek u.

²⁰ Oroi, onone bel ur tolsot sur warwara tuk ana pukakiar ning a utna ne ir hanot. Bel ur warwara, anasa bel u tortorot ana nuk a warwara, ning ir hanot tostos ana pukakiarna.”

²¹ A tarai la nanan e Sekaria, pa la nuknuk kol mang sur asaning ka bongnani ting na rumai artabar.

²² Ning i purum, bel i tolsot sur ir warwara tetek la. Pa la tasmani mang e Sekaria ka oroi tar ta tatatai ting na rumai artabar, anasa i akinalang kama tetek la ana naur a kuna.

²³ Ning ka rop anuna pukakiarla na titol, i ulak sur a hanua ngasna.

²⁴ Pa lamur, e Elisabet anuna hane i tianan, pa dilima na kalang bel i han masik pas kusun a rumai.

25 Pa i atongi mang, “Onone bot a Leklek i nangan iau pa ka kepsen a utna ning a meme onoi tana tarai.”

Di atai e Maria mang ir agon e Iesu

26 Ning ka diono na kalang ane Elisabet, e God i sune a angelo Gabriel utumo e Galili ana ning a hanua a risana e Nasaret.

27 I han tetek a basbas a risana e Maria, ning di ka aslang tari sur ir taulai e Josep, i ning miting na mangis a tarai ane king Dewit.

28 A angelo i han tetek e Maria pa i atai i mange, “Ur gas, u angis kol! A Leklek i kes taum hom.”

29 Pa e Maria i nuknuk loklokron kol ana warwara ne, mang asa a kamkamna.

30 Pa angelo i atai i mange, “Maria, gong u matmataut, e God i gas kol hom.

31 Longor! Ur tianan, ur agon pas a kaklik barsan, pa ur pasar a risana e Iesu.

32 Pa risana ir rarang, pa dir atongi mang a Nat e God esaning i Leklek Kol. Pa Leklek e God, ir akesi ana keskes a king ane tubuna e Dewit,

33 pa ir king tikin ana mangis a tarai ane Jekop, pa anuna matanitu bel ir rarop.”

34 E Maria i deken a angelo mang, “Ir mangmangasa? Anasa bel a lasan taum ana ta barsan.”

35 A angelo i kelesi mang, “A Talngan Tabu ir kes hom, pa rakrakai e God i Leklek Kol ir poroi

alar u. Larning a Tena Totoh ning ur agon pasi, dir atongi mang a Nat e God.

³⁶ Oroï, a maim e Elisabet ka lapun, pa di atongi mang a pombo, ika onone ka tianan, pa ka diono na kalang anunai.

³⁷ Anasa bel ta utna i ngangaten tetek e God.”

³⁸ Pa e Maria i atongi mang, “Iau a tena titol oros anuna Leklek, i wakak ka ning dir toli hok arlar ana num a warwara.” Lamur a angelo i han kusuni.

E Maria i han tetek e Elisabet

³⁹ Lamur e Maria i sang pas, pa i han kas kapit sur a hanua ning i kes saot na mangir ana papar Judia.

⁴⁰ I kas ting na rumai ane Sekaria, pa i kabah na gasgas pas e Elisabet.

⁴¹ Ning e Elisabet i longor a arkabah na gasgas ane Maria teteki, a kaklik i pele ting na balana, pa e Elisabet i bukus ana Talngan Tabu.

⁴² Pa i warwara ana tnan elngena mang, “U angis tana gurarala rop, pa kaklik otleng ning ur agoni i angis.

⁴³ Iau esi na ngas a hane ning e tana Leklek anuki ir han tetek iau?

⁴⁴ Ning a longor anum a arkabah na gasgas tetek iau, a kaklik i gas, pa i pele te na balak.

⁴⁵ U angis anasa u tortorot mang a warwara anuna Leklek tetek u ir hanot momol.”

E Maria i aleklek pas e God

⁴⁶ E Maria i atongi mang, “A inguk i aleklek pas a Leklek,

- 47 pa balak i gas oe God, anuk a Tena Alaun,
 48 anasa i maris iau anuna tena titol oros, ning
 iau a hane oros ka.
 Turpasi anone a mangis a taraila rop lar atongi
 hok mang a angis,
 49 anasa esaning i Leklek Kol, ka tol tar a
 tatatnan ututnala hok,
 a risana i totoh.
 50 Anuna marmaris i kes tetek la ning la
 hanrawai i,
 i kes tetek a tarai tagun onone, pa tagun
 lamur.
 51 I tol a rakrakai a titol ana kuna,
 pa ana rakrakaina i sune sarara la ning la
 rakan aleklek la ana nuknukinla.
 52 I kepsen purum a kingla kusun anunla keskes
 a leklek,
 pa i aleklek pas la ning la sira anatarna pas
 la.
 53 I tabar a kapan a tarai ana wakak a ututnala
 pa i sune oros sen a tena gongonla.
 54 I nangan anuna tena titolla, a tarai Israel,
 pa i nuk pas anuna marmaris
 55 tetek e Abaram pa anuna mangis a tarai tikin,
 larning ka atong tari tetek anundala mangis
 a tarai tagun nating.”
 56 Pa e Maria i kes napirna e Elisabet arlar ana
 natol a kalang, pa lamur i ulak sur a hanua
 ngasna.

E Elisabet i agon pas e Jon a Tena Baptais

1:50: **1:50** Buk Song 103:13, 17 **1:51:** **1:51** 2 Samuel 22:28
1:52: **1:52** Jop 12:19; 5:11; Buk Song 147:6 **1:53:** **1:53** Buk Song
 34:10 **1:54:** **1:54** Buk Song 98:3 **1:55:** **1:55** Maika 7:20; Stat
 17:7

57 Ning a pukakiar ane Elisabet i sot sur ir agon onoi, i agon pas a kaklik barsan.

58 A halalna pa na mainala la longori mang a Leklek i maris kol e Elisabet, pa la gas taum onoi.

59 Ning ka siwal a pukakiar anuna kaklik, la sang sur dir kot talilisi, pa la mang sur lar pasar a risana e tamana e Sekaria onoi.

60 Ika e tana i atongi mange, “Gong! A risana ot e Jon.”

61 La atongi tana mang, “Bel ta maim i kibas a rising ning.”

62 Lamur la tol a asilang ana kunla tetek e tamana, sur lar dekeni mang esi na rising ning i mang sur dir pasar a kaklik ono.

63 Pa i akinalang sur ta utna ning ir tumtumus onoi, pa i tumusi mang, “A risana e Jon.” La rop la kulkulan.

64 Ono otne a pahana e Sekaria i sapang, pa laigeremna i tapalas, pa i tur pas kakat a warwara, i atong leklek pas e God.

65 Pa na halalindiau rop, la matmataut kol. A warwarala ana ututnala ne, i han sarara ana hananuala ning la kes saot na mangir ana papar Judia.

66 La rop ning la longori, la nuknuk kol onoi, pa la atongi mang, “A kaklik ne ir hanot esi na ngas a barsan?” Anasa la oroi mang a rakrakai ana Leklek i kes onoi.

E Sekaria i warwara na propet

67 E Sekaria e tamana e Jon, i bukus ana Talngan Tabu, pa i warwara na propet mange,

- 68 “Dalar aleklek pas a Leklek, a God anuna tarai
 Israel,
 anasa ka hanot tetek anuna tarai,
 pa ka alangolango pas la.
- 69 Ka saran tar a rakrakai a Tena Alaun tetek
 dala,
 miting na mangis a tarai ane Dewit, anuna
 tena titol,
- 70 Iarning ka atong tari nating ot ana pahana
 nuna totoh a propetla.
- 71 Ka saran tari sur ir alaun pas dala kusun
 anundala hiruala,
 pa kusun a kunla rop ning la nget dala,
- 72 pa sur ir maris anundala mangis a tarai tagun
 nating
 pa ir tolsot pas anuna totoh na kunubus.
- 73 I lele tar tetek a tubundala e Abaram,
 74 mang ir alaun dala kusun a kuna nundala
 hiruala,
 sur dalar titol teteki pa bel dalar matmataut.
- 75 Dalar titol teteki ana toltol ning i totoh pa
 i tostos na matana,
 ana nundala pukakiarla ana lalaun rop.
- 76 Pa u a natuklik, dir atong u, a propet ane God
 esaning i Leklek Kol,
 anasa ur han nigo tana Leklek,
 sur ur tol nigon anuna ngas,
- 77 sur ur atalapor anuna tarai mang dir alaun
 pas la mangmangasa.

1:68: **1:68** Buk Song 72:18 **1:69:** **1:69** Buk Song 18:2 **1:71:**
1:71 Buk Song 106:10 **1:72:** **1:72** Stat 17:7; Buk Song 105:8-9
1:73: **1:73** Stat 22:16-17 **1:75:** **1:75** Taitus 2:12-14 **1:76:** **1:76**
 Aisaia 40:3 **1:77:** **1:77** Jeremaia 31:34

Dir kepsen tar anunla na toltol laulaula,
 78 anasa ana tnan marmaris anuna God
 anundala.

Pa ana nuna marmaris a talapor misaot ir
 sasai ot tetek dala.

79 Ir sasai onla ning la kes ana mormorom,
 pa ana mormorom a minat,
 sur ir nigon dala ana ngas a balmolmol.”

80 Pa kaklik i itna amon, pa i rakrakai ana
 inguna. Pa i kes ting na hanua bel tuk ning i
 turot tetek a tarai Israel.

2

E Maria i agon e Iesu (Matiu 1:18-25)

¹ Ana rau ning, e Sisar Augustus i warkurai i
 sur dir tumus a risana tarai ting na hananuala
 rop ning la kes nahai a matanitu Rom.

² Ine a ningnigo na pukakiar ning di tumus a
 risandi, ning e Kwirinius i a ningnigo tumo na
 papar Siria.

³ Pa taraila rop la han uting na anunla na
 hananuala momol sur dir tumus a risanla.

⁴ E Josep otleng i han miting na hanua Nasaret
 ana papar Galili to e Betlehem ana papar Judia. E
 Betlehem, a hanua ning di agon e Dewit ia, pa e
 Josep i han uto, anasa i miting na mangis a tarai
 ane Dewit.

⁵ I han sur dir tumus a risana, taum ana risana
 e Maria ning di ka aslang tari sur ir taulai i. Ning
 dia han e Maria ka tianan.

⁶ Pa ning dia kes to e Betlehem, a pukakiar i sot sur e Maria ir agon,

⁷ pa i agon pas a ningnigo na natnalik, a kaklik barsan. Pa i poroi i ana kaenla anuna kakakla, pa i aborbori ting na bok ning a inagoila la sira hangan onoi, anasa a rumai wasira ka bukus pas kusun ditol.

A warwara ana agon ane Iesu tetek a tena tai alarla ana sipsipla

⁸ Dingla na tena tai alar ana sipsipla, la tai alar anunla na liur a sipsip ana morom saot milau a hanua ning.

⁹ Pa angelo anuna Leklek i hanot tetek la, pa matatar anuna Leklek i talapor talilis la, pa la matmataut kol.

¹⁰ A angelo i atai la mange, “Gong mulo matmataut. Mulo oroi, a hanot tetek mulo ana wakak a warwara ning ir agasgas a taraila rop.

¹¹ Onone, ting na hanua ane Dewit, di ka agon tar anumulo a Tena Alaun, ai a Karisito*, a Leklek.

¹² Pa mulor tai sur ta asilang mang: A kaklik di poroi tari ana kaenla ana kakakla, pa di aborbor tari ting na bok a hangan ana inagoila.”

¹³ Bel i bongnani pa ntan kunum a angelo misaot na langit la hanot tetek a angelo ning, pa la atong leklek pas e God mange,

¹⁴ “Dalar atong leklek a risana e God tisaot kol, pa balmolmol te na rakrakan hanua rop tetek la

* **2:11: 2:11** A Karisito ai a barsan ning e God i aslangi pa i sune purumi sur ir alaun a tarai rop. A Karisito a warwara Grik, pa ana warwara Hibrui di atongi mang a Mesaia. **2:14: 2:14** Luk 19:38

ning i gas onla.”

¹⁵ Ning a angelola la ka han kusun la usaot na langit, a tena tai alarla ana sipsipla, la warwara artalai la mang, “Ano otne dala kar han utumo e Betlehem, dalar oroi a utna ne ka hanot, ning a Leklek ka atai tar dala onoi.”

¹⁶ Pa la han kapit, pa la pastetek pas e Maria pa e Josep pa kaklik betbete ning i borbor tar ting na bok a hangan ana inagoila.

¹⁷ Ning la ka oroi tar a kaklik, la patuai talapor ana warwara ning a angelo ka atai tar la onoi ana kaklik ning.

¹⁸ Pa la rop ning la longor a warwara anuna tena tai alarla ana sipsipla, la kulkulan onoi.

¹⁹ Ning e Maria i longor a warwara ne, i tong akesi ana balana pa i nuknuk kol onoi.

²⁰ A tena tai alarla ana sipsipla la ulak, la aleklek pas e God pa la atong leklek ana utna ning la longori pa la ka oroi tari, arlar ana warwara anuna angelo tetek la.

Di pasar a risana e Iesu

²¹ Ning ka siwal a pukakiar anuna kaklik, pa ka sot sur dir kot talilis a palaona, di pasar a risana e Iesu. A rising ning, a angelo ot ka atong tari nating, ning e Maria belot i tianan.

Di saran tar e Iesu tetek a Leklek

²²⁻²⁴ E Josep pa e Maria dia tolsot pas a pukakiarla na atotoh, arlar ana warkurai ane Moses. Pa ning ka rop, dia han usaot e Jerusalem

sur diar artabar ana “naur a tabun o naur a barman a balus,” *Wok Pris 12:8*
 arlar ana warwara na warkurai anuna Leklek.
 Pa dia los e Iesu otleng usaot e Jerusalem, sur
 diar saran tari tetek a Leklek, larning di ka
 tumus tari ana warkurai anuna Leklek mang, “A
 ningnigo na kakak barsanla rop pa ningnigo na
 barsan a inagoila, dir saran la tetek a Leklek.”

Kisim Bek 13:2, 12

²⁵ Ning a barsan i kes saot e Jerusalem a risana e Simion, a tena tostos pa tena hanrawai tetek e God. I harnanai sur e God ir alaun a tarai Israel, pa Talngan Tabu i kes onoi.

²⁶ A Talngan Tabu ka atalapor tari teteki mang bel ir mat tuk ning ir oroi tar ot a Karisito anuna Leklek.

²⁷ A Talngan Tabu i nigon kasi uting na woroh na rumai artabar. Ning disuana los kas a kaklik e Iesu sur diar tol a artabar larning di ka tumus tari ana warkurai,

²⁸ e Simion i kibas pas e Iesu ana naur a kuna. Pa i atong lekkek e God mange,

²⁹ “Leklek, onone ur alangolango iau, anum a tena titol oros, sur ar han ana balmolmol, arlar ana num a lele.

³⁰ Anasa a matak ka oroi tar a Tena Alaun,

³¹ ning u ka sang tari na matana mangis a taraila rop.

³² Ai a talapor ning ir atalapor anum a ngas tetek la ning bel a tarai Israel,
 a talapor sur a matatar tetek anum a tarai Israel.”

³³ E Tamana pa e tana dia kulkulan kol ana warwara ne e Simion i atongi oe Iesu.

³⁴ E Simion i angis ditol, pa i atai e Maria, e tana e Iesu, mang, “A kaklik ne, e God i aslang pasi sur a galis a tarai Israel lar hirua onoi pa galis otleng lar laun onoi, pa ai a akinalang ning a galis a tarai lar bilbilori.

³⁵ Ning lar bilbilori dir atalapor a nuknuk miting na balana a galis a tarai. Pa u, a bal mamahat ning ur kilangi ir arlar ana liwan a harum ning ir so anum a lalaun.”

³⁶⁻³⁸ Pa ning a hane, a propet, a risana e Ana, ano otning i hanot tetek ditol. A hane ne a nat e Panuel, miting na mangis a tarai e Aser. Ka wan laulau, ka siwal a bonot pa pisir diat a rau anunai pa ka lao. Dia taulai pas ka mais a rau pa lamur anuna barsan i mat. A hane ne bel i han kusun a rumai artabar, i lotlotu ana kabakiarla pa moromla, i sira tamai pa i sira araring. Ning i hanot na pirinditol i atong wakak tetek e God, pa i warwara ana kaklik tetek la rop ning la harnanai sur e God ir alaun pas a tarai Jerusalem.

Ditol ulak utumo e Nasaret

³⁹ Ning e Josep pa e Maria dia ka tolsot pas a ututnala rop arlar ana warkurai anuna Leklek, ditol ulak utumo e Galili sur anunla hanua Nasaret.

⁴⁰ Pa kaklik i itna amon pa i rakrakai, pa i bukus ana tastasman, pa marmaris ane God i kes onoi.

E Iesu i kes tingui na woroh na rumai artabar

⁴¹ Ana raula rop, e tamana e Iesu pa e tana dia sira han usaot e Jerusalem ana lotu na Han Lakai.

⁴² Ning ka ning a bonot pa pisir naur a rau ane Iesu, ditol han usaot e Jerusalem sur a lotu na Han Lakai, larotning la sira toli.

⁴³ Ning a lotu ka rop pa la ulak amon, e Iesu i kes suai saot e Jerusalem, ika e tamana pa e tana bel dia tasmani.

⁴⁴ Dia nuki mang e Iesu i han taum ana taraila. Ning ka takai a pukakiar ana nunla tinan ulak, dia turpasi sur diar tai sur e Iesu ting na arpotor na mainditol, pa halalinditol.

⁴⁵ Ning dia tai panai tar suri, dia ulak usaot e Jerusalem, sur diar tai suri tisaot.

⁴⁶ Ning dia ka tai pas natol a pukakiar, dia pastetek pas e Iesu tingui na woroh na rumai artabar. I kes taum ana tena asaerla tagun a warkurai, i longor la, pa i deken la ana kabahla.

⁴⁷ Pa la rop ning la longori, la kulkulan ana nuna tastasim, pa ana nuna arkeles tetek la.

⁴⁸ Ning dia oroi pasi, dia kulkulan, pa e tana i atai i mange, “Natuklik, sur asaning u toli larne omiau? Mia ma e tamam mia ka seren panan tar u, pa mia matmataut kol hom.”

⁴⁹ Pa i deken diau mange, “Asaning mu seren iau suri? Bel mu tasmani mang i tostos sur ar kes te na rumai ane Tata?”

⁵⁰ Ika bel dia talapor ana nuna warwara.

⁵¹ Lamur ditol ulak utumo e Nasaret, pa i sira longlongor kol tandiaiu, pa e tana i nuk akes a ututnala rop ning.

⁵² A palaona e Iesu i itna amon pa nuna tastasman otleng i gomo, pa gasgas ane God pa anuna tarai otleng i gomo ono.

3

E Jon a Tena Baptais i warawai (Matiu 3:1-12; Mak 1:1-8; Jon 1:19-28)

¹ Ka takai a bonot pa pisir dilima na rau ana matanitu ane Sisar Tiberius, e Pontius Pailat a tnan ningnigo tumo na papar Judia, pa e Herot a ningnigo ting na papar Galili, pa e tasnalik e Pilip a ningnigo ting na naur a papar Ituria pa e Trakonitis, pa e Lisantias a ningnigo ting na papar Abilene

² pa e Anas pa e Kaiapas dia kibas a titol a ningnigo na tena artabar tetek e God. Ana rau ning, a warwara ane God i hanot tetek e Jon, a nat e Sekaria, ning i kes saot na hanua bel.

³ Pa i han uting na puknala rop milau a malum Jodan, i warawai sur a tarai lar lingir a nuknukinla pa dir baptais la, pa e God ir kepsen anunla na toltol laulaula.

⁴ Larning di ka tumus tari ting na buk anuna propet Aisaia mang,
“A elngena mainla i arkabah ting na hanua bel mang,

‘Mulor sang a ngas anuna Leklek,
mulor atostos anuna ngasla.

⁵ A lawala rop dir por la
pa pukaleklekla rop pa mangirla dir kel
tostos la.

A ngasla rop ning la ngokngok dir atostos la,
pa puknala ning la tungtung, dir por tostos
la.

⁶ Pa taraila rop lar oroi a titol ane God ning i
alaun a tarai ono.' ” *Aisaia 40:3-5*

⁷ A kunum a tarai la hanot tetek e Jon sur ir
baptais la. Pa i atai la mang, “Ai, mulo na natnat
a soi! Bel mulor tolsot sur mulor liu kumna
kusun a balakut ane God ning ir hanot.

⁸ Ning mulo ka lingir momol a nuknukimulo,
mulor tol a ututnala ning ir apuasa i mang mulo
ka lingir a nuknukimulo. Pa gong mulo nuki
mang e God bel ir warkurai mulo anasa mulo a
mangis a tarai ane Abaram*. A atai mulo, e God i
tolsot sur ir tol otnan a mangis a tarai ane
Abaram tagun a hatatla ne.

⁹ Di ka suah tar a hek ting na kama rakaila, pa
rakaila rop ning bel la suah al wakak a wanala,
dir ting sen la, pa dir migen la uting na iah.”

¹⁰ A kunum a tarai la dekeni mang, “Asa milar
toli?”

¹¹ I keles la mang, “Esining anuna ir naur a
kaen a mermer, ir saran tik tana tik ning bel
anuna ta kaen a mermer, mang otleng larning
ana utna na hangan.”

3:7: 3:7 Matiu 12:34; 23:33 **3:8: 3:8** Jon 8:33, 39 * **3:8: 3:8**
A tarai Israel la nuki mang e God bel ir warkurai la anasa la a
mangis a tarai ane Abaram. **3:9: 3:9** Matiu 7:19

¹² Pa dingla na tena los totokom la hanot sur ir baptais la. Pa la dekeni mange, “Tena asaer, asa milar toli?”

¹³ Pa i keles la mange, “Gong mulo kibas totokom i itna tana asaning a matanitu ka suah tari.”

¹⁴ Pa dingla na tena harum la dekeni mang, “Pa mila, asa milar toli?” Pa i keles la mang, “Gong mulo angongos pas ta mani kusun a tarai, pa gong mulo artitiu asasongo, mulor gas ka ana numulo na arlou.”

¹⁵ A tarai la harnanai sur e Karisito. Ning la longor e Jon, la nuki mang ngandek ai a Karisito.

¹⁶ Pa e Jon i atai la rop mang, “A baptais mulo ana malum, ika esaning a rakrakaina i itna tana rakrakaik ir hanot. Pa bel a tolsot sur ar pak sen a inau ana anuna su. A natarna kol tana. I ir baptais mulo ana Talngan Tabu pa iah.

¹⁷ I tong pas anuna saol ana naur a kuna sur ir migen a witla usaot sur a wuwu ir wus sen a palpalnala kusun a patnala. Ning ka tol rop tari, ir suah taum anuna wit ting na rumai a wit, pa ir tun sen a palpalnala ting na iah ning bel i sira mat.”

¹⁸ Ning e Jon i warawai tetek la ana Wakak a Warwara i arakrakai la ana galis a warwara sur lar lingir anunla na toltol.

¹⁹ Pa e Jon i warwara rakrakai tetek e Herot a ningnigo tagun a matanitu, anasa i taulai ulak e Herodias, a hane ane tasnalik, pa i tol otleng a laulau a ututnala.

²⁰ Pa e Herot i tol ulak a toltol laulau ning i akas e Jon ting na karabus.

E Jon i baptais e Iesu
(*Matiu 3:13-17; Mak 1:9-11*)

²¹ Ning e Jon i baptais amon a taraila rop, i baptais otleng e Iesu. Pa ning i araring, a langit i sapang,

²² pa Talngan Tabu i han purum, i suah a palaona lar a tabun, pa i kes saot oe Iesu. Pa elngena mainla misaot na langit i atongi mang, “U a Natuklik, a katnan u, a gas kol hom.”

A wawas ana mangis a tarai ane Iesu
(*Matiu 1:1-17*)

²³ E Iesu i turpas anuna titol ning ngandek i natol a bonot a rau a lalaun anunai. A tarai la nuki mang ai a nat e Josep.

E Josep a nat e Heli,

²⁴ e Heli a nat e Matat,
e Matat a nat e Liwai,
e Liwai a nat e Melki,
e Melki a nat e Janai,
e Janai a nat e Josep,

²⁵ e Josep a nat e Matatias,
e Matatias a nat e Amos,
e Amos a nat e Nahum,
e Nahum a nat e Esli,
e Esli a nat e Nagai,

²⁶ e Nagai a nat e Mat,
e Mat a nat e Matatias,
e Matatias a nat e Semen,
e Semen a nat e Josek,

e Josek a nat e Joda,
²⁷ e Joda a nat e Joanan,
e Joanan a nat e Resa,
e Resa a nat e Serubabel,
e Serubabel a nat e Salatiel,
e Salatiel a nat e Neri,
²⁸ e Neri a nat e Melki,
e Melki a nat e Adi,
e Adi a nat e Kosam,
e Kosam a nat e Elmadam,
e Elmadam a nat e Er,
²⁹ e Er a nat e Josua,
e Josua a nat e Elieser,
e Elieser a nat e Jorim,
e Jorim a nat e Matat,
e Matat a nat e Liwai,
³⁰ e Liwai a nat e Simion,
e Simion a nat e Juda,
e Juda a nat e Josep,
e Josep a nat e Jonam,
e Jonam a nat e Eliakim,
³¹ e Eliakim a nat e Melea,
e Melea a nat e Mena,
e Mena a nat e Matata,
e Matata a nat e Natan,
e Natan a nat e Dewit,
³² e Dewit a nat e Jesi,
e Jesi a nat e Obet,
e Obet a nat e Boas,
e Boas a nat e Salmon,
e Salmon a nat e Nason,
³³ e Nason a nat e Aminadap,
e Aminadap a nat e Atmin,

e Atmin a nat e Arni,
 e Arni a nat e Hesron,
 e Hesron a nat e Peres,
 e Peres a nat e Juda,
³⁴ e Juda a nat e Jekop,
 e Jekop a nat e Aisak,
 e Aisak a nat e Abaram,
 e Abaram a nat e Tera,
 e Tera a nat e Nahor,
³⁵ e Nahor a nat e Seruk,
 e Seruk a nat e Reu,
 e Reu a nat e Pelek,
 e Pelek a nat e Eber,
 e Eber a nat e Sela,
³⁶ e Sela a nat e Kainan,
 e Kainan a nat e Arpaksat,
 e Arpaksat a nat e Sem,
 e Sem a nat e Noa,
 e Noa a nat e Lamek,
³⁷ e Lamek a nat e Metusela,
 e Metusela a nat e Enok,
 e Enok a nat e Jaret,
 e Jaret a nat e Mahalalel,
 e Mahalalel a nat e Kenan,
³⁸ e Kenan a nat e Enos,
 e Enos a nat e Set,
 e Set a nat e Adam,
 e Adam a nat e God.

4

E Satan i lar e Iesu
(Matiu 4:1-11; Mak 1:12-13)

¹ E Iesu i bukus ana Talngan Tabu. Ning i han mito na malum Jodan, a Talngan Tabu i nigoni uting na hanua bel.

² I kes tingia diat a bonot a pukakiar pa bel i hangan, pa e Satan i lari. Ning ka rop a pukakiarla ning, i murak.

³ Pa e Satan i atai i mange, “Ning u a Nat e God, ur atai a hat ne sur ir hanot a bret.”

⁴ E Iesu i kelesi mang, “Di ka tumus tari ting na Buk Tabu mange, ‘A tarai bel la sira laun ka ana utna na hangan.’” *Lo 8:3*

⁵ E Satan i ben pasi uting na ning a pukna tisaot, pa ana tuka kamis ka, i asangan tar a hananuala rop te na rakrakan hanua tana.

⁶ Pa i atongi tana mang, “Ar saran tar a matatarinla pa a rakrakainla rop tam sur ur warkurai sur la rop, anasa di ka saran tari tak, pa ar sarani tetek tik ning a mang suri.

⁷ Ning ur lotu tetek iau, a ututnala rop ne anumi ka.”

⁸ E Iesu i atongi tana mang, “Di ka tumus tari ting na Buk Tabu mange, ‘Ur lotu tetek a Leklek anum a God, pa ur longor ka tana.’” *Lo 6:13*

⁹ Pa e Satan i ben pasi usaot e Jerusalem, pa i atur tari sot ot na pukul a rumai artabar. Pa i atongi tana mang, “Ning u a Nat e God, ur sirok purum mite,

¹⁰ anasa di ka tumus tari ting na Buk Tabu mang,

‘Ir sune anuna angelola
sur lar tai alar wakak u.

¹¹ Lar tong pas u ana kunla,

sur gong u buh a ham ana ta hat.' ” *Buk Song 91:11-12*

¹² E Iesu i kelesi mang, “Di ka atong tari ting na Buk Tabu mang, ‘Gong u lar a Leklek anum a God.’ ” *Lo 6:16*

¹³ Ning e Satan ka lar tari, i han pas kaba kusuni.

E Iesu i turpas anuna titol tumo e Galili (Matiu 4:12-17; Mak 1:14-15)

¹⁴ E Iesu i ulak utumo na papar Galili ana rakrakai ana Talngan Tabu, pa warwara onoi i han sarara ting na papar rop ning.

¹⁵ Pa e Iesu i asaer a tarai ting na nunla na rumai lotula, pa la rop la atong leklek pasi.

Di lu sen e Iesu mito e Nasaret (Matiu 13:53-58; Mak 6:1-6)

¹⁶ Ning e Iesu i hanot to e Nasaret, a hanua ning i itna tar ia, i kas uting na rumai lotu ana Pukakiar Sabat, arlar ot ana nuna toltol, pa i tur sur ir wawas.

¹⁷ Pa di saran tar a buk anuna propet Aisaia teteki. I sapang a buk ning di ka hin tari, pa i pastek pas a pukna ning di ka tumus tari onoi mange,

¹⁸ “A inguna Leklek i kes hok,
 anasa ka aslang pas iau sur ar warawai ana wakak a warwara tana kapan a tarai.
 I sune iau sur ar warawai mange, dir pak sen la ning di dot akes tar la,
 dir apalpalas ulak la ning a matanla i kut,

pa dir alangolango la ning la kilang a
mamahatla ning di tol tari onla,

¹⁹ pa ar warwara ana rau ning a Leklek ir
asangan anuna marmaris.” *Aisaia 61:1-2*

²⁰ I hin ulak a buk ning, i sarani tetek a tena
titol, pa i kes. A taraila rop tingui na rumai lotu
la ngoson rakrakai i,

²¹ pa i atai la mange, “A warwara ne mulo
longori, onone di ka tolsot pasi.”

²² La gas pasi, pa la kulkulan ana nuna wakak
a warwara. Pa la atongi onoi mang, “A barsan
ne a nat e Josep ka, gepi?”

²³ Pa i atai la mang, “Sakana mulor atong a
ngas a warwarala ne hok: ‘Dokta, ur
alangolango pas u ot! A ututnala ning mila
longori mang u ka tol tari to e Kapernaum, i
wakak ning ur toli otleng te na hanua ngasim.’ ”

²⁴ Pa e Iesu i atai la mang, “A atong momoli
tamulo, bel ta propet di sira gas pasi ting na
hanua ngasna.

²⁵ A momolna ot mang a galis a lao la kes tumo
e Israel ana rau ane Elaija, ning natol a rau pa
diono na kalang bel al kiar, pa tnan munurak i
kibas a hananuala rop.

²⁶ Ika e God bel i sune e Elaija tetek ta te Israel,
tetek a lao ka ting na hanua Sarepat tumo na
papar Saidon. Esaning bel a hané Israel.

²⁷ Pa galis a lepra la kes tumo e Israel ana rau
anuna propet Elisa, ika e God bel i alangolango

4:22: 4:22 Luk 3:23; Jon 6:42 **4:24: 4:24** Jon 4:44 **4:25: 4:25**
1 King 17:1, 7 **4:26: 4:26** 1 King 17:8-16 **4:27: 4:27** 2 King
5:1-14

ting onla, e Naman ka a barsan misaot e Siria, ning bel a te Israel.”

²⁸ A taraila rop ning la kes ting na rumai lotu, la bukus ana balakut*, ning la longor a warwarala ne.

²⁹ La kamtur, pa la lu sen e Iesu kusun anunla hanua. La ben pasi saot na mangir ning la ka tol anunla hanua onoi, sur lar migen purumi ting na ris a hat.

³⁰ Ika i han potor ting na kunum a tarai, pa i han ana nuna tinan.

*E Iesu i kepsen sen a mot kusun a barsan
(Mak 1:21-28)*

³¹ Lamur e Iesu i han utumo e Kapernaum, ting na papar Galili, pa ana Pukakiar Sabat i asaer a tarai.

³² La kulkulan ana nuna asaer, anasa i asaer la arlar o esaning a warkurai kaning tana.

³³ Tingui na rumai lotu, ning a barsan kaning, a mot i solongi, i kukuk rakrakai mange,

³⁴ “Ai! U e Iesu a te Nasaret. Ur tol asa omila? U hanot sur ur alaulau mila? A tasman u ot, u a Tena Totoh ane God.”

³⁵ E Iesu i sairasi mange, “Gong u warwara! Purum kusun a barsan ning!” A mot i migen purum tari na matanla rop, i purum kusuni, pa bel ta puka palaona i laulau.

³⁶ A tarai rop la kulkulan kol, pa la deke artalai la mang, “Esi na ngas a warwara ine? A warkurai pa rakrakai kaning tana, pa ana nuna

* **4:28: 4:28** La balakut anasa la nuki mang, e God i mang kol sur la tanla ning bel a tarai Israel. **4:32: 4:32** Matiu 7:28-29

warwara i kepsen sen a motla, pa la purum kakat.”

³⁷ Pa warwara oe Iesu i han sarara ting na hananuala rop tumo na papar ning.

*E Iesu i alangolango pas a galis a tinsaman
(Matiu 8:14-17; Mak 1:29-39)*

³⁸ E Iesu i purum kusun a rumai lotu, pa i han sur uting na rumai ane Saimon. Pa e anmuna e Saimon, a hane, i sasam ana laplapang, pa la nunung e Iesu sur ir nangani.

³⁹ Pa e Iesu i tur ting na ngasna, pa i kepsen a laplapang kusuni, pa hane ning i langolango. Ano otning i kamtur, pa i tabar la ana utna na hangan.

⁴⁰ Ning ka rah morom, a tarai la ben pas la ning la sasam ana urmatana tinsaman tetek e Iesu. Pa i suah naur a kuna onla taktakai, pa la langolango.

⁴¹ Pa motla otleng la purum kusun a galis, pa la kukuk mang, “U a Nat e God.” Ika e Iesu i sairas la, sur gong la warwara, anasa la tasmani ot mang ai a Karisito.

⁴² Ning ka kabakiar, e Iesu i han sur uting na hanua bel. A kunum a tarai la sereni. Ning la pasteteki, la tohi sur lar sairasi sur gong i han kusun la.

⁴³ Ika i keles la mang, “Ar warawai ana Wakak a Warwara ana matanitu ane God ting na dingla na hananua masik otleng. Anasa ine a kamkamna ning i sune iau ute.”

44 Pa i sira warawai amon ting na rumai lotula ting na papar Judia.

5

*A ningnigo na kakak a asaerla ane Iesu
(Matiu 4:18-22; Mak 1:16-20)*

¹ Ning a pukakiar, ning e Iesu i tur tumo latasi ana puka tasi Genesaret, a tarai la tur talilis pasi, sur lar longor a warwara ane God.

² Pa i oroi pas naur a mon ting latasi, ning dingla na tena migen uben la ka han kusun diau, kaning la gos anunla na uben.

³ Pa e Iesu i kas ana ning halindiau, a mon ning ane Saimon, pa i atai i mang ir sugut siklik tar a mon usa latasi. Pa e Iesu i kes onoi, pa i asaer a kunum a tarai.

⁴ Ning ka rop anuna warwara, i atai e Saimon mang, “Mulor han usa na laman, pa mulor migen anumulo na uben sur al sis.”

⁵ E Saimon i atai i mang, “Tena Asaer, mila tol panai kol ana kidol a morom, pa bel mila dat pas al sis. Ika, ar migen ulak tar na uben, anasa u arsune.”

⁶ Ning la migen tar la, la dat pas a galis a sis, pa nunla na uben milau lar taksilir.

⁷ La kali pas na halalinla miting na ning a mon sur lar nangan la. Pa la han tetek la, pa la abukus pas naur a mon rop, pa milau diar murung.

⁸ Ning e Saimon Pita i oroi a utna ne, i punga purum napir a hana e Iesu pa i atai i mang, “Leklek, han kusun iau, iau a tena laulau.”

⁹ I atongi larne anasa e Saimon pa la ning la armuri la kulkulan ana sista ning la dat pasi,

¹⁰ mang otleng larning tetek naur a halalna, e Jems pa e Jon, naur a nat e Sebedi.

E Iesu i kelesi mang, “Gong u matmataut. Turpasi onone, ur dat a taraila.”

¹¹ Ning la ka dat tar naur a mon, la han kusun anunla ututnala rop, pa la mur e Iesu.

*E Iesu i alangolango pas ning a lepra
(Matiu 8:1-4; Mak 1:40-45)*

¹² E Iesu i kes ting na ning a hanua, pa ning a barsan a palaona rop i laulau ana lepra i kes tingia. Ning i oroi pas e Iesu, i punga purum ana patarna ting na piu pa i nunung rakrakai i mang, “Leklek, ning u mang, ur tolsot sur ur alangolango pas iau.”

¹³ Pa e Iesu i tuslan a kuna, i tong a palaona pa i atai i mang, “A mang ot, ur langolango.” Ono otning a lepra i rop kusuni.

¹⁴ Lamur e Iesu i warwara rakrakai teteki mang, “Gong u atai tar tik ono. Ur han pa ur asangan u tetek a tena artabar tetek e God, pa ur saran a artabar tetek e God larning e Moses ka atong tari. Ning ur toli larne ir talapor tetek a taraila mang a palaom ka wakak ulak.”

¹⁵ Ika a warwara oe Iesu ka han sarara, pa galis a tarai la han taum sur lar longori, pa sur ir alangolango pas la kusun anunla na tinsaman.

¹⁶ Ika a galis a pukakiar e Iesu i sira han masak utumo na hanua bel, sur ir araring.

E Iesu i alangolango pas a barsan ning a palaona i mat

(Matiu 9:1-8; Mak 2:1-12)

¹⁷ Ning a pukakiar ning e Iesu i asaer a tarai, dingla na Parisaio pa dingla na tena asaerla tagun a warkurai, la kes tingia. La hanot miting na hananuala rop ting na papar Galili pa papar Judia pa misaot e Jerusalem otleng. Pa rakrakai ana Leklek i kes oe Iesu sur ir alangolango na tinsaman.

¹⁸ Dingla na barsan la los a barsan ting na logo ngasna. A barsan ning a palaona i mat. La tohoi sur lar kas onoi, sur lar aborbori salanigo ta e Iesu.

¹⁹ Ika bel la tolsot sur lar kas onoi, anasa a tnan kunum a tarai. La abit taum onoi usaot na rumai, la kepsen pas ning a pukna tisaot, pa la alorong purum amoni ana logo ngasna na arpotor a kunum a tarai, tostos ting lanigo ta e Iesu.

²⁰ Ning e Iesu i oroi anunla tortorot, i atai i mang, “Halik, di ka kepsen tar anum na toltol laulau.”

²¹ A tena asaerla tagun a warkurai pa Parisaiola, la nuknuk ana nuknukinla mang, “Esi na ngas a barsan ne? Ning i warwara larning, i atong saksakan e God anasa i warwara larning i e God. Esi ir kepsen a toltol laulaula? E God ka.”

²² Ika e Iesu ka tasman tar a nuknukinla, pa i deken la mange, “Sur asa mulo nuknuk larne?”

²³ Esi na ngas a warwara ning bel i ngangaten sur ar atongi? Ar atongi mang, ‘Di ka kepsen tar anum na toltol laulaula,’ o ar atongi mang, ‘Ur kamtur, pa ur han’?

²⁴ Ar atongi larne sur mulor tasmani mang e God ka saran tar a warkurai tetek a Nat a Barsan sur ir kepsen a toltol laulaula te lapiu.” Pa i atai a barsan ning a palaona i mat mange, “A atai u, ur kamtur, ur kibas a logo ngasim, pa ur han uting na rumai ngasim.”

²⁵ Ano oting i tur salanigo tanla rop, i kibas a logo ngasna, pa i han uting na rumai ngasna. Ning i han amon i atong lekkek pas e God.

²⁶ Pa la rop la kulkulan, la rakan alekkek pas e God, a palaonla i suren, pa la atongi mang, “Onone, dala oroi a maskana utna i totoh ana ororoi anundala.”

*E Iesu i kabah pas e Liwai
(Matiu 9:9-13; Mak 2:13-17)*

²⁷ Ning ka rop a ututnala ne, e Iesu i han pa i oroi pas a tena los totokom, a risana e Liwai, i kes ting na rumai a los totokom, pa e Iesu i atai i mange, “Ur mur iau.”

²⁸ Pa e Liwai i kamtur pa i han kusun anuna ututnala rop, pa i muri.

²⁹ Lamur e Liwai i tol a tnan utna na hangan oe Iesu ting na rumai ngasna. A galis a tena los totokom pa dingla na tarai otleng la kes taum oe Iesu ana utna na hangan ne.

³⁰ Dingla na Parisaio pa anunla na tena asaerla tagun a warkurai, la warwara na ururai

tetek anuna kakak a asaerla mange, “Sur asa mulo hangan pa mulo gang taum ana tena los totokomla pa tena laulaula?”

³¹ E Iesu i keles la mange, “A dokta bel i hanot sur la ning la langolango. I hanot sur la ka ning la sasam.

³² Bel a hanot sur a tena tostosla. A hanot sur ar kabah pas a tena laulaula sur lar lingir a nuknukinla.”

*A kabah ana tamai
(Matiu 9:14-15; Mak 2:18-20)*

³³ Dingla na tarai la atai e Iesu mange, “A kakak a asaerla ane Jon la sira tamai pa la sira araring, mangotleng lar a kakak a asaerla anuna Parisaiola. Ika anum na kakak a asaerla la hangan pa la gang.”

³⁴ E Iesu i keles la mange, “Ning ta barsan ir taulai totoh, na halalna lar tamai mangmangasa ning a barsan ning kaning ot i kes taum onla?

³⁵ Ika ta pukakiar ir hanot, ning dir ben maskan pas a barsan ning kusun la, pa ana pukakiar ning lar bot tamai.”

*A warwara larlar ana kaen pa wain
(Matiu 9:16-17; Mak 2:21-22)*

³⁶ E Iesu i warwara larlar otleng tetek la mange, “Bel tik ir silir pas ta diah kaen miting na tona kaen, sur ir suk ahati ana turai a kaen. Ning ir toli larning, ir silir laulau a tona kaen, pa tona diah kaen bel ir arlar taum ana turai a kaen.

³⁷ Pa bel tik ir tere a tona wain uting na turai a koto na wainla ning di toli ana palaona inagoi,

sakana a kotola lar tapuros pa lar laulau, pa wain ir tapek.

³⁸ Dir tere ot a tona wain uting na tona koto na wainla.

³⁹ Bel tik ning ka gang pas a turai a wain, ir mang ulak sur a tona wain, ir atongi ka mang, ‘A turaina ot i wakak.’ ”

6

E Iesu a Leklek tagun a Pukakiar Sabat
(*Matiu 12:1-8; Mak 2:23-28*)

¹ Ana ning a Pukakiar Sabat, e Iesu i han potoring na barim a wit, pa anuna kakak a asaerla la turpas a kumut kutus a witla, la gisgisi ana kunla pa la ieni.

² Dingla na Parisaio la deken e Iesu mange, “Sur asaning mulo tol a utna ning pa bel mulo mur a warkurai tagun a Pukakiar Sabat?”

³ Pa e Iesu i keles la mange, “I mangasa, belot mulo was asaning e Dewit i toli ning la murak taum ana taraila ning la armuri?”

⁴ I kas uting na rumai ane God, i kibas pas a bret ning di tabar tar e God ono, i ieni, pa i tabar la otleng ning la armuri. A bret ning di sairasi kusun a tarai oros. I arlar ana Warkuraila sur a tena artabarla ka tetek e God lar ieni.”

⁵ Pa e Iesu i atai la mange, “A Nat a Barsan a Leklek tagun a Pukakiar Sabat.”

E Iesu i alangolango pas a barsan ning a kuna i del
(*Matiu 12:9-14; Mak 3:1-6*)

⁶ Ana ning a Pukakiar Sabat ulak, e Iesu i kas uting na rumai lotu, pa i asaer a taraila. Pa ning a barsan kaning ia, a sot a kuna i del.

⁷ A Parisaiola pa tena asaerla tagun a warkurai la tai sur ta ngas ning lar tiu e Iesu ono, pa la ngoson murmuri mang ir alangolango a tinsaman ana Pukakiar Sabat, o bel.

⁸ Ika e Iesu ka tasman a nuknukinla pa i atai a barsan ning a kuna i del mang, “Kamtur! Pa ur tur ting lanigo tanla rop.” I kamtur, pa i tur salanigo tanla.

⁹ Lamur e Iesu i atai la mange, “Ar deken mulo: Asaning a Warkuraila i atongi sur dir toli ana Pukakiar Sabat? Dir tol a wakakna o dir tol a laulauna, dir alangolango tik o dir alaulau tik?”

¹⁰ Pa i tai taltal tetek la rop, pa i atai a barsan mang, “Ur kodos a kum.” Pa i kodosi, pa kuna i tostos ulak.

¹¹ Pa balanla i bukus ana balakut, pa la warwara artalai tanla sur ta utna lar toli oe Iesu.

*E Iesu i aslang pas ning a bonot pa pisir naur a aposella
(Matiu 10:1-4; Mak 3:13-19)*

¹² Ning a pukakiar, e Iesu i han usaot na mangir sur ir araring. A kidol a morom ning, i araring tetek e God.

¹³ Ning i kabakiar, i kabah pas anuna tarai a asaer teteki, pa i aslang pas ning a bonot pa pisir naur tagun la, pa i atong la a aposella*.

* **6:13: 6:13** A kamkama warwara “apotel”, “di sune i.” E Iesu i sune la sur lar warawai ana Wakak a Warwara oe Iesu.

14 Na risanla ne: E Saimon ning e Iesu i saran tar ning a risana otleng e Pita, ditas ma e Endru, Jems, Jon, Pilip, Batolomiu,

15 Matiu, Tomas, e Jems a nat e Alpius, e Saimon ning di atongi mang takai tagun a kunum Silot,†

16 e Judas a nat e Jems, pa e maurana otleng e Judas Iskariot esaning i asobor tar e Iesu.

E Iesu i asaer a tarai pa i alangolango la (Matiu 4:23-25)

17 E Iesu pa anuna tarai a asaer la han purum misaot na mangir, pa i tur ting na puka tostosna, taum ana nuna kunum a tarai a asaer. A galis a tarai misaot na papar Judia pa e Jerusalem pa miting na hananuala tumo latasi milau e Tair pa e Saidon otleng,

18 la hanot sur lar longori, pa ir alangolango pas la kusun anunla na tinsamanla. Pa i kepsen a motla kusun la rop ning a motla la alaulau la.

19 Pa taraila rop, la mang sur lar tuk a palaona e Iesu, anasa a rakrakai i purum taguni, pa i alangolango la rop.

A gasgas pa balmaris (Matiu 5:1-12)

20 E Iesu i ngoson anuna tarai a asaer pa i atongi mang,

“Mulo ning mulo kapan, mulo angis,
anasa a matanitu ane God anumuloi.

21 Mulo ning mulo murak onone, mulo angis,

† **6:15: 6:15** A rising Silot a risan a tarai, ning la tur taum anasa la mang sur lar lakran sen a matanitu Rom. **6:21: 6:21** Tatatai 7:16-17; Buk Song 126:5-6; Aisaia 61:3

anasa lamur mulor masur.
 Mulo ning mulo domos onone, mulo angis,
 anasa lamur mulor lagar.

²² Mulo angis ning a tarai la nget mulo,
 pa ning la kepsen mulo
 pa la atong laulau mulo,
 pa ning la atong laulau a risamulo,

anasa mulo na halal a Nat a Barsan.

²³ “Ana pukakiar ning dir tol a ututnala ning
 tetek mulo, mulor gas, mulor sirok ana gasgas,
 anasa anumulo arlou saot na langit i itna kol. Pa
 toltolla ning, anunla mangis a tarai tagun nating
 la ka tol tari tetek a propetla.

²⁴ Ika ir laulau tetek mulo ning anumulo na
 ututnala i galis,
 anasa mulo ka kibas pas anumulo a
 wakakna.

²⁵ Ir laulau tetek mulo ning mulo masur onone,
 anasa lamur mulor murak.
 Ir laulau tetek mulo ning mulo langlagar onone,
 anasa lamur mulor balmaris pa mulor
 domos.

²⁶ Ir laulau tetek mulo ning a taraila rop la atong
 leklek pas mulo,
 anasa a toltol ning, anunla mangis a tarai
 tagun nating la ka tol tari tetek a propet
 asasongola.

*A titol a marmaris tetek a hiruala
 (Matu 5:38-48)*

²⁷ “A atai mulo ning mulo longor iau, mulor
 mang sur anumulo na hirua, pa mulor tol a
 wakakna tetek la ning la nget mulo.

²⁸ Mulor angis la ning la nunung sur e God ir alaulau mulo, pa mulor araring sur la ning la alaulau mulo.

²⁹ Ning tik ir pasar a ris a paham, ur saran otleng ning a ris tana. Ning tik ir ras pas anum a kaen na polpol alar anum a mermer, ur noren tar otleng anum a siot tana.

³⁰ Ur tabar la rop ning la nunung u. Pa ning tik ir kibas pas ta utna anumi, gong u nunung ulak suri.

³¹ Mulor tol al ngas a utna tetek a tarai ning mulo mang sur lar toli tetek mulo.

³² “Ning mulor mang sur la ka, ning la mang sur mulo, dir aleklek mangmangasa pas mulo? Anasa a tena laulaula otleng la mang sur la ning la mang sur la.

³³ Ning mulor tol a wakakna tetek la ning la wakak tetek mulo, dir aleklek mangmangasa pas mulo? Anasa a tena laulaula otleng la toli larning.

³⁴ Ning a tarai lar mang sur lar kibas pas ta utna kaba tamulo, pa mulo sarani ka tetek la ning mulo tasmani mang lar kelesi ot tetek mulo, dir aleklek mangmangasa pas mulo? Anasa a tena laulaula otleng la saran a ututnala tana tena laulaula, pa la nuki mang lar kelesi.

³⁵ Ika mulor mang sur anumulo na hirua, pa mulor tol a wakakna tetek la. Pa ning a tarai lar mang sur lar kibas pas ta utna kaba tamulo, mulor sarani ka tanla, pa gong mulo mang sur lar kelesi. Ning mulor toli larning, anumulo a arlou ir itna kol, pa mulo na natnat e God i

Leklek Kol, anasa i mang sur la ning bel la sira atong wakak teteki, pa tena laulaula otleng.

³⁶ Mulor asangan a marmaris, larning e Tamamulo a tena marmaris.

*Gong mulo warkurai a toltol ana tik
(Matiu 7:1-5)*

³⁷ “Gong mulo warkurai a toltol ana tik, sakana e God otleng ir warkurai a toltol anumulo. Gong mulo tiu tik sur ir los a warkurai a arkeles, sakana e God otleng ir tiu mulo sur mulor los a warkurai a arkeles. Mulor nuk duman sen a toltol laulaula ning a tarai la toli tetek mulo, pa e God ir kepsen anumulo na toltol laulau.

³⁸ Mulor artabar, pa e God ir tabar mulo. A artabar ane God tetek mulo ir bukus, pa dir gulen purumi, pa ir bukus ulak, pa ir taptapek. Pa esi na ngas a artabar ning mulor sarani, i itna o i natarna, mangotleng larning e God ir sarani tamulo.”

³⁹ E Iesu i atong otleng a warwara larlar tetek la mange, “A kut bel ir ben sot pas ta kut, sakana dia rop diar punga lorong ting na tung.

⁴⁰ A kaklik a asaer bel i lekkek tan anuna tena asaer. Ika esining ka arop pas anuna asaer, ir arlar ana nuna tena asaer.

⁴¹ “Sur asaning u oroi pas ka a beren kaning na matana e tasimlik, pa bel u nuk pas a puka rakai kaning na matam?

⁴² Ning a puka rakai kaning na matam, ur atong mangmangasa i tetek e tasimlik mang,

‘Tasiklik, ar kepsen a beren kusun a matam’? U a tena asasongo, ur kepsen nigon a puka rakai kusun a matam, pa ur tai wakak sur ur kepsen a beren kusun a matana e tasimlik.

Naur a ngas a wana rakai

(Matiu 7:16-20; 12:33-35)

⁴³ “A wakak a rakai bel ir sira suah ta laulau a wana, pa laulau a rakai otleng bel ir sira suah ta wakak a wana.

⁴⁴ Dir oroi lalan a rakai miting na wana. Bel tik ir git pas ta wana fig miting na kadas, pa ta wana wain miting na rosros.

⁴⁵ A wakak a barsan i asangan anuna wakak a toltol ning kaning na balana, pa laulau a barsan otleng i asangan anuna toltol laulau ning kaning na balana. Anasa a pahana tarai i atong puasa a toltol ning i bukus ting na balanla.

Naur a tena tol rumai

(Matiu 7:24-27)

⁴⁶ “Sur asa mulo atong iau mang ‘Leklek, Leklek,’ pa bel mulo tol asala ning a atongi tamulo?

⁴⁷ Esining i han tetek iau pa i longor anuk na warwarala, pa i muri, i arlar ana barsan ning ar atai mulo onoi.

⁴⁸ I arlar ana barsan ning i tol a rumai. I kel tungen pas a tung, pa i atur tar a pos ana rumai saot na hat. Ning a lomom i hanot, pa i saler uting na rumai ning, bel i gulen sot pasi, anasa di ka tol wakak tari.

⁴⁹ Ika tik ning ir longor anuk a warwarala pa bel i muri, i arlar ana barsan ning i atur anuna

rumai saot na kabalapiu pa bel i tol nigon tar a kama rumai. Ning a lomom i saler tar ono, i punga, pa i tarege kakat!”

7

A tortorot anuna ningnigo anuna tena harumla mito e Rom (Matiu 8:5-13)

¹ Ning e Iesu ka atong arop tar a warwara ning tetek a tarai, i han utumo e Kapernaum.

² Ning a ningnigo anuna tena harumla mito e Rom i kes tingia. Ning a halinla anuna tena titol oros i sasam, milau ir mat. A tena titol oros ning, anuna ningnigo i mang kol suri.

³ Ning a ningnigo anuna tena harumla i longor a warwara oe Iesu, i sune dingla na ningnigola anuna tarai Juda sur lar nunungi sur ir han teteki, pa ir alangolango pas anuna tena titol oros.

⁴ Ning la hanot tetek e Iesu, la nunung rakrakai i mange, “A barsan ning a wakak a barsan, i wakak ning ur longor tana,

⁵ anasa i mang kol sur anundala a tarai, pa i lou tar anumila rumai lotu.”

⁶ Pa e Iesu i mur la.

Ning la ka milau a rumai, a ningnigo anuna tena harumla i sune dingla na halalna tetek e Iesu ana warwara mange, “Leklek, gong a angoro u, anasa bel a tostos sur ur kas ting na rumai ngasik.

⁷ Bel a nuki otleng mang a tostos sur ar han tetek u. Ur atong ta warwara ka, pa anuk a tena titol oros ir langolango.

⁸ Anasa iau a barsan ning a sira longor ana warkurai anunla ning la leklek tak, pa di saran tar a warkurai otleng tak sur ar nigon a tarai a harum. Ning ar atongi tana tik mang, 'Ur han,' ir han ka. Pa tetek tik otleng larne, 'Ur han ute,' ir han ka ute. Pa tetek anuk a tena titol oros mang, 'Ur tol a utna ne,' ir toli ka."

⁹ Ning e Iesu i longor a warwara ne, i kulkulan kol onoi, pa i talingir tetek a tarai ning la muri, pa i atongi mang, "A atongi tamulo mang, bel a oroi ta te Israel, ning anuna tortorot i itna arlar ana barsan ning."

¹⁰ Pa la ning di sune tar la, la ulak uting na rumai, la oroi mang a tena titol oros ning ka langolango.

E Iesu i alaun pas a natna ning a lao

¹¹ Bel i bongnani, pa e Iesu i han uting na hanua di atongi e Nain, pa anuna kakak a asaerla pa tnan kunum a tarai otleng la han taum onoi.

¹² Ning ka hanot milau ting na taman a hanua, a tarai la los purum ning a minat mito na hanua. A minat ning, a barman, a natna ning a lao, takai sot ka. A galis a tarai mito na hanua la armuri taum onoi.

¹³ Ning a Leklek i oroi a hane ning, i marisi pa i atai i mang, "Gong u domos."

¹⁴ I han milau, pa i tong a logo ning di los a minat onoi, pa tarai ning la los a minat la tur suai. E Iesu i atongi mang, "Barman, a atai u, ur kamtur."

¹⁵ A minat i kes pa i turpas a warwara. Pa e Iesu i saran ulak tari tetek e tana.

¹⁶ A taraila rop ning la matmataut, pa la aleklek pas e God pa la atongi mang, “A tnan propet ka hanot na arpotor indala. E God ka hanot sur ir nangan dala, anuna tarai.”

¹⁷ Pa warwara oe Iesu, i han sarara to na papar Judia rop, pa hananuala milau otleng.

E Iesu pa e Jon a Tena Baptais
(Matiu 11:2-19)

¹⁸ A kakak a asaerla ane Jon a Tena Baptais la atai i ana ututnala rop ne oe Iesu. E Jon i kabah pas naur a halinla,

¹⁹ pa i sune diau tetek a Leklek sur diar dekeni mang, “U ma ning di warwara nigo tar hom mang ur hanot, o milar harnanai ot sur tik*?”

²⁰ Ning dia hanot tetek e Iesu, dia atongi mang, “E Jon, a Tena Baptais i sune miau tetek u, sur miar deken u mang, ‘U ma ning di warwara nigo tar hom mang ur hanot, o milar harnanai ot sur tik?’ ”

²¹ Ano otning, e Iesu i alangolango pas a galis kusun anunla na kankan pa nunla na tinsamanla, pa i kepsen a motla kusun la, pa i apalpalas pas a galis a kut.

²² Pa i keles diau mange, “Mur ulak, pa mur atai e Jon ana ututnala ne mu ka oroi tari, pa mu ka longor tari: A kutla la ka tai, la ning a hanla i mat la ka han tostos, a leprala la ka langolango,

7:15: 7:15 1 King 17:23; 2 King 4:36 **7:16: 7:16** Luk 1:68 **7:18: 7:18** Buk Song 40:7; Malakai 3:1; Tatatai 1:8 * **7:19: 7:19** A Karisito esaning di harnanai suri. **7:22: 7:22** Aisaia 35:5-6; 61:1; Luk 4:18

na talngana kutkut la ka longor, a minatla la ka kamtur, pa di warawai ana Wakak a Warwara tetek a kapan a tarai.

²³ Esining i oroi a ututnala ne a toli, pa anuna tortorot bel i punga, ka angis.”

²⁴ Ning naur a kaklik a asaer ane Jon dia ka han, e Iesu i turpas a warwara tetek a kunum a tarai oe Jon mang, “Lanigo ning mulo han uting na hanua bel tetek e Jon, asaning mulo tai suri? Ngandek a kunai ning i maler ana wuwu? Bel.

²⁵ Asaning mulo han sur mulor oroi i? A barsan ning i mermer ana wakak a kaenla? Bel. Oroi, la ning la sira mermer ana ngangaten a kaenla, pa la angis ana wakak a ututnala, la sira kes ting na rumai ana kingla.

²⁶ Asaning mulo han sur mulor oroi i? A propet? Momol, a atai mulo, e Jon i leklek kol tana propetla.

²⁷ Di ka tumtumus tar onoi ting na Buk Tabu mange,
‘Oroi, ar sune anak a tena los warwara sur ir
nigon u

pa ir atalapor anum a ngas.’ *Malakai 3:1*

²⁸ A atai mulo, e Jon i leklek kol tana taraila rop mite lapiu. Ika esining i natarna kol ana matanitu ane God, i leklek tana.”

²⁹ Ning la longori, a taraila rop pa na tena los totokom otleng, la oroi lalani mang a ngas ane God i tostos, anasa la ka kibas tar a baptais ta e Jon.

³⁰ Ika a Parisaiola pa tena asaerla tagun a warkurai la gilam ris ana ngas ning e God i sarani sur la, anasa bel la kibas a baptais ta e Jon.

³¹ Pa e Iesu i atong ulaki mang, “Esi na warwara larlar ning ar atongi ana tarai tagun onone? La arlar ana sa?”

³² La arlar ana kakakla ning la kes ting na tinine hanua pa la arkabah tetek na halalinla mang,

‘Mila pasar kudu,
ika bel mulo tortor ono,
pa mila saken a saksak a balmaris,
ika bel mulo tangis ono.’

³³ E Jon a Tena Baptais i hanot, bel i ien ta wakak a utna pa bel i gang a wain, pa mulo atongi onoi mang, ‘A mot kaning onoi.’

³⁴ A Nat a Barsan i hanot, i hangan pa i gang, pa mulo atongi onoi mang, ‘Oroi, a barsan ne a tena hangan pa tena gang, a hal a tena los totokomla pa tena laulaula.’

³⁵ Ika a taraila rop ning la mur a tastasman ane God, la asangani mang a tastasman ning i tostos.”

Ning a hane i pek a polo na tomtoboh ting na naur a hana e Iesu

³⁶ Ning a Parisaio i ben pas e Iesu sur diar hangan taum. E Iesu i kas ting na rumai ana Parisaio ning, pa i kes sur ir hangan.

³⁷ Pa ning a hane miting na hanua ning, a tena tol a toltol laulau. Ning i tasmani mang e Iesu

kaning i hangan ting na rumai ana Parisaio, i kas taum ana polo na tomtoboh kaning na koto ning di toli ana hat.

³⁸ Pa i tur tumo lamur ta e Iesu, ting napir naur a hana. Pa i domos, a luru matana i punga tar saot na naur a hana e Iesu, pa i sah diau ana hihna, i goro diau, pa i pek a polo na tomtoboh ondiau.

³⁹ Ning a Parisaio, esaning ka ben tar e Iesu, i oroi a utna ne, i nuki mang, “Ning a barsan ne a propet, ir tasman a hane ne i tong naur a hana, pa ir tasman otleng a ginina, mang ai a tena tol a toltol laulau.”

⁴⁰ E Iesu i atai i mang, “Saimon a mang sur ar atai tar u ana ning a utna.” Pa i kelesi mang, “Tena Asaer, ur atai iau ka.”

⁴¹ E Iesu i atai i mang, “Naur a barsan dia dinau mani pas tana ning a barsan. Ning a halindiau i dinau pas dilima na mar a kina, pa ning a halindiau otleng dilima na bonot a kina.

⁴² Naur a barsan ning bel dia tolsot sur diar keles a dinau. Pa barsan ning i atai diau mang, ‘Gong kama mu keles anumu na dinau.’ Esi na halindiau anuna marmaris ir itna kol?”

⁴³ E Saimon i kelesi mang, “Ngandek esaning di kepsen anuna dinau ning i itna kol.” E Iesu i atai e Saimon mang, “I tostos anum a arkeles.”

⁴⁴ E Iesu i gilam tetek a hane, pa i atai e Saimon mang, “Oroi a hane ne. Ning a kas te na rumai ngasim bel u saran al malum sur dir gos naur a hak onoi. Ika, a hane ne, i gos naur a hak ana luru matana, pa i sah diau ana hihna.

⁴⁵ Bel u asangan anum a gasgas tetek iau ana argoro, ika a hane ne i goro naur a hak turpasi ot ning a hanot te.

⁴⁶ Bel u sabar a pukuluk ana wel, ika a hane ne i pek a polo na tomtoboh te na naur a hak.

⁴⁷ A atai u mang, anuna tnan marmaris tetek iau i asangani mang e God ka kepsen tar anuna galis a toltolla. Ika esining di kepsen ka anuna siklik toltol laulau, anuna marmaris bel ir itna.”

⁴⁸ Pa e Iesu i atai a hane ning mang, “Di ka kepsen tar anum a toltol laulaula.”

⁴⁹ A tarai ning la kes ana utna na hangan, la warwara artalai arpotor inla mang, “Esi na ngas a barsan ne i kepsen a toltol laulaula?”

⁵⁰ E Iesu i atai a hane ning mang, “Ana num a tortorot ot, di ka alaun pas u. Ur han ana balmolmol.”

8

A gurarala la armuri taum oe Iesu

¹ Lamur e Iesu i han taltal uting na tatatnan hananuala pa nanatar a hananuala otleng, pa i sira warawai ana Wakak a Warwara ana matanitu ane God tetek la. La armuri taum ana nuna ning a bonot pa pisir naur a kakak a asaerla,

² pa gurarala otleng ning ka kepsen tar a motla kusun la, pa ka alangolango pas la kusun a tinsamanla. Ine a risanla: E Maria, ning di atongi e Maria Makdalen, esaning mais a motla la purum kusuni,

³ pa e Joana pa e Susana, pa galis otleng. E Joana a hane ane Kusa, a barsan ning a ningnigo ana rumai ane Herot. A gurarala ne la nangan e Iesu pa nuna kakak a asaerla ana nunla na gongon ot.

*A warwara larlar ana tena omomai
(Matiu 13:1-17; Mak 4:1-12)*

⁴ Ning a tnan kunum a tarai miting na hananuala la hanot tetek e Iesu, i atong a warwara larlar tetek la mange,

⁵ “Ning a tena omomai i han sur ir sapran a pat a witla. Ning i sapran amon la, dingla la punga ting na ngas, pa tarai la papas saot onla, pa manila otleng la ien sen la.

⁶ Dingla otleng la punga ting na pukna ning i hatat, pa ning la gomo ot, la main, anasa a piu i sengsenge kol.

⁷ Dingla na patna otleng la punga tar ting na tinine rosrosla, pa rosrosla la gomo taum onla, pa la rau alar pas la.

⁸ Dingla na patna otleng la punga ting na wakak a piu, la gomo pa la wai. Taktakai a rakai i suah takai a mar a wanala.”

Ning ka atong tar a warwara ne tetek la, i atongi mang, “Esining a talngana kaning, i wakak ning ir longor ono.”

⁹ Anuna kakak a asaerla la dekeni sur ir papak talapor ana warwara larlar ning ka atong tari.

¹⁰ Pa i atai la mange, “E God ka saran tar a tastamai tamulo sur mulor talapor ana ututnala ana nuna matanitu, ning nating i kes kumna. Ika

tetek a tarai masik a asaer la ana warwara
 larlarla, sur
 'lar oroi pa bel lar oroi lalani,
 lar longori pa bel lar tastamai ono.' *Aisaia*
 6:9

E Iesu i pak a warwara larlar ana tena omomai
(Matiu 13:18-23; Mak 4:13-20)

¹¹ "A kamkama warwara larlar ne i mange, a
 pat a wit i arlar ana warwara ane God.

¹² A pat a witla ning la punga ting na ngas, la
 arlar ana tarai ning la longor a warwara, pa e
 Satan i hanot, pa i kepsen a warwara miting na
 balanla, sur gong la tortorot, pa gong di alaun la.

¹³ Pa patnala ning la punga ting na pukna ning
 i hatat, la arlar ana tarai ning la longor a
 warwara, pa la tong akesi ana gasgas. Ika, bel al
 wakirinla, anunla tortorot bel i tur bongnani, pa
 ning a larlar ir hanot tetek la, lar punga ka.

¹⁴ Pa patnala ning la punga tar ting na tinine
 rosrosla, la arlar ana tarai ning la longor a
 warwara, ika ana nunla lalaun, a nuknuk kol, a
 gongonla, pa gasgas tagun a lalaun anone, la rau
 alar a warwara, pa bel la makos.

¹⁵ Ika patnala ning la punga ting na wakak a
 piu, la arlar ana tarai ning a balanla i wakak pa i
 tostos. La longor a warwara, la tong rakrakai i,
 pa la tur rakrakai, tuk ning lar wai.

A warwara larlar ana lam
(Mak 4:21-25)

¹⁶ " Bel tik ir asot tar ta lam pa ir aroh alari
 ana paket, pa bel ir suahi otleng ting nahai a

logo. Ir suahi ot saot na turtur ngasna, sur la ning lar kas, lar oroi a talaporna.

¹⁷ Pa ututnala rop ning i kes kumna, ir hanot talapor. Pa ututnala rop ning i kes mumun, lamur ir hanot talapor.

¹⁸ Mulor nuknuk wakak ana warwara ning mulo longori. Esining i tastasman ana warwara ane God, dir tabar ulaki ana galis. Ika, esining bel ta tastasman kaning tana, dir kepsen otleng siklik tastasman ning kaning tana.”

*E tana e Iesu pa na tastasna
(Matiu 12:46-50; Mak 3:31-35)*

¹⁹ E tana e Iesu pa na tastasna la hanot sur lar oroi i, ika bel la tolsot sur lar han milau i, anasa a kunum a tarai la tur alar pasi.

²⁰ Pa di atai e Iesu mang, “E tnam pa na tastasim, kanumo la tur tumo lapiu. La mang sur lar oroi u.”

²¹ Pa i atai la mang, “La ning la longor a warwara ane God pa la muri, la ning e nang pa na tastasik.”

*E Iesu i sairas a wuwu pa top
(Matiu 8:23-27; Mak 4:35-41)*

²² Ning a pukakiar e Iesu i atai anuna kakak a asaerla mang, “Dalar han lakai utumo na ris a puka tasi.” La kas uting na mon, pa la han.

²³ Ning la dun amon ana sel, e Iesu i borbor duman. A rakrakai a wuwu i ragati tanla ting na tasi, pa top i song a mon, pa milau lar hirua.

²⁴ A kakak a asaerla la han teteki, la amata i, pa la atai i mang, “Tena Asaer, Tena Asaer, dala kar hirua!” I kamtur, i sairasa a wuwu pa tatatnan top sur diar manah. Dia manah, pa tasi i mililo rop.

²⁵ Pa i atongi tana kakak a asaerla mang, “Kanahaia numulo a tortorot?” La matmataut, pa la kulkulan, la deken artalai la mang, “Esi na ngas a barsan ne? I warkurai a wuwu pa top pa dia longor tana.”

*E Iesu i kepsen a motla kusun ning a barsan
(Matiu 8:28-34; Mak 5:1-20)*

²⁶ E Iesu taum ana nuna kakak a asaerla la sot ting na papar anuna tarai Gerasa, ning i kes to na ris a puka tasi tumo na papar Galili.

²⁷ Ning e Iesu i purum kusun a mon, ning a barsan miting na hanua ning, a motla la solongi, i han barati. Ka bongnani, bel i pipis ta kaen, pa bel i kes otleng ting na ta rumai, i keskes ka ting na kulam ngas a minatla.

²⁸ Ning i oroi pas e Iesu, i kukuk, pa i punga purum tar ting na naur a hana, pa i kukuk kol mange, “Iesu, a Nat e God esaning i Leklek Kol, asaning ur toli hok? A nunung u, gong u akadik iau.”

²⁹ I atongi larne, anasa e Iesu ka warwara rakrakai pas tetek a mot sur ir purum kusun a barsan ne. A galis a taim a mot i solsolongi. A tarai la sira tai alar a barsan ne, la sira dot naur a kuna pa naur a hana ana sen, ika i sira dat kutus la ka, pa mot i sira angongosi usaot na hanua bel.

³⁰ E Iesu i dekeni mange, “Esi na risam?” Pa i kelesi mange, “A risak a liur a mot,” anasa a galis a mot la solongi.

³¹ Pa la nunung rakrakai e Iesu sur gong i sune kas la uting na tnan tung ning bel ta araropna.

³² A kaba liur a boroi la hangan ting na mangir, pa motla la nunung rakrakai e Iesu sur lar kas ana boroi. Pa i malmaling sen la.

³³ A motla la purum kusun a barsan ning, pa la kas tar ana boroila. Pa boroila la liu purum uting na palis sur utumo na puka tasi, pa la dom rop.

³⁴ La ning la tai alar a boroila, la oroi a utna ne, la dun ulak. La atatai ana utna ne ting na hanua ngasinla, pa dingla na hananuala otleng.

³⁵ Pa tarai la han sur lar oroi asaning i hanot. Ning la hanot tetek e Iesu, la oroi a barsan ning a motla la ka purum tar kusuni, i kes milau tar naur a hana e Iesu, ka pipis pas pa ka mananos ulak. Pa la matmataut.

³⁶ La ning la oroi asaning e Iesu i toli, la atai a tarai ana saning e Iesu i toli sur a barsan ning ir langolango kusun a motla.

³⁷ Pa taraila rop miting na papar anuna Gerasala la nunung e Iesu sur ir han kusun la, anasa la matmataut kol. Lamur e Iesu i kas ulak ana mon pa i han.

³⁸ A barsan ning a motla la ka purum tar kusuni, i nunung e Iesu sur diar armuri. Ika e Iesu i sune seni ka mang,

³⁹ “Ur han uting na hanua ngasim, pa ur warwara ana tnan utna ning e God ka tol tari hom.” Pa i han, i warwara ting na hanua ning ana tnan utna ning e Iesu ka tol tari onoi.

E Iesu i alaun pas a nat e Jairus pa i alangolango pas ning a hane

(Matiu 9:18-26; Mak 5:21-43)

⁴⁰ Ning e Iesu i ulak, a kunum a tarai la gasgas pasi, anasa la rop la harnanai ka suri.

⁴¹ Ning a barsan, a risana e Jairus, a ningnigo tagun a rumai lotu, i hanot pa i punga na hanrawai tar ting na ris a hana e Iesu. I nunungi sur ir han usa na rumai ngasna,

⁴² anasa takai ka natna hane, ning anuna rau i ning a bonot pa pisir naur, milau ir mat.

Pa ning e Iesu i han, a tnan kunum a tarai la arsugut alar pasi.

⁴³ Ning a hane tingia i sasam ana tinsaman a suluk, arlar ana ning a bonot pa pisir naur a rau*, ika bel tik i tolsot sur ir alangolango pasi.

⁴⁴ I han tumo lamur ta e Iesu, pa i tuk a ris a tuka saket anunai, pa suluk i manah kakat.

⁴⁵ Pa e Iesu i deke mange, “Esining i tuk iau?” La rop la puai, e Pita i atongi mang, “Tena Asaer, a tnan kunum a tarai ne la tur talilis u pa la arsugut alar pas u.”

⁴⁶ E Iesu i atongi mange, “Ning a halinla ka tuk tar iau, a kilangi mang a rakrakai i purum kusun iau.”

⁴⁷ Lamur a hane i tasmani mang di ka pastetek pasi, pa i koloron ot, pa i punga salanigo ta e Iesu. Na matana taraila rop, i atai e Iesu ana kamkamna ning i tuk tari, pa i atai i otleng ning i langolango kakat.

* **8:43: 8:43** Dingla na tena tastasmai ana Buk Tabu la nuki mang dingla na warwara otleng i kes te na ves ne. I mange: *ka arop tar anuna mani ana doktala.*

⁴⁸ Pa e Iesu i atai i mange, “Natuklik, anum a tortorot ka alangolango pas u. Ur han taum ana balmolmol.”

⁴⁹ Ning e Iesu kaning ot i warwara, takai i hanot mito na rumai ane Jairus, a ningnigo tagun a rumai lotu, pa i atai i mange, “Gong u amolot a Tena Asaer. E natum hane ka mat.”

⁵⁰ Ning e Iesu i longor a warwara ning, i atai e Jairus mange, “Gong u matmataut, ur tortorot ka, pa dir alaun ulak pasi.”

⁵¹ Ning i hanot ting na rumai, bel i malmaling pas tik sur ir kas taum onoi. I malmaling pas ka e Pita, e Jon pa e Jems, pa e taman a kaklik pa e tana otleng.

⁵² A taraila rop la kunkun pogol ana domos, pa e Iesu i atai la mang, “Gong mulo domos. A kaklik ning bel i mat, kaning ka i borbor duman.”

⁵³ Pa la malani ka, anasa la tasmani mang ka mat.

⁵⁴ Ika e Iesu i tong pas a kuna kaklik hane, pa i atai i mang, “Natuklik, ur kamtur.”

⁵⁵ Pa inguna i ulak teteki, pa i kamtur kakat. Pa e Iesu i arsune sur ta utna ana hane lik ning sur ir ieni.

⁵⁶ Tamana pa e tana dia kulkulan kol, pa e Iesu i sairas diau sur gong dia atai tik ana saning i hanot.

9

*E Iesu i sune ning a bonot pa pisir naur a kakak a asaerla
(Matiu 10:5-15; Mak 6:7-13)*

¹ Ning e Iesu i kabah taum pas ning a bonot pa pisir naur a kakak a asaerla, i saran tar a rakrakai pa warkurai tetek la sur lar kepsen a motla rop, pa lar alangolango otleng a taraila kusun a tinsamanla.

² Pa i sune sen la sur lar warawai ana matanitu ane God, pa lar alangolango a tinsamanla.

³ Pa i atai la mange, “Gong mulo los tar al utna ting na numulo a tinan, gong ta bulse, gong ta bek, pa gong ta utna na hangan, gong al mani pa gong al kelkeles.

⁴ Ning mulor kas ting na ta rumai, mulor kes ot tingia tuk ana pukakiar ning mulor han kusun a hanua ning.

⁵ Ning al tarai bel lar gas pas mulo, ning mulor han kusun a hanua ngasinla, mulor tang sen a kubus kusun a hamulo, sur a asilang na atumarang tetek la.”

⁶ A kakak a asaerla la han taltal ting na hananuala, la warawai ana Wakak a Warwara, pa la alangolango a tarai ting na hananuala rop.

A nuknukna e Herot i talar oe Iesu (Matiu 14:1-2; Mak 6:14-16)

⁷ E Herot, a ningnigo tagun a matanitu, i longor a ututnala ning i hanot. A nuknukna i talar onoi, anasa dingla na tarai la atongi mang e Jon ka kamtur ulak kusun a minat.

⁸ Pa dingla na tarai otleng la atongi mang e Elaija ka hanot. Dingla na tarai otleng la atongi mang ning a halin a propetla tagun nating ka laun ulak.

⁹ Ika e Herot i atongi mang, “Ia ka umsem tar ana ruana e Jon. Pa esi na barsan ulak ning, a longor a ututnala ne onoi?” Pa i tohoi sur ir oroi e Iesu.

E Iesu i tabar dilima na rip a tarai

(Matiu 14:13-21; Mak 6:30-44; Jon 6:1-14)

¹⁰ Ning a aposella la ulak, la atai e Iesu ana ututnala ning la ka tol tari. I ben pas la, pa la han masik uting na hanua a risana e Betsaida.

¹¹ A kunum a tarai la longori, pa la muri. I gas pas la, pa i warwara tetek la ana matanitu ane God, pa i alangolango pas la ning la sasam.

¹² Ning ka rah, ning a bonot pa pisir naur a kakak a asaerla la han teteki, pa la atai i mang, “Ur sune sen a kunum a tarai sur lar han uting na hananuala, pa na nanatar a hananuala milau, sur lar hangan pa lar borbor tingia, anasa a hanua bel ka ine.”

¹³ E Iesu i atai la mang, “Mulo ot mulor tabar la.” Pa la kelesi mange, “Dilima na bret ka pa naur a sis kane mila losi. Ngandek u mang sur milar lou pas al utna sur ir arlar ana kunum a tarai rop ne?”

¹⁴ A wawas ana tarai ka i arlar ana dilima na rip, pa gurarala pa kakakla otleng kaning.

I atongi tetek anuna kakak a asaerla mang, “Mulor sune la sur lar kes anal kunum, sur dildilima na bonot ting na ning a kunum.”

¹⁵ Pa kakak a asaerla la toli larning, pa taraila rop la kes.

¹⁶ E Iesu i kibas pas dilima na bret pa naur a sis, i tadai usaot na langit, i atong wakak pas

tetek e God onoi, i kibiki pa i sarani tana kakak a asaerla, sur lar asalar a kunum a tarai ono.

¹⁷ La rop la hangan pa la masur. Pa la song bukus pas ning a bonot pa pisir naur a rat ana mah a utna na hangan.

E Pita i warwara talapor mang e Iesu a Karisito (Matiu 16:13-19; Mak 8:27-29)

¹⁸ Ning a pukakiar, ning e Iesu ka i kes pa i araring, a kakak a asaerla la han teteki, pa i deken la mange, “A tarai la atongi mang iau esi?”

¹⁹ Pa la kelesi mange, “Dingla la atong u, e Jon a Tena Baptais. Dingla otleng la atong u, e Elaija, pa dingla otleng la atong u, ning a hal a propetla tagun nating, ning ka kamtur ulak.”

²⁰ Pa e Iesu i deken la mange, “Pa mulo, mulo atong iau o esi?” E Pita i kelesi mang, “U a Karisito ning e God i sune sen u ute.”

²¹ Pa i sairas la mang gong la atai tar tik ono.

E Iesu i warwara nigo ana nuna minat (Matiu 16:20-28; Mak 8:30–9:1)

²² E Iesu i atongi tanla mange, “A Nat a Barsan ir kilang a galis a mamahat, pa ningnigola, a leklek a tena artabarla tetek e God, pa tena asaerla tagun a warkurai lar gilam ris kusuni pa dir umkoli. Pa ana natol a pukakiar lamur, ir kamtur ulak.”

²³ Pa i atai la rop mange, “Ning tik i mang sur ir mur iau, gong i mur a nuknukna. Ir pamar anuna rakai kutus ana pukakiarla rop pa ir mur iau.

²⁴ Esining i mangan alar anuna lalaun ir hirua, ika esining i noren sen anuna lalaun sur iau, ir laun.

²⁵ Ning tik ir tong akes a ututnala rop mite na rakrakan hanua, pa ir alaulau anuna lalaun ono pa ir hirua, ir wakak mangmangasa teteki?

²⁶ Ning tik ir meme hok pa ana nuk a warwarala, a Nat a Barsan otleng ir meme ono ning ir hanot ana nuna matatar, pa matatar otleng ane Tamana pa anuna angelola.

²⁷ A atong momoli tamulo, dingla omulo ning mulo tur te, belot mulor mat, pa mulo kar oroi a matanitu ane God.”

A palaona e Iesu i ries
(*Matiu 17:1-8; Mak 9:2-8*)

²⁸ Ngandek ka siwal a pukakiar alar tar a warwara ning, e Iesu i ben pas e Pita, Jon pa e Jems, pa la han usaot na mangir sur lar araring.

²⁹ Ning kaning ot i araring, a patarna i ries, pa nuna kaenla i kokok pa i pil.

³⁰ Ono otning naur a barsan, e Moses pa e Elaija

³¹ dia hanot ana matatar, pa ditol warwara taum ma e Iesu. Ditol warwara ana minat ane Iesu, ning ir songo i saot e Jerusalem, sur ir tolsot pas a nuknuk e God.

³² E Pita ditol, ditol borbor duman. Ning ditol mata ot, ditol oroi a matatar ane Iesu, pa naur a barsan otleng kaning ditol tur taum tar.

³³ Ning naur a barsan dia mang sur diar han kusun e Iesu, e Pita i atai i mange, “Tena Asaer, i wakak ning dalar kes kama te. Mitol ar tol ir natol a turturup, takai anumi, takai ane Moses, pa takai ane Elaija”. Ika e Pita bel i tasman asaning i atongi.

³⁴ Ning kaning ot i warwara, a laukap i hanot pa i poroi alar pas la, pa ditol matmataut ning ditol kas tingui na laukap.

³⁵ Pa elngen takai misaot na laukap i atongi mang, “Ine a Natuklik, ning ia ka aslang pasi. Mulor longor tana.”

³⁶ Ning ka warwara rop, e Iesu kama kaning. Pa bel ditol warwara onoi. Pa ana pukakiarla ning, bel ditol atai tar tik ana saning ditol ka oroi tari.

*E Iesu i kepsen a mot kusun ning a kaklik
(Matiu 17:14-18; Mak 9:14-27)*

³⁷ Ana pukakiar lamur, ning e Iesu pa natol a kaklik a asaer la ka han purum misaot na mangir, a tnan kunum a tarai la han tetek e Iesu.

³⁸ Pa ning a barsan miting na kunum i arkabah mange, “Tena Asaer, a nunung u sur ur oroi a natuk barsan, takai sot ka kaklik.

³⁹ A mot i sira solongi, pa i sira kukuk kakat. A mot i sira akoloroni, pa busa i purum ting na pahana kaklik ning. A mot bel i sira han kusuni, pa i sira akanan kol a palaona.

⁴⁰ A nunung kaba anum na kakak a asaerla sur lar kepsen a mot kusuni, ika bel la tolsot pasi.”

⁴¹ E Iesu i atongi mang, “Mulo na tarai tagun onone, bel mulo tortorot, pa mulo na tena laulau. Ia ka kes bongnan iau te napirimulo. Nangse mulor tortorot? Ur ben e natumlik ute.”

⁴² Ning a kaklik i han tetek e Iesu, a mot i migen purumi utumo lapiu pa i akoloroni. Ika e Iesu i warwara rakrakai tetek a mot pa i kepseni, pa kaklik ning i langolango ulak. I saran ulaki tetek e tamana.

⁴³ Pa la rop la kulkulan ana tnan rakrakai e God.

*E Iesu i warwara ulak ana nuna minat
(Matiu 17:22-23; Mak 9:30-32)*

La rop la kulkulan ana utna ning e Iesu ka tol tari, pa i atai anuna kakak a asaerla mange,

⁴⁴ “Mulor longor wakak a warwara ne: Dir saran tar a Nat a Barsan uting na kuna taraila.”

⁴⁵ Ika a kakak a asaerla bel la talapor ana kamkama warwara ne. Di bunuri ka tanla, sur gong la tasman lalani. Pa la matmataut sur lar deken e Iesu onoi.

*Esining i leklek kol
(Matiu 18:1-5; Mak 9:33-37)*

⁴⁶ A kakak a asaerla la arlak na arpotor inla mang esi na halinla ir leklek kol.

⁴⁷ E Iesu ka tasman tar a nuknukinla, i ben pas ning a kaklik pa i aturi ting napirna.

⁴⁸ Pa i atai la mang, “Esining ir gas pas a kaklik ne ana risak, i gas pas iau. Pa esining ir gas pas

iau, i gas pas esaning i sune iau ute. Anasa esining i natarna tamulo rop, i ning i leklek kol.”

*Esining bel i sairas mulo i nangan mulo
(Mak 9:38-40)*

⁴⁹ E Jon i atai e Iesu mange, “Tena Asaer, mila oroi ning a barsan i kepsen a motla ana risam, pa mila tohoi sur milar sairasi, anasa bel a halindala.”

⁵⁰ E Iesu i kelesi mange, “Gong mulo sairasi, anasa esining bel i sairas mulo, i nangan mulo.”

A tarai Samaria bel la gas pas e Iesu

⁵¹ Ning ka milau a pukakiar sur dir los e Iesu usaot na langit, a nuknukna i rakrakai sur ir han usaot e Jerusalem, pa i turpas a tinan.

⁵² I sune dingla na tena titol, sur lar nigo tana. La hanot ana ning a hanua ting na papar Samaria, sur lar sang sur e Iesu.

⁵³ Ika a te Samariala bel la gas pasi tingia, anasa i han sur usaot e Jerusalem*.

⁵⁴ Ning naur a kaklik asaer anunai, e Jems pa e Jon dia oroi a toltol ning, dia dekeni mang, “Leklek, u mang sur miar nunung e God sur ir sune purum a iah sur ir tun arop la?”

⁵⁵ Ika e Iesu i talingir, pa i sairas diau.

⁵⁶ Pa e Iesu pa anuna kakak a asaerla la han sur uting na ning a hanua masik.

9:50: 9:50 Matiu 12:30; Luk 11:23 * **9:53: 9:53** A te Samariala bel la gas anasa e Iesu i nuki mang bel i tostos sur dir lotu tetek e God ting na rumai artabar anunlai ting na Mangir Gerasim, pa i han usaot e Jerusalem sur ir lotu. **9:54: 9:54** 2 King 1:9-16

*La ning la mang sur lar mur e Iesu
(Matiu 8:19-22)*

⁵⁷ Ning e Iesu pa anuna kakak a asaerla la han amon ting na ngas, ning a barsan i atai i mang, “Ar mur u uting na hananuala rop ning ur han ia.”

⁵⁸ E Iesu i kelesi mange, “Na rokoio na pap anunla na tung ot, pa manila otleng anunla na pios ot, ika a Nat a Barsan bel ta pukna sur ir borbor onoi.”

⁵⁹ I atai ning a barsan otleng mang, “Ur mur iau.” Ika i kelesi mange, “Leklek, ur noren sen iau kaba sur ar han, sur ar por sen tar e tata.”

⁶⁰ E Iesu i atai i mange, “Ur noren sen a minatla lar por anunla na minatla. Ur han pa ur warawai ana matanitu ane God.”

⁶¹ Ning male, i atai e Iesu mange, “Leklek, ar mur u, ika ur noren tar iau kaba sur ar han, pa milar tai taum pas onla ting na rumai ngasik.”

⁶² E Iesu i atai i mang, “Ning tik ir turpas a oma, pa i gilam utumo lamur, bel i to pas ta titol ana matanitu ane God.”

10

E Iesu i sune mais a bonot pa pisir naur a tarai

¹ Lamur a Leklek i aslang pas mais a bonot pa pisir naur a tarai otleng, pa i sune naunaur onla sur lar nigoni uting na tatatnan hanua, pa ting na nanatar a hanua, ning i otleng ir han ia.

² Pa i atai la mange, “A barim ka makos, pa i galis kol, ika bel al galis a tena sol. Mulor

nunung a Leklek, esaning a taman a barim, sur ir sune a tena solla uting na nuna barim.

³ Mulor han! Onone a sune sen mulo arlar ana barman a sipsipla ting na arpotor tana ngalngaliah na pap.

⁴ Gong mulo los ta paus na suah mani, gong ta bek, pa gong ta su. Gong otleng mulo awara tar tik ning mulor arpastek ting na ngas.

⁵ “Ning mulor kas ting na ta rumai, mulor atong nigoni mange, ‘A balmolmol tetek mulo.’

⁶ Ning ta tena balmolmol i kes tingia, anumulo a balmolmol ir kes onoi. Ning bel, a balmolmol ir ulak tetek mulo.

⁷ Pa mulor kes ot tingia ana rumai ning, mulor hangan pa mulor gang a utna ning di tabar mulo onoi, anasa i tostos sur a tena titol ir kibas ot anuna arlou. Gong mulo borbor anal rumai masak.

⁸ “Ning mulor hanot ting na ta hanua, pa di ben kas mulo, mulor ien a ututnala ning di tabar mulo onoi.

⁹ Mulor alangolango a tinsamanla, pa mulor atai a taraila mang, ‘A matanitu ane God ka milau tetek mulo!’

¹⁰ Ning mulor hanot ting na ta hanua, pa bel dir ben kas mulo, mulor tur ka ting na ngas pa mulor atongi mange,

¹¹ ‘A kubus miting na hanua ngasimulo kane na hamila, milar sah seni sur a atumarang tetek

10:3: **10:3** Matiu 10:16 **10:4:** **10:4** Matiu 10:7-14; Mak 6:8-11; Luk 9:3-5 **10:7:** **10:7** 1 Korin 9:6-14; 1 Timoti 5:18 **10:8:** **10:8** 1 Korin 10:27 **10:10:** **10:10** Aposel 13:51; 18:6

mulo. Ika mulor tasmani mang a matanitu ane God ka milau.’

¹² A atongi tamulo, ana pukakiar a warkurai, a warkurai a arkeles tetek a hanua ning ir rakrakai kol tana warkurai tetek e Sodom.”

A warkurai tetek la ning bel la lingir a nuknukinla (Matiu 11:20-24)

¹³ “Ir laulau tetek mulo a tarai Korasin, pa ir laulau otleng tetek mulo a tarai Betsaida. Ning di kar tol tar a ututnala na kulkulan ne tetek a tarai Tair pa tarai Saidon, arlar larning di ka tol tari tetek mulo, a tarai Tair pa tarai Saidon la kar lingir kapit a nuknukinla pa lar tobo, lar mermer ana kaenla na tobo pa lar sabar a palaonla ana kubus a iah. Ika mulo, bel mulo lingir a nuknukimulo.

¹⁴ A warkurai a arkeles tetek mulo a tarai Korasin pa tarai Betsaida ir rakrakai kol tana warkurai tetek a tarai Tair pa tarai Saidon.

¹⁵ Pa mulo otleng a tarai Kapernaum, mangasa, mulo nuki mang dir aleklek pas mulo usaot? Bel! Dir migen purum mulo uting na tnan iah.”

¹⁶ E Iesu i atai anuna kakak a asaerla mang, “Esining i longor mulo, i longor iau. Pa esining i puain sen mulo, i puain sen iau otleng. Pa esining i puain sen iau, i puain sen otleng esaning i sune iau ute.”

Mais a bonot pa pisir naurla la ulak

¹⁷ Pa mais a bonot pa pisir naurla, la ulak ana gasgas pa la atongi mang, “Leklek, ning mila kepsen a motla ana risam, la longor ot.”

¹⁸ Pa e Iesu i atai la mang, “A oroi e Satan i punga misaot na langit arlar ana pil.

¹⁹ Ia ka saran tar a rakrakai tamulo sur mulor pas gorgoron a soila pa radamla otleng, pa mulor tolsot pas a rakrakai ana hirua, pa bel ta utna ir alaulau mulo.

²⁰ Ika, gong mulo gas anasa a motla la longor tamulo. Mulor gas, anasa di ka tumus tar a risamulo saot na langit.”

E Iesu i gas

(Matiu 11:25-27; 13:16-17)

²¹ Ana taim ning, e Iesu i bukus ana gasgas ana Talngan Tabu pa i atongi mang, “Tata, u a Leklek saot na langit pa te na rakrakan hanua rop. Ar rakan aleklek pas u, anasa u bunur a ututnala ne kusun a tena tastasmala pa la ning la tastasman, pa u apuasa i tetek la ning la arlar ana kakakla. A momolna, Tata, u mang ot sur ir manglarning.

²² “E Tata ka saran tar a ututnala rop tak. Bel tik i tasman e Natnalik, e Tamana ka, pa bel tik otleng i tasman e Tamana, e Natnalik ka, pa la otleng ning e Natnalik i mang sur ir apuasa e Tamana tetek la.”

²³ Ning e Iesu taum ana nuna kakak a asaerla kama la kes, i talingir tetek la pa i atongi mang, “Mulo angis ning mulo oroi a ututnala ne!

²⁴ A atai mulo, a galis a propet pa galis a king la mang sur lar oroi a ututnala ning a toli na matamulo, ika bel la oroi i. Pa la mang sur lar longor a ututnala ne mulo longori, ika bel la longori.”

A warwara larlar ana wakak a te Samaria

²⁵ Ning a tena tastasmai ana Warkurai i tur pa i toho e Iesu mang, “Tena Asaer, asaning ar toli sur ar kibas a lalaun tikin?”

²⁶ Pa e Iesu i kelesi mang, “Asaning di tumus tari ana Warkuraila? Pa asaning u nuki onoi?”

²⁷ A barsan ning i kelesi mang, “Ur mang sur a Leklek anum a God ana balam rop, a ingum rop, a rakrakaim rop, pa nuknukim rop.’ *Lo 6:5* Pa ‘Ur mang sur a halim larning u mang sur u ot.’ ” *Wok Pris 19:18*

²⁸ E Iesu i atai i mang, “I tostos ot anum a warwara, ur toli larning, pa ur laun.”

²⁹ Ika i mang sur ir atostos pasi na matana e Iesu, pa i dekeni mang, “Esi a halik?”

³⁰ E Iesu i kelesi ana warwara larlar mange, “Ning a barsan i han misaot e Jerusalem utumo e Jeriko. Ning i han amon, a tena kinkinaula la han alar pasi. La kepsen anuna kaenla, la um laulau tari, pa la han kusuni pa milau ir mat.

³¹ Pa ning a tena artabar tetek e God i han ting na ngas, pa ning i oroi a barsan ning, i han liliesi ting na ris.

³² Ning a barsan kale ana mangis a tarai ane Liwai, i han tar ana barsan ning, i han liliesi ting na ris a ngas.

³³ “Ika ning a te Samaria i han amon, i han tar ana barsan ning, pa ning i oroi, i maris koli.

³⁴ I han teteki, i pek tar a wel pa wain ting na mangmangrasla ting na palaona pa i poroi alar tari. I akas pasi ana nuna dongki, pa i asirok tari ting na rumai a wasira, pa i tai alari.

³⁵ Ana pukakiar lamur tana, i los pas naur a denaria*, pa i saran tari tetek a tamana rumai, pa i atai i mang, ‘Ur tai alari. Pa ning ur tabari otleng anal utna, ning ar ulak, ar keles ulaki tetek u.’

³⁶ “Esi na halin natol a barsan a halna a barsan ning a tena kinkinaula la umi?”

³⁷ Pa tena asaer ana Warkuraila i kelesi mang, “Esaning i marisi.” Pa e Iesu i atai i mang, “Ur han pa ur toli larning.”

E Iesu i kes ting na rumai ane Maria pa e Mata

³⁸ Ning e Iesu pa nuna kakak a asaerla la han amon, la hanot ting na ning a hanua, pa ning a hane, a risana e Mata, i ben pas e Iesu uting na nuna rumai.

³⁹ Pa e tasna hane a risana e Maria, i kes milau ting na naur a hana Leklek, pa i longor anuna warwarala.

⁴⁰ Ika e Mata i molot kol ana titol na sang a utna na hangan, pa i han tetek e Iesu pa i atai i mang, “Leklek, bel u nuk pas iau? Oroi, tasik hane bel i nangan iau. Iau kama a tol a titol. Atai i sur ir nangan iau.”

⁴¹ A Leklek i kelesi mang, “Mata, Mata, u

* **10:35: 10:35** Takai a denaria i arlar ana arlou anuna tik ta barsan ana ning a pukakiar a titol. **10:39: 10:39** Jon 11:1; 12:2-3
10:41: 10:41 Matiu 6:33

nuknuk kol ana galis a utna!

⁴² Takai a utna ka, ning ur nuknuk kol suri. E Maria ka aslang pas a wakak a utna, pa bel tik ir kepseni kusuni.”

11

*A asaer ane Iesu ana niaring
(Matiu 6:9-13; 7:7-11)*

¹ Ning a pukakiar e Iesu i araring ting na ning a pukna. Ning ka araring rop, ning a halin anuna kakak a asaerla i atai i mang, “Leklek, ur asaer mila ana niaring, larning e Jon i asaer anuna kakak a asaerla.”

² Pa e Iesu i atai la mang, “Ning mulo araring, mulor atongi mange,

‘Tamamila,
i wakak ning dir hanrawai a risam.

I wakak ning anum a matanitu ir hanot.

³ Ana pukakiar rop ur tabar mila ana utna na hangan amilai.

⁴ Ur kepsen anumila na toltol laulaula, anasa mila otleng mila ka nuk duman sen anunla na toltol laulaula tetek mila.

Gong u ben mila uting na arlam.’ ”

⁵ Lamur e Iesu i atai anuna kakak a asaerla mang, “Ning tik omulo ir han tetek a halna ana tnan morom, pa ir nunungi mang, ‘Halik, a mang sur ir natol a bret.

⁶ Anasa a halik ka hanot tetek iau ana nuna tinan, pa bel al utna sur ar tabari ono.’

⁷ Pa halna ning ui ir atai i mang, ‘Gong u amolot iau! Mila ka tagar, pa mila taum ana

natnatuk mila ka borbor. Bel ma ar kamtur sur ar los tar ta utna tetek u.’

⁸ A atai mulo, ir kamtur pa ir saran tar a bret tana, bel a kamkamna mang dia halna, i kamkamna ka mang i nunung ngongosi.

⁹ “Onone a atai mulo, mulor nunung pa dir tabar mulo, mulor sereni pa mulor pasteteki, mulor pinpidir pa dir sapang pas mulo.

¹⁰ Anasa la rop ning la nunung lar kibasi, pa esining i sereni ir pasteteki, pa esining i pinpidir, dir sapang pasi.

¹¹ Esi na halimulo, ning e natnalik ir nunungi sur ta sis, ir tabari ka ana ta soi?

¹² Pa ning i nunungi sur ta kiau, ir tabari ka ana ta radam?

¹³ Mulo na laulau a tarai, ika mulo tasman ot a wakak a artabarla sur mulor tabar na natnatumulola ono. Ning mulo sira toli larne, i momol kol mang, e Tamamulo ning i kes saot na langit, ir saran a Talngan Tabu tetek la ning la nunungi.”

E Iesu pa e Belsebul

(Matiu 12:22-30; Mak 3:20-27)

¹⁴ E Iesu i kepsen a mot ning i ngat kusun ning a barsan. Ning a mot i purum kusuni, a barsan ning i ngat i bot warwara. Pa kunum a tarai la kulkulan.

¹⁵ Ika dingla na tarai onla, la atongi ka mang, “I sira kepsen a motla ana rakrakai e Belsebul, a leklek anuna motla.”

¹⁶ Dingla otleng la tohoi, la nunungi sur ir tol ta akinalang sur ir asangani mang i titol ana rakrakai e God.

¹⁷ Ika e Iesu ka tasman tar a nuknukinla, pa i atai la mang, “Ning a tarai miting na ta matanitu lar harum artalai tanla ot, a matanitu ning ir rarop. Pa ning ta kabaitamana lar harum artalai tanla ot, bel ma lar kes taum.

¹⁸ Ning e Satan ir harum taum ana nuna tena titolla, anuna matanitu ir tur rakrakai mangmangasa? A atongi larne anasa mulo atongi hok mang a kepsen ka a mot ana rakrakai e Belsebul.

¹⁹ Ning iau a kepsen a motla ana rakrakai e Belsebul, anumulo na tarai la sira kepsen la ana rakrakai esi? Mulo tasmani mang la kepsen a motla ana rakrakai e God, pa ine i asangani mang anumulo a artitiu hok i rongo.

²⁰ Ika ning a kepsen a motla ana rakrakai e God, mulor tasmani mang a matanitu ane God ka hanot tetek mulo.

²¹ “Ning ta rakrakai a barsan ka mermer pas ana nuna ututnala na harum, pa i tai alar anuna rumai, anuna ututnala lar kes wakak.

²² Ika, ning tik i rakrakai tana ir hanot teteki pa ir tolsot pasi, ir rasen anuna utnala na harum ning i tortorot onoi, pa ir kibas pas a ututnala rop anuna barsan ning pa ir sarani tan al tarai.

²³ “Esining bel i nangan iau, i sairas iau ka. Pa esining bel i nangan iau ona ben a tarai, i lu sarara la ka.

*A mot i ulak tetek a barsan
(Matiu 12:43-45)*

²⁴ “Ning ta mot ir purum kusun ta barsan, ir han uting na puknala ning bel al malum ia, sur ir manah, ika bel ir pastek ta pukna ning ir manah ia. Pa ir atongi mange, ‘Ar ulak sur anuk a rumai, ning a purum tar kusuni.’

²⁵ Ning ir hanot, ir oroi mang di ka surupu tar, pa di ka atostos tari.

²⁶ Lamur ir han pa ir ben ulak pas mais a mot, ning la laulau kol tana, pa lar kas rop ting na rumai ning, pa lar kes tingia. Pa lalaun anuna barsan ning, ir laulau kol tan anuna lalaun nating.”

La ning la angis

²⁷ Ning e Iesu kaning ot i warwara, ning a hane miting na kunum a tarai, i kukuk mange, “A hane ning i agon pas u pa i asus u, i angis.”

²⁸ Ika e Iesu i kelesi mang, “La ning la longor a warwara ane God pa la muri, la angis kol.”

*A tarai la mang sur ta akinalang
(Matiu 12:38-42)*

²⁹ Ning a kunum a tarai la bukus amon, e Iesu i atai la mang, “A tarai tagun onone, a laulau a tarai. La mang sur ta akinalang, ika bel dir tol tar tik tetek la. Dir tol ka a akinalang arlar larning di tol tari oe Jona.

³⁰ Anasa e Jona i akinalang tar tetek a tarai Niniwe, mang otleng larning a Nat a Barsan ir akinalang tar tetek a tarai tagun onone.

³¹ Ana pukakiar a warkurai, a kwin mitumo na matana tobar ir tur pa ir tiu rakrakai a tarai tagun onone, anasa i hanot miting bakbak sur ir longor a mananos ana King Solomon, pa onone, esaning i leklek ta e Solomon kanet.

³² Ana pukakiar a warkurai, a tarai Niniwe lar tur pa lar tiu rakrakai a tarai tagun onone, anasa la lingir a nuknukinla ana warawai ane Jona, ika onone esaning i leklek ta e Jona kanet.

*A talapor ana palaondala
(Matiu 5:15; 6:22-23)*

³³ “Bel tik ir asot tar ta lam pa ir bunuri, pa ir aroh alari ana paket. Ir suahi ot saot na turtur ngasna, sur la ning lar kas lar oroi a talaporna.

³⁴ Naur a matam dia arlar ana lam ana palaom. Ning naur a matam dia wakak, a palaom rop ir bukus ana talapor. Ika ning dia laulau, a palaom rop ir bukus ana mormorom.

³⁵ Ur tumarang, sakana a talapor kaning hom ir mormorom.

³⁶ Ning a palaom rop ir bukus ana talapor, pa bel ta mormorom onoi, ir talapor kol, arlar ana lam ning a talaporna i sasai hom.”

*E Iesu i tiu a Parisaiola pa tena asaerla tagun a warkurai
(Matiu 23:1-36; Mak 12:38-40; Luk 20:45-47)*

³⁷ Ning e Iesu ka warwara rop, ning a Parisaio i ben pasi sur ir hangan taum onoi. E Iesu i kas pa i kes sur diar hangan.

³⁸ A Parisaio i kulkulan, anasa i oroi mang e Iesu bel i gos nigon pas a kuna.

³⁹ A Leklek i atai i mang, “Mulo a Parisaiola mulo gos pas ka a risris a kap pa pelet, ika a balamulo i bukus ana kinkinau pa toltol laulaula.

⁴⁰ Mulo na longlongla, bel mulo tasmani mang esaning i tol a risris a ututnala i tol otleng a balanla?

⁴¹ Ika, mulor tabar a kapan a tarai ana utna kaning na kap pa pelet, sur a ututnala rop ir totoh tetek mulo.

⁴² “Ir laulau kol tetek mulo a Parisaiola. Mulo nuknuk kol ana nanatar a warkurai larne, mulo saran taktakai rakai tetek e God miting na ning a bonot a nanatar a rakai miting na barim, ning i toboh wakak, ika bel mulo tol a tostos a warkurai tetek a tarai pa bel mulo mang sur e God. I wakak ning mulor tol a tostos a warkurai tetek a tarai pa mulor mang sur e God, pa gong otleng mulo duman sen taktakai miting na ning a bonot, sur mulor sarani tetek e God.

⁴³ Ir laulau kol tetek mulo a Parisaiola, anasa mulo mang sur a keskes salanigo na rumai lotula, pa mulo mang sur a tarai lar saran a tnan hanrawai tetek mulo ting na puknala na tinan taum.

⁴⁴ Ir laulau kol tetek mulo, ning mulo arlar ana tungtung a minat ning bel ta akinalang onla, pa tarai la han saot onla anasa bel la tasmani.”

⁴⁵ Ning a halin a tena asaerla tagun a warkurai i keles e Iesu mang, “Tena Asaer, ning u atongi larne, u atong laulau mila otleng.”

46 Pa e Iesu i kelesi mang, “Ir laulau kol otleng tetek mulo a tena asaerla tagun a warkurai, anasa mulo saran a mamahat a warkuraila sur a tarai lar muri, ika mulo ot bel mulo nangan la.

47 Ir laulau kol tetek mulo, anasa anumulo na mangis a tarai ot tagun nating la umkol tar a propetla, pa mulo sira awakak a kulam a minatla anunla.

48 I maining mulo apuasa mulo mang mulo malmaling taum ana numulo na mangis a tarai tagun nating ana nunla titol, anasa la umkol a propetla, pa mulo, mulo awakak a kulam a minatla anunla.

49 I maining, e God, esaning i tastasman kol, i atongi mang, ‘Ar sune a propetla pa aposella tetek a tarai, pa tarai lar umkol halala onla, pa al tarai otleng lar akadik la.’

50 I maining mulo, a tarai tagun onone, dir saran a warkurai a arkeles tetek mulo sur a suluk a propetla rop, ning di umkol tar la, turpasi ana kamkama rakrakan hanua.

51 Turpasi ning di umkol e Abel pa i han tuk oe Sekaria, esaning di umkoli na arpotor a logo na tun artabar pa rumai artabar. Momol, a atai mulo, dir saran a warkurai a arkeles tetek a tarai tagun onone ana ututnala rop ne.

52 Ir laulau kol tetek mulo a tena asaerla tagun a warkurai, anasa mulo kepsen sen a ki na taman a tastasman. Mulo ot bel mulo kas tingui, pa mulo sairas la ning la mang sur lar kas.”

53 Ning e Iesu i purum utumo lapiu, a tena asaerla tagun a warkurai pa Parisaiola la balakut pa la deken ngalngaliah i ana galis a

kabah.

⁵⁴ Pa la kes nanan e Iesu sur ta ngas a warwara sur lar tiwi onoi.

12

*E Iesu i atumarang la kusun a asasongo
(Matiu 10:26-27)*

¹ Ning a riprip a tarai la ka hanot taum, pa la sugut artalai la, e Iesu i atai nigon anuna kakak a asaerla mang, “Mulor tumarang ana is anuna Parisaiola. A warwara ana nunla na toltol a asasongo.

² A ututnala rop ning di polpol alar tari, lamur lar kes puasa, pa ututnala ning la kes kumna, lamur dir tasmani.

³ Asaning mulo ka atong tari ana mormorom, lamur dir longori ana kabakiar, pa asaning mulo wasisik ka onoi tingui taum tik, lamur dir tur saot na rumai, pa dir atong puasai.

*Mulor matmataut ka sur e God
(Matiu 10:28-31)*

⁴ “A atai mulo na halalik: Gong mulo matatan la ning la umkol ka a palaondi. Ning la ka tol tari larning, bel lar tolsot sur lar tol ulak ta utna.

⁵ Ika ar atai talapor mulo o esaning mulor matmataut suri: Mulor matatan esaning a rakrakaina i itna sur ir umkol mulo pa lamur ir migen otleng a ingumulo ting na tnan iah. Momol, a atai mulo, e God ka, ning mulor matmataut suri.

⁶ Di sira lou dilima na tek ana naur a toia ka, gepi? Ika e God bel i duman ta halinla.

⁷ I momol kol, e God ka tasman naisa rop a hih a pukulumulo. Gong mulo matmataut, mulo itna kol na matana e God tana galis a tekla.

Esining i atong puasa e Iesu pa esining i puain seni (Matiu 10:32-33; 12:32; 10:19-20)

⁸ “A atai mulo mang, esining ir atong puasai na matana tarai mang, i tagun iau, a Nat a Barsan otleng ir atong puasai na matan a angelola ane God mang i tagun iau.

⁹ Ika esining ir puain sen iau na matan a tarai, a Nat a Barsan otleng ir puain seni na matan a angelola ane God.

¹⁰ Esining ir atong tar ta laulau a warwara ana Nat a Barsan, e God ir kepsen anuna toltol laulau ning, ika esining ir atong laulau a Talngan Tabu, e God bel ir kepsen anuna toltol laulau ning.

¹¹ Ning la dat pas mulo sur a warkurai ting na rumai lotula, pa na matan a tena warkuraila pa ningnigola, gong mulo matmataut sur asa mulor warwara alar mulo onoi pa asa mulor atongi.

¹² Anasa ana pukakiar ning, a Talngan Tabu ot ir asaer mulo ana saning mulor atongi.”

A warwara larlar ana barsan ning i gongon

¹³ Ning tagun a kunum a tarai i atai e Iesu mang, “Tena Asaer, ur atai a tasiklik sur ir asauran a gongonla omiau, ning e tamamiau i mat kusun tari.”

¹⁴ Pa e Iesu i kelesi mang, “Lak, esi i suah tar iau sur ar tena warkurai sur ar asauran anumu na gongon omu?”

15 Pa i atai la, “Mulor tumarang, pa mulor tai alar mulo kusun a nuknuk ana galis a gongon, anasa a lalaun anuna tik bel i kamkamna ana nuna galis a gongon.”

16 Pa i atai la ana ning a warwara larlar mange, “A barim anuna ning a tena gongon i wai pa i suah a galis a wanala.

17 Pa ka nuki mang, ‘Asa ar toli? Anasa bel ma ta pukna ning ar suah a utna na hangan tingia.’

18 Pa ka atongi mang, ‘Ar toli mange, ar regen anuk na rumaila ning a sira suah taum a ututnala ono, pa ar tol al tatatnan, sur ar suah a utna na hangan pa anuk na gongon tingia.

19 Pa ar atai a inguk mange, “Inguk, anum a gongon i galis kol sur al galis a rau. Ur manah, ur hangan, ur gang pa ur gas.” ’

20 Ika e God i atai i mange, ‘U a longlong! Onone na morom, ur mat! Esi ir kibas a gongon ning u ka sang tari sur u?’

21 Ir manglarning tetek la ning la gongon tetek la ot, ika bel la gongon na matana e God.”

A tortorot oe God (*Matiu 6:25-34*)

22 E Iesu i atai anuna kakak a asaerla mang, “I maining a atongi tamulo mang, gong mulo nuknuk kol ana numulo a lalaun mang asaning mulor ieni, pa ana palaomulo otleng mang asa mulor mermer ono.

23 Anasa a lalaun i itna tana utna na hangan, pa palaomulo otleng i itna tana kaenla.

²⁴ Mulor oroi a kotkotla. Bel la oman tar ta utna, pa bel la sol tar al utna, bel al rumai a gongon anunlai, ika e God i tabar la. Pa mulo, mulo itna kol tana manila.

²⁵ Esi tamulo ning i nuknuk kol ana nuna lalaun, ir tolsot sur ir tugus barah siklik anuna lalaun? Bel tik.

²⁶ Ning bel mulo tolsot pas a siklik utna ne, sur asaning mulo nuknuk kol sur al ututnala otleng?

²⁷ “Mulor oroi a wakak a purpurla misa na bual, mang la gomo mangmangasa. Bel la sira titol pa bel la sira tol kaen. Ika a atai mulo, e King Solomon ot ning anuna mermer rop i tai wakak, ika bel i tai wakak arlar ana purpurla ning.

²⁸ E God i amermer a ulai sakas na bual ana wakak a purpurinla, ning anone i tapalas, pa latu dir tun seni ting na iah. Ning i toli larning ana ulai, i momol kol mang ir amermer mulo otleng. Anumulo a tortorot i natarna kol.

²⁹ Gong mulo tai sur asaning mulor ieni, pa asaning mulor gangi, pa gong mulo nuknuk kol onoi.

³⁰ Anasa a taraila mite na rakrakan hanua ning bel la tasman e God, la rakrakai sur a ututnala rop ning, ika e Tamamulo i tasmani mang mulo kapan sur a ututnala.

³¹ Mulor rakrakai sur anuna matanitu, pa ir tabar mulo otleng ana ututnala ne.

*A gongonla saot na langit
(Matiu 6:19-21)*

³² “A natar a liur a sipsip, gong mulo matmataut, anasa e Tamamulo i gas sur ir saran a matanitu tetek mulo.

³³ Mulor siuran sen anumulo na gongonla sur ta mani, pa mulor tabar a kapan a taraila onoi. Mulor sang pas al paus anumulo ning bel ir marot, a gongonla saot na langit ning bel ir rarop, pa bel ta tena kinkinau ir han milau i, pa koropos bel ir alaulau i.

³⁴ Anasa ting na hanua ning anumulo a gongonla kaning ia, anumulo a lalaun otleng kaning ia.

A tena titolla ning la sang

³⁵ “Mulor mermer pa mulor asot anumulo na lamla, pa mulor kes na sang kama.

³⁶ Pa mulor arlar ana tena titolla ning la harnanai sur anunla leklek ning ir ulak kusun a ngasa ana tona tintaulai. Ning ir hanot pa ir pinpidir, dir sapang kapit pasi.

³⁷ Ning a leklek ir hanot, pa anuna tena titolla la sang, lar angis. A momolna ot ne a atongi tamulo, ir mermer pas sur ir suk a utna na hangan, pa ir akes la ting na logo na hangan pa ir tabar la.

³⁸ Ning ir hanot ana tnan morom, o ana lar, pa ir pastetek la ning la sang suri, a tena titolla ning lar angis.

³⁹ Mulor tasmani mang: Ning a tamana rumai ir tasmani nangse a tena kinkinau ir hanot, bel ir noren anuna rumai sur dir kinau i.

⁴⁰ Mulo otleng, mulor sang, anasa a Nat a Barsan ir hanot nangse ning bel mulo nuki mang ir hanot.”

A momol a tena titol pa tena titol ning bel i momol (Matiu 24:45-51)

⁴¹ E Pita i deken e Iesu mang, “Leklek, u warwara larlar omila ka o ana taraila rop?”

⁴² A Leklek i kelesi mange, “A tena titol ning i momol ana nuna titol pa i tastasman otleng, anuna leklek ir akes tari sur ir ningnigo ting na nuna rumai, sur ir tabar a tena titolla ana utna na hangan anlai ana taim na hangan.

⁴³ A tena titol ning, ir angis ning anuna leklek ir hanot pa ir oroi i ning i tolsot pas anuna titolla.

⁴⁴ A atong momoli tamulo, anuna leklek ir suahi sur ir tena tai alar ana nuna ututnala rop.

⁴⁵ “Ika ning a tena titol i nuki mang anuna leklek bel ir hanot kapit, pa i turpasi sur ir um a tena titol a barsanla pa tena titol a gurarala, pa ir hangan, pa ir gang pa ir sipak,

⁴⁶ anuna leklek ir hanot ana pukakiar ning a tena titol ning bel ir tasmani pa ana awa ning bel i nuki mang ir hanot ono. Pa leklek ir ting kutkutusi, pa ir saran tar a warkurai a arkeles teteki, sur ir kes taum ana tabun longorla.

⁴⁷ “A tena titol ning ka tasman tar a nuknuk a leklek anunai, ika bel i sang, pa bel i titol arlar ana nuknuk a leklek anunai, dir miras koli.

⁴⁸ Ika a tena titol ning bel i tasman a nuknuk a leklek anunai, pa i tol a utna ning bel i tostos, dir miras sikliki ka. Pa tetek esining di saran a tnan

tana, dir mang sur al galis ot tana, pa esining di saran a galisna tana, dir atai i ot sur ir kelesi anal galisna.

*A keskes sarara
(Matiu 10:34-36)*

⁴⁹ “A hanot sur ar atna tar a iah te na rakrakan hanua, pa a mang kol suri ning ka sot.

⁵⁰ A baptais* kaning ot ning dir baptais iau onoi, pa onone a los a tnan mamahat tuk ning ir rarop.

⁵¹ Mangasa, mulo nuki mang a hanot sur ar saran a balmolmol te na rakrakan hanua? Bel! A hanot sur a taraila lar taptapagal sarara.

⁵² Turpasi onone, dilima onla ting na ning a rumai lar tapagal, natol kusun naur, pa naur kusun natol.

⁵³ Lar tapagal sarara, a barsan kusun e natna barsan, pa kaklik barsan kusun e tamana, a hane kusun e natna hane, pa kaklik hane kusun e tana, pa ning naur a tubuna diar balakut artalai tetek diau.”

*A tarai bel la tastasman ana ututnala ning i hanot onone
(Matiu 16:2-3)*

⁵⁴ E Iesu i atai a kunum a taraila mang, “Ning mulor oroi a bual ir aturi toui na matana labur, mulor atong kapiti mang, ‘Milau a kiar kar punga,’ pa i momol ot.

⁵⁵ Ning a tobar ir wuwut, mulor atongi mang, ‘A Kamis kar rakrakai,’ pa i momol ot.

12:50: 12:50 Mak 10:38-39 * **12:50: 12:50** A baptais ning e Iesu ir kibasi a kamkamna mang a mamahat pa kankan ning e Iesu ir kilangi. **12:53: 12:53** Maika 7:6

⁵⁶ Mulo na tena asasongo! Mulo tastasman sur mulor pak a tatatai te na rakrakan hanua pa misaot na bakut. Mangmangasa ning bel mulo tastasman sur mulor pak a kamkama ututnala ning i hanot ana pukakiarla ne?

Ur baltaum ana num a hirua
(*Matiu 5:25-26*)

⁵⁷ “I mangasa ning mulo ot bel mulo nuknuk wakak sur asaning i tostos?

⁵⁸ Ning tik ir suah tar u ana warkurai, ur rakrakai sur mur baltaum ting na numu a tinan, sakana ir dat pas u tetek a tena warkurai, pa tena warkurai ir saran tar u tetek a tena tai alar, pa tena tai alar ir akas tar u ting na karabus.

⁵⁹ A atai u, bel ur purum tuk ot ning ur saran a ararop a toia ana num a arlou.”

13

Mulor lingir a nuknukimulo sakana mulor hirua

¹ Ana pukakiar ning, dingla na tarai la atai e Iesu ana dingla na tarai Galili ning e Pailat i umkol la, ning kaning ot la tun artabar tetek e God.

² E Iesu i keles la mang, “Mangasa, mulo nuki mang la laulau tana tarai Galili rop, anasa la hirua manglarne?

³ Bel! Ika a atai mulo, ning bel mulo lingir a nuknukimulo kusun anumulo na toltol laulaula, mulo otleng mulor hirua rop.

⁴ “Pa asaning mulo nuki ana ning a bonot pa pisir siwal a tarai saot e Jerusalem ning a rumai

leklek tumo e Siloam i taroh pa i umkol arop la? Mangasa, la laulau tanla ning la kes saot e Jerusalem rop?

⁵ Bel! Ika a atai mulo, ning bel mulo lingir a nuknukimulo kusun anumulo na toltol laulaula, mulo otleng mulor hirua.”

A warwara lalar ana rakai a fig ning bel ta wana

⁶ Lamur e Iesu i atong a warwara lalar ne tetek la, “Ning a barsan anuna rakai a fig i tur potor ting na barim a wain anunai. I han pa i tai sur ta wana, ika bel i pastetek tik.

⁷ Lamur i atai a tena tai alar ana barim, ‘Ana natol a rau ne a tol panai sur ta wana rakai a fig ne. Ting seni! Anasa i tur alalar.’

⁸ Ika a tena tai alar i kelesi mang, ‘Leklek, ur noreni ning a rau kale ne, sur ar tol talapori, pa ar kel pori.

⁹ Ning ir wai ana rau ning lamur, ir wakak. Ning bel, ur ting seni.’ ”

E Iesu i alangolango pas ning a hane ana Pukakiar Sabat

¹⁰ Ana ning a Pukakiar Sabat e Iesu i asaer a taraila ting na ning a rumai lotu.

¹¹ Ning a hane i kes tingia, a mot kaning onoi. A intauruna i talugun ning a bonot pa pisir siwal a rau, pa bel i tolsot sur ir tur tostos.

¹² Ning e Iesu i oroi, i atongi mang, “Lak, u ka langolango kusun anum a tinsaman.”

¹³ Pa e Iesu i suah naur a kuna saot onoi, aiap ka a hane ning i tur tostos, pa i aleklek pas e God.

¹⁴ A ningnigo tagun a rumai lotu i balakut, anasa e Iesu i alangolango pas a hane ana Pukakiar Sabat. Pa i atai a taraila mang, “Diono na pukakiar kaning sur dir titol. Mulor hanot onoi, sur dir alangolango mulo, ika a Pukakiar Sabat gong.”

¹⁵ A Leklek i kelesi mang, “Mulo na tena asasongo! Mulo rop taktakai, mulo sira pak sen anumulo a bulumakau o a dongki kusun anuna rumai, pa mulo ben purumi ana Pukakiar Sabat sur ir gang.

¹⁶ A hane ne miting na mangis a tarai ane Abaram, e Satan i dot tari ning a bonot pa pisir siwal a rau. Asa kamkamna ning bel dir pak sen a inau ne kusuni ana Pukakiar Sabat?”

¹⁷ Ning i atong tari larne, la rop ning la lingir a titol ane Iesu, la meme, ika a kunum a tarai la gas ana wakak a ututnala ning e Iesu i toli.

*A warwara larlar ana pat a mastad pa is
(Matiu 13:31-33; Mak 4:30-32)*

¹⁸ E Iesu i deke mang, “A matanitu ane God i arlar ana sa? Esi na warwara larlar ar atongi sur ar papak ana matanitu ane God?”

¹⁹ I arlar ana pat a mastad, ning takai a barsan i kibas pasi, pa i oman tari ting na nuna barim. I gomo, pa i hanot a rakai, pa manila la sira tol pios saot na rakrakana.”

²⁰ E Iesu i deke ulak mang, “Esi na warwara larlar ar atongi sur ar papak ana matanitu ane God?”

²¹ I arlar ana is ning a hane i kibas pasi pa i tol taumi ana tnan palawa, pa palawa rop i bubus onoi.”

A natar a taman lik
(*Matiu 7:13-14, 21-23*)

²² Ning e Iesu i han amon usaot e Jerusalem, i asaer a taraila ting na tatatnan hanua pa na nanatar a hanua.

²³ Pa takai i deken e Iesu mang, “Leklek, mangmangasa, al siklik tarai ka e God ir alaun pas la?” Pa i atai la mang,

²⁴ “Mulor rakrakai kol sur mulor kas ana natar a taman lik, anasa a galis a tarai lar tohoi sur lar kas onoi ika bel lar tolsot pasi.

²⁵ A tamana rumai ir tur pa ir tagar alar a taman, pa mulor tur tumo lapiu, mulor pinpidir ting na taman pa mulor atongi mang, ‘Leklek, sapang pas mila.’ Ir keles mulo mang, ‘Bel a tasman mulo pa mulo mitaha.’

²⁶ Lamur mulor atai i mang, ‘Mila hangan pa mila gang taum hom, pa u sira asaer ting na numila na hananuala.’

²⁷ Ika ir keles mulo mang, ‘Bel a tasman mulo pa mulo mitaha. Mulo na tena laulau rop, mulor han masik kusun iau.’

²⁸ Dir kepsen purum mulo, pa ning mulor oroi e Abaram, Aisak pa e Jekop pa propetla ana matanitu ane God, mulor tangtangis, pa mulor arngingit ngesemulola tingia.

²⁹ Pa taraila lar han miting na matana tobar pa matana labur, lar kes ana ngasa ting na matanitu ane God.

³⁰ Oroi, dingla na tarai ning onone la mur, lar nigo, pa dingla ning onone la nigo, lar mur.”

E Iesu i maris e Jerusalem
(*Matiu 23:37-39*)

³¹ Ana pukakiar ning, dingla na Parisaio la hanot tetek e Iesu, pa la atai i mang, “Ur han mite sur ta hanua masak, anasa e Herot i mang sur ir umkol u.”

³² E Iesu i keles la mang, “Mulor han pa mulor atai a rokoio na pap ning mange, onone pa latu ar kepsen a motla pa ar alangolango a taraila, pa ana pukakiar lanigo ar arop anuk a titol ono.

³³ Ar han onone pa latu pa ana pukakiar lamur tana pukakiar latu, anasa bel ta propet ir hirua ting na ta pukna masak, ir hirua ka saot e Jerusalem.

³⁴ “Jerusalem, Jerusalem, u ning u sira umkol a propetla, pa la ning di sune la tetek u, u sira wolot amat la ka ana hatatla. A galis a pukakiar a mang sur ar kibas taum na natnatum tetek iau, arlar ana kakaruk ning i roroh alar na natnatna nahai naur a dehelna, ika bel mulo mang.

³⁵ Oroi! Anumulo a hanua ir hanot a hanua bel. A atai mulo, bel mulor oroi ulak iau tuk ning mulor atongi mang, ‘Esaning i hanot ana risan a Leklek i angis.’ ” *Buk Song 118:26*

14

E Iesu i alangolango pas ning a barsan

¹ Ana ning a Pukakiar Sabat, e Iesu i kas sur ir hangan ting na rumai ana ning a ningnigo anuna Parisaiola, pa taraila la oroi sursuri sur ta utna ning ir toli.

² Pa ning a barsan i sasam, a palaona i sursurung, i kes tar salanigo ta e Iesu.

³ E Iesu i deken a tena asaerla tagun a warkurai pa Parisaiola mange, “Mangasa, i tostos ana warkurai sur dir alangolango a taraila ana Pukakiar Sabat o bel?”

⁴ Ika bel la kelesi. E Iesu i tong pas a barsan ning, i alangolango pasi, pa i sune seni.

⁵ Pa e Iesu i deken la mang, “Esi na halimulo ning e natnalik o anuna ta bulumakau ir punga tar uting na ta tung a malum ana Pukakiar Sabat bel ir dat kas kapit pasi?”

⁶ Pa bel la keles sot pas anuna kabah.

Ur anatarna pas u, pa ur maris a kapan a tarai

⁷ Ning e Iesu i kes ana utna na hangan ne, i oroi a taraila ning la hanot, la aslang pas ot a keskes salanigo. Pa i atong ning a warwara larlar tetek la mange,

⁸ “Ning tik ir ben pas u uting na ngasa ana tona tintaulai, gong u kes ana ngasa salanigo, sakana ir ben pas tik ning i leklek hom.

⁹ Pa esaning i arbebe ana ngasa ir hanot pa ir atai u mang, ‘Ur kes pisir kusun a barsan ne.’ Pa ur han ana meme sur a keskes tumo lamur.

¹⁰ Ning di ben pas u, ur han pa ur kes ana keskes tumo lamur, sur esaning i arbebe ir hanot tetek u, pa ir atai u mang, ‘Halik, ur tur pa ur han ute lanigo.’ Pa dir aleklek pas u na matanla ning mulo kes taum ana utna na hangan.

¹¹ Anasa esining i aleklek pasi, e God ir anatar na i. Pa esining i anatar na pasi, e God ir alekleki.”

¹² Lamur e Iesu i atai a Parisaio ning i ben pasi sur a utna na hangan mange, “Ning u mang sur ur sang a utna na hangan, gong u ben pas na halalim, na tastasimla, na maimla, pa leklekla ning la kes milau u. Anasa la ne lar ben pas u pa lar kelesi tetek u.

¹³ Ika, ning u sang a utna na hangan, ur ben ka a kapan a tarai, la ning a palaonla i mat, la ning la kaukawar ka, pa kutla.

¹⁴ Ning ur toli larne ur angis. Anasa bel al utna na hangan anlai sur lar kelesi tetek u, e God ir kelesi tetek u ana pukakiar ning a tena tostosla lar laun ulak.”

A warwara larlar ana tnan ngasa (Matiu 22:1-10)

¹⁵ Ning a halinla ning la hangan taum oe Iesu i longor a warwarala ne, i atai i mang, “La ning lar hangan ana ngasa ting na matanitu ane God, la angis.”

¹⁶ Pa e Iesu i atai i mang, “Ning a barsan i sang a tnan ngasa, pa i atai a galis a tarai sur lar hanot.

17 Ning a pukakiar ana ngasa ka hanot, i sune anuna tena titol oros tetek la, ning di ka atai nigon tar la ana warwara mange, 'Mulor han ute, anasa a ututnala ka sang rop.'

18 Ika la rop la warwara alalar la ka. A ningnigona i atongi ka tana mang, 'Ia ka lou tar a puka kabalapiu sur a barim. Ar han par oroi. A nunung u sur dir noren iau kama.'

19 Pa ning otleng i atongi mang, 'Ia ka lou tar ning a bonot a bulumakau, ar han sur ar toho la. A nunung u sur dir noren iau kama.'

20 Pa ning otleng ka atongi mang, 'Onone ia ka taulai, pa bel ar tolsot sur ar han.'

21 "Pa tena titol oros i ulak pa i atai anuna leklek ana warwarala ning. A leklek ning i balakut, pa i atai anuna tena titol oros mang, 'Ur han kapit uting na tatatnan ngas pa uting na nanatar a ngas ting na hanua, pa ur ben pas a kapan a taraila, la ning a palaonla i mat, a kutla, pa la ning la kaukawar ka.'

22 Lamur a tena titol oros i atongi mang, 'Leklek, ia ka tol tar a ututnala rop ning u sune iau sur ar toli, ika dingla na pukna kaning ot na rumai.'

23 A leklek i atai a tena titol oros mang, 'Ur han sur a tatatnan ngas pa nanatar a ngas ting na bual, pa ur angongos pas a taraila sur lar kas, sur anuk a rumai ir bukus.'

24 A atai mulo, bel tik ta halinla, ning di atai nigon tar la, ir hangan ana nuk a ngasa.' "

A warwara larlarla o esining i mang sur ir mur e

Iesu
(*Matiu 10:37-38*)

²⁵ A tnan kunum a tarai la armuri taum oe Iesu. I talingir tetek la pa i atai la mang,

²⁶ “Ning tik i mang sur ir mur iau, ika i katnan e tamana, pa e tana, anuna hane pa na natnatna, na tastasna pa anuna lalaun otleng, pa bel i katnan kol iau, ai bel anuk a kaklik a asaer.

²⁷ Esining bel i pamar pas anuna rakai kutus pa i mur iau, bel i sot sur ir hanot anuk a kaklik a asaer.

²⁸ “Ning tik ta halimulo i mang sur ir tol ta tnan rumai, ir kes kaba pa ir tol otnan nigon a matana rumai rop, sur ir tasmani mang anuna mani ir sot sur ir arop a rumai o bel.

²⁹ Sakana ir tol tar ka a kama rumai, pa bel ir tolsot sur ir aropi. Pa taraila rop ning la oroi, lar morot onoi

³⁰ mang, ‘A barsan ne i tol tar ka a kama rumai, ika bel i tolsot sur ir aropi.’

³¹ “Ning ta king, ning a bonot a rip a tarai a harum ir han ana harum sur ning a king otleng anuna naur a bonot a rip a tarai a harum, i wakak sur a king ning anuna ning a bonot a rip ir kes pa ir nuknuk nigo larne, la to pas naur a bonot a rip o bel.

³² Ning bel ir tolsot, ir sune anuna tena titolla, sur lar atostos warwara taum ana king, ning kaning ot bakbak, sur a balmolmol ir kes.

³³ Mang otleng larning, ning tik ta halimulo bel i noren sen tar anuna ututnala rop, ai bel anuk a kaklik a asaer.

A sol ning bel i to pas ta utna
(*Matiu 5:13; Mak 9:50*)

³⁴ “A sol i wakak, ika ning a makmakana ka rop, dir amakmakan ulak mangmangasa pasi?”

³⁵ Bel i to pas ta titol ting na barim pa bel i awakak otleng a kabalapiu, dir migeni kama. Esining a talngana kaning, i wakak ning ir longor ono.”

15

A warwara larlar ana sipsip ning i rongo
(*Matiu 18:12-14*)

¹ Ning a pukakiar a tena los totokomla pa tena tol a toltol laulaula la hanot tetek e Iesu sur lar longori.

² Ika a Parisaiola pa tena asaerla tagun a warkurai la ururai oe Iesu mang, “A barsan ne i lasan ka taum ana tena tol a toltol laulaula, pa i hangan taum onla.”

³ Pa e Iesu i atong a warwara larlar tetek la mange:

⁴ “Ning tik ta halimulo anuna ta mar a sipsip, pa ta halinla i rongo, i mangasa, bel ir han kusun a siuk a bonot pa pisir siuk ting na pukna ning la hangan ia, pa ir tai sur takai ning i rongo, tuk ning ir pasteteki?”

⁵ Ning kar pastek pasi, ir pamar pasi, pa ir gas.

⁶ Ning ir ulak onoi, ir kabah taum na halalna pa la ning la kes milau, pa ir atai la mang, ‘Dalar gas, anasa ia ka pastetek ulak pas anuk a sipsip ning i rongo.’

⁷ A atai mulo, i mang otleng larning saot na langit a gasgas ana ning a tena tol a toltol laulau ning ka lingir a nuknukna. Momol, di sira gas ana siuk a bonot pa pisir siuk ning la ka tostos tar, pa bel la kapan sur lar lingir a nuknukinla. Ika, ning ta tena tol a toltol laulau ka lingir a nuknukna, a gasgas ning, ir itna kol tana gasgas ana siuk a bonot pa pisir siuk.

A warwara larlar ana mani ning i rongo

⁸ “Ning ta hane anuna ir takai a bonot a mani, pa i arongon takai. Mangmangasa, bel ir asot pas a lam, pa ir surupu a rumai, pa ir tai wakak suri, tuk ning ir pasteteki?”

⁹ Ning kar pastetek pasi, ir kabah taum pas na halalna pa la ning la kes milau, pa ir atai la mang, ‘Dalar gas, anasa ia ka pastetek ulak pas takai a mani ning a arongon tari.’

¹⁰ A atai mulo, mang otleng larning a gasgas na arpotor ana angelola ane God anasa ning a tena tol a toltol laulau ka lingir a nuknukna.”

A warwara larlar ana kaklik ning i han kusun e tamana

¹¹ E Iesu i atongi mange, “Ning a barsan naur a natna barsan.

¹² Pa murmur i atai e tamana mang, ‘Tata, ur saran tar anuk a tiniba miting na num a gongon.’ Pa e tamandiau i asauran anuna gongon tetek diau.

¹³ Naisa na pukakiar alar tari, a murmur i suah taum pas anuna gongon rop, pa i han uting na hanua kaning bakbak, pa i arop tar anuna gongon ana ngas a lalaun ning bel i wakak.

14 Ning ka arop sen tari, a tnan munurak i hanot ting na hanua ning, pa i murak.

15 Pa i han, pa i titol tetek ning a barsan ting na hanua ning. Pa barsan ning i sune i sur anuna woroh na boroi sur ir tabar la.

16 I mang sur ir masur ana palpal a utna ning a boroila la ienieni, ika bel tik i tabari.

17 “Ning a wakak a nuknuk ka hanot teteki, i atongi mang, ‘A tena titolla ane tata, la sira hangan pa la sira masmasur pas ka kusun a ututnala, ika iau, kane ia ka mat murak!’

18 Onone ar kamtur pa ar han ulak tetek e tata. Ar atai i mange, “Tata, ia ka tol tar a toltol laulau tetek e God pa tetek u otleng.

19 Bel a wakak sur ur atong iau e natumlik. Ur suah iau kama sur ar arlar ana num a tena titol.”’

20 Pa i kamtur pa i ulak tetek e tamana.

“Kaning ot bakbak, e tamana i oroi pasi, pa i bukus ana marmaris. I dun teteki, i pos pasi pa i goro i.

21 Pa e natnalik ka atai i mang, ‘Tata, ia ka tol tar a toltol laulau tetek e God pa tetek u otleng. Bel a wakak sur ur atong iau e natumlik.’

22 Ika e tamana i atai anuna tena titolla mang, ‘Aiap! Mulor kibas kapit pas ta kaen ning i wakak kol ute, pa mulor apipisi ono. Mulor suah a ring ting na kuna, pa naur a su ting na naur a hana otleng.

23 Mulor han, mulor dat pas ta nat a bulumakau ning i butbut ute, mulor umkoli, pa dalar hangan pa dalar gasgas taum.

²⁴ Anasa a natuklik ne ka mat, pa onone ka laun ulak, i rongo tar pa ne ka hanot.’ Pa ngasa i turpasi.

²⁵ “Ika e natnalik, ning a ningnigo, kanisaot na barim. Ning i hanot utumo lahanua milau a rumai, ka longor a tinangis a goto pa saksak a tortor,

²⁶ pa i kabah pas ning a tena titol, pa i dekeni ana saning i hanot.

²⁷ Pa i kelesi mang, ‘E tasimlik ka hanot, pa e tamam i umkol pas a nat a bulumakau ning i butbut sur lar tol a ngasa onoi, anasa dia tai taum ulak ana wakak a lalaun.’

²⁸ Pa ningnigo na tasnalik i balakut, pa i ngongoio, bel i mang sur ir kas. Pa e tamana i purum teteki, pa i amoro pasi.

²⁹ Ika i atai e tamana mang, ‘Oroi! A galis a rau a titol tetek u arlar ana tena titol, bel a tabun longor ana num a warkuraila. Ika bel u tabar iau ana ta natar a meme, sur mila taum ana halalikla milar gasgas taum ono.

³⁰ Ika ning e natumlik ne i hanot, esaning i alaulau anum a ututnala ana laulau a gurarala, u umkol pas ot a nat a bulumakau ning i butbut sur ir ieni.’

³¹ E Tamana i kelesi mange, ‘Natuklik, u kanet u kes napirik, pa anuk na gongon rop, anumi ka.

³² I wakak sur dalar gasgas pa dalar hangan, anasa e tasimlik ne ka mat pa onone ka laun ulak, i rongo tar, pa onone ka hanot ulak.’ ”

16

A warwara larlar ana tena tai alar ning i

tastasman

¹ E Iesu i atai anuna kakak a asaerla mang, “Ning a tena gongon, anuna ning a tena titol i tai alar anuna ututnala, pa di tiwi mang i tol oros ka a ututnala ana ningnigo anunai.

² A tena gongon i kabah pasi, pa i dekeni mang, ‘Asa ne a longori hom? Ur tumus a warwara talapor ana num a titol na tai alar pa ur sarani tak, anasa bel ur tena tai alar ulak ma anuki.’

³ Pa tena tai alar ning i nuki mang, ‘Asaning ar toli, ning anuk a leklek ir kepsen tar iau kusun a titol ne? A palaok bel i rakrakai sur a kekel, pa ar meme otleng sur ar nunung utna.

⁴ I maining, a nuk pas ning a utna sur ar toli, sur a tarai lar gasgas pas iau ot ting na nunla na rumaila, ning dir kepsen iau kusun a titol ne.’

⁵ Pa i arsune sur la rop ning la ka dinau pas tan anuna leklek. Pa i deken a ningnigo na barsan mang, ‘Naisa ning u dinau pasi tan anuk a leklek?’

⁶ Pa i kelesi mange, ‘Takai a mar a tatatnan koto na wel a oliw.’ Pa tena titol i atai mang, ‘Ur los pas anum a paka buk a dinau. Ur kes pa ur tumus kapit tar dilima na bonot ka onoi.’

⁷ Pa i deken male takai, ‘Naisa ning u dinau pasi?’ Pa i kelesi mange, ‘Takai a mar a bek a wit.’ Pa i atai i, ‘Ur los pas anum a paka buk a dinau. Ur tumus tar siwal a bonot ka onoi.’

⁸ “Anuna ningnigo i aleklek pas a tena titol ning i asongo pasi, anasa i tastasman kol sur ir alah kusun a mamahat. Anasa a taraila mite na rakrakan hanua, la tastasman kol ana urmatana

ngas ana nunla na titol, ika a taraila miting na talapor bel la tastasman kol onoi.

⁹ A atai mulo, mulor amoro pas al halalimulo ana gongon mite na rakrakan hanua, sur ning ka rop, e God ir gasgas pas mulo ting na rumaila ning lar kes tikin pa bel lar rarop.

¹⁰ “Esining i momol ana natar a utna ka, ir momol otleng ana tnan utna, pa esining bel i momol ana natar a utna, bel ir momol otleng ana tnan utna.

¹¹ Ning bel mulo momol sur mulor tai alar wakak a ututnala mite lapiu, esi ir tortorot omulo sur mulor tai alar a ututnala misaot?

¹² Ning bel mulo momol ana ta utna anun tik, esi ir saran ulak anumulo na ututna tetek mulo?

¹³ Bel ta tena titol ir titol sot pas tetek ir naur a ningnigo. Ir nget ning a halindiau, pa ir mang sur ning a halindiau, ir katnan ning pa takai ir saran a kaba hina kusuni. Bel mulor titol sot pas tetek e God pa tetek a mani otleng.”

*A Warkuraila ane God bel ir rarop
(Matiu 5:31-32; 19:9; Mak 10:11-12)*

¹⁴ A Parisaiola la longor a warwarala ne, pa la morot oe Iesu, anasa la mang sur a mani.

¹⁵ Pa e Iesu i atai la, “Mulo, mulo atostos pas mulo na matana taraila. Ika e God i tasman a balamulo. Anasa a utna ning i itna na matana taraila i bilbilor na matana e God.

¹⁶ “A Warkuraila pa asaerla anuna propetla i tuk tar oe Jon. Turpasi ana pukakiarla ning, mila warawai ana Wakak a Warwara ana matanitu

ane God pa taraila rop la ngongos sur lar kas tingia.

¹⁷ Bel i ngangaten sur a langit pa rakrakan hanua diar rarop, ika i ngangaten kol sur ta diah warwara ir rarop kusun a Warkuraila.

¹⁸ “Ning tik ir kepsen anuna hane, pa ir taulai ta hane ulak, a barsan ning i tol a toltol laulau. Pa esining ir taulai ta hane ning anuna barsan i kepseni, i otleng ka tol a toltol laulau.

E Lasarus pa gongon a barsan

¹⁹ “Ning a gongon a barsan, i sira mermer ana wakak a kaenla, pa i sira hangan wakak ana pukakiarla rop.

²⁰ Di aborbor tar takai a barsan a tena nunung utna ting na taman tana, a risana e Lasarus, a palaona i masmasik.

²¹ I mang sur ir ien a mumut a utna na hangan ning i punga miting na logo na hangan ana leklek. Pa papla la damdam otleng a masmasikla ting na palaona.

²² “Lamur a tena nunung utna i mat, pa angelola la los pasi pa la akesi ting na ris e Abaram. Pa gongon a barsan kale i mat, pa di por seni.

²³ Pa i kes ana tnan iah. I kankan kol a palaona pa i tadai usaot, i oroi e Abaram i bakbak kol, pa e Lasarus otleng ting na risna.

²⁴ Pa i arkabah mange, “Tata Abaram, ur maris iau, ur sune e Lasarus sur ir tuk pas al siklik malum ana pitlai a kuna sur ir akotkoto tar a

laigerek onoi, anasa a kilang a tnan kankan kol te na iah.’

²⁵ “E Abaram i kelesi mang, ‘Natuklik, ur nuk pasi, ning kaning ot u laun, u kibas anum a wakak a ututnala, pa mang otleng larning tetek e Lasarus, i kibas a laulau a ututnala. Ika onone, i kibas a gasgas, pa u, u kilang a tnan kankan kol.

²⁶ Ning a utna otleng, a tnan lawa kane na arpotor indala. Bel tik mite ir tolsot pasi sur ir han uting tetek mulo, pa bel tik otleng miting ir tolsot pasi sur ir han ute tetek mila.’

²⁷ “Pa tena gongon ning i atongi mange, ‘Tata, a nunung u sur ur sune e Lasarus uting na rumai ane tata.

²⁸ Anasa dilima na tastasik barsan la kaning ia, pa ir atumarang tar la, sakana la otleng lar han ute na hanua na kankan ne.’

²⁹ Pa e Abaram i kelesi mange, ‘A warwara ane Moses pa propetla kaning i kes taum onla. I wakak sur lar longori.’

³⁰ A tena gongon ning i atai i mang, ‘Bel, Tata Abaram, ning tik ning ka kamtur ulak kusun a minat ir hanot tetek la, lar lingir a nuknukinla.’

³¹ Pa e Abaram i kelesi mang, ‘Ning bel la longor e Moses pa propetla, bel tik otleng, ning ir kamtur kusun a minat ir tolsot sur ir atur anunla tortorot.’”

17

Dalar nuk duman sen a toltol laulau anuna tik (Matiu 18:6-7, 21-22; Mak 9:42)

¹ E Iesu i atai anuna kakak a asaerla mange, “A ututnala ir hanot ot, ning ir apungan a taraila

ana toltol laulau, ika ir laulau kol tetek esaning i tol otnan a ututnala ne pa i ben rongon tik ta halinla.

² Ning dir dot tar ta tnan hat ting na ruana tik ning i toli lerne, pa dir migen murungi saladasi a warkurai a arkeles ning i natarna ka. Ika esaning ir apungan tik miting na kakakla ne ana toltol laulau, e God ir saran a tnan warkurai a arkeles kol tana.

³ “Mulor tai alar mulo! Ning e tasimlik ir tol ta toltol laulau, ur warwara rakrakai teteki, pa ning ka lingir a nuknukna, ur nuk duman sen anuna rongo.

⁴ Ning i tol a toltol laulau tetek u mais a taim ana ning a pukakiar, pa i han tetek u mais a taim pa i atai u mang, ‘Ia ka tol tar a toltol laulau tetek u. Onone a lingir a nuknukik.’ Ur nuk duman sen anuna rongo.”

A tortorot

⁵ A aposella la atongi tana Leklek, “Ur aitna anumila tortorot.”

⁶ Pa Leklek i atongi mang, “Ning anumulo a tortorot i natarna arlar ana pata mastad, mulor tolsot pasi sur mulor atai a rakai ne mang, ‘Ur takakan, pa ur tur tisa latasi!’ pa ir longor ka.

A titol anuna tena titol

⁷ “Ning tik ta halimulo anuna tena titol i bair pas, o i tai alar a sipsipla, ning ir ulak kusun a barim, mangasa, ur atai i mang, ‘Ur han kakat ute, ur kes pa ur hangan?’ Bel ur toli lerne.

⁸ Ur atai i mange, ‘Ur sang angak a utna na hangan, pa ur sang sur ur malngan iau, ning ar hangan pa ar gang. Pa lamur u kale ur hangan pa ur gang.’

⁹ Bel ir atong wakak tetek a tena titol, anasa i tolsot pas ka anuna titol.

¹⁰ Mang otleng larning tetek mulo, ning mulo ka tolsot pas a ututnala ning di saran tari tamulo, mulor atongi mang, ‘Bel mila tostos sur dir aleklek pas mila. Mila na tena titol oros ka, mila tolsot pas ka anumila a titol.’ ”

E Iesu i alangolango pas ning a bonot a lepra

¹¹ Ning e Iesu i han amon usaot e Jerusalem, i han ting na arpotor naur a papar, Samaria pa e Galili.

¹² Ning i hanot ting na ning a hanua, la arsongo ana ning a bonot a barsan ning la lepra. La tur bakbak tar ot,

¹³ pa la kukuk rakrakai mange, “Iesu, Leklek, ur maris mila.”

¹⁴ Ning e Iesu i oroi la, i atai la mang, “Mulor han, mulor asangan mulo tetek a tena artabarla tetek e God.” Ning la han amon, la langolango kakat.

¹⁵ Ning na halinla ning i oroi mang ka langolango, i ulak, pa i aleklek pas e God ana tnan elngena.

¹⁶ Pa i kes ana bokona hana milau naur a hana e Iesu pa i atong wakak teteki. A barsan ne a te Samaria.

17 E Iesu i dekeni mang, “Bel di alangolango pas ning a bonot omulo rop? Siuk otleng la kanaha ma?”

18 I mangasa ning bel tik i ulak sur ir aleklek pas e God? A wasira lik ka ne i ulak.”

19 Pa i atai i mang, “Ur kamtur, pa ur han. Anum a tortorot ka alangolango pas u.”

A tinan ot ana matanitu ane God
(*Matiu 24:23-28, 37-41*)

20 Dingla na Parisaio la deken e Iesu mang, “Nangse a matanitu ane God ir hanot?”, pa i keles la mang, “A matanitu ane God bel ir hanot taum ona akinalangla ning dir oroi.

21 Pa bel dir atongi mang, ‘I ma ine!’ o, ‘I ma i ning!’ Anasa a matanitu ane God kaning ot omulo.”

22 E Iesu i atai anuna kakak a asaerla, “A pukakiar ir hanot ning mulor mang sur mulor oroi ta pukakiar ana pukakiarla anuna Nat a Barsan, ika bel mulor oroi.

23 Al tarai lar atai mulo mange, ‘I ot no!’ o, ‘I ka ine!’ Gong mulo mur la.

24 Anasa ana pukakiar a tinan ot anuna Nat a Barsan, a taraila rop lar oroi. Ir arlar ana pil, ning i ienieni mito na ris a puka solsolna, tuk ting na ning a ris otleng.

25 Ika a Nat a Barsan ir kilang nigon a galis a mamahat, pa taraila tagun onone lar gilam ris kusuni.

26 “A pukakiarla anuna Nat a Barsan ir arlar ana pukakiarla ane Noa.

²⁷ A taraila la hangan, la gang, pa la ataulai la, tuk ana pukakiar ning e Noa i kas ana sip, pa kiar i punga pa lomom i hanot pa la hirua rop.

²⁸ Mang otleng larning ana pukakiarla ane Lot. A taraila la hangan, pa la gang, la lolou, pa la sisiurai, la oman utna, pa la tol rumai.

²⁹ Ika ana pukakiar ning e Lot i han kusun a hanua Sodom, a iah pa salfa i punga misaot na langit arlar ana kiar, pa la rop la hirua onoi.

³⁰ “Ir mang otleng larning ana pukakiar ning a Nat a Barsan ir hanot talapor onoi.

³¹ Ana pukakiar ning, ning tik ir kes saot na nuna rumai, gong i purum sur ir los pas anuna ututnala tingui na rumai. Mang otleng larning, ning tik ir kes ting na barim, gong i ulak utumo lahanua sur ta utna.

³² Mulor nuk pas a hane ane Lot.

³³ Esining i mang kol sur ir mangan alar anuna lalaun, ir hirua. Ika esining i noren sen anuna lalaun, ir laun.

³⁴ A atai mulo, ana morom ning ir naur diar borbor ana ning a mat, dir kibas pas ta halindiau, pa ning a halindiau bel.

³⁵⁻³⁶ Ning ir naur a hane otleng diar miren a wit, dir kibas pas ta halindiau, pa ning a halindiau bel.”*

³⁷ Pa kakak a asaerla la dekeni mang, “Leklek, a ututnala ne ir hanot tahaia?” Pa i keles la

17:28: 17:28 Stat 18:20; 19:25 **17:31: 17:31** Matiu 24:17-18

17:33: 17:33 Luk 9:24 * **17:35-36: 17:35-36** Dingla na tena tastasmai ana Buk Tabu la nuki mang dingla na warwara otleng i kes te na ves ne. I mange: *Ning ir naur a barsan diar titol ting na barim, dir los pas ka ta halindiau, pa ning a halindiau bel.*

mang, “A pukna ning a minat i borbor tingia, a kotkotla lar han taum tingia.”

18

A warwara larlar ana lao pa tena warkurai

¹ E Iesu i warwara ana warwara larlar tetek anuna kakak a asaerla sur ir asaer la sur lar araring bolbolos pa gong la ngoro.

² I atongi mang, “Ning a tena warkurai i kes ting na ning a hanua, bel i matmataut sur e God, pa bel i nuk pas a taraila.

³ Ning a lao miting na hanua ning, i han liklik ka teteki, pa i sira nunungi mang, ‘Ur atostos tar iau kusun anak a hirua.’

⁴ Ka bongnani pa bel i longor tana, pa lamur i nuki mang, ‘Bel a matmataut sur e God, pa bel a sira nuk pas a taraila,

⁵ ika, ar atostos a lao ne, anasa i atikidis kol iau, sakana ir angoro iau ana nuna tinan ot ute.’ ”

⁶ A Leklek i atongi tanla, “Mulor longor a warwara ne anuna tena warkurai ning bel i tostos.

⁷ I mangasa, e God bel ir atostos anuna tarai a aslang, ning la tangis teteki ana kamis pa morom otleng? I mangasa, ir molmolot pa bel ir atostos kapit la?

⁸ A atongi tamulo, ir atostos kapit la. Ika, ning a Nat a Barsan ir hanot, i mangmangasa, ir pastek pas ot al tarai ning la tortorot ono te lapiu?”

A warwara larlar ana Parisaio pa tena los totokom

⁹ E Iesu i atong a warwara larlar ne tetek la ning la tortorot pas ot onla, mang la na tena tostos, pa la nuk natarna pas a tarai rop.

¹⁰ “Naur a barsan dia han usaot na rumai artabar sur diar araring. Ning a halindiau a Parisaio, pa ning a halindiau otleng a tena los totokom.

¹¹ A Parisaio i tur pa i araring ot mange, ‘God, a atong wakak tetek u anasa bel a arlar ana taraila rop, a tena kinkinaula, a tena tol orosla, pa taraila ning la tol a toltol laulau ana gurarala, pa bel a arlar otleng ana tena los totokom ne.

¹² A sira tamai naur a pukakiar ana ning a wik, pa sira saran taktakai miting na ning a bonot ana ututnala ning a sira tol otnan pasi.’

¹³ Ika a tena los totokom i tur masik tar, bel i tadai usaot na langit, anasa i meme. I dapis ka a malwasna ana balmaris, pa ka atongi mang, ‘God, ur maris iau, iau a tena tol a toltol laulau.’

¹⁴ A atongi tamulo, a barsan ne, ning i ulak sur anuna rumai, i ka tostos na matana e God, pa ning a halindiau bel. Anasa esining i aleklek pasi, e God ir anatarna i. Ika esining i anatarna pasi, e God ir alekleki.”

La sairas a kakakla kusun e Iesu (Matiu 19:13-15; Mak 10:13-16)

¹⁵ A tarai la los a kakak betbetela tetek e Iesu sur ir suah naur a kuna saot onla. Ika ning anuna kakak a asaerla la oroi i, la sairas la.

¹⁶ Ika e Iesu i kabah pas a kakakla teteki, pa i atongi mange, “Mulor noren sen a kakakla sur lar han tetek iau. Gong mulo sairas la, anasa a matanitu ane God anunla ning la manglarne.

¹⁷ A atong momoli tamulo, ning tik bel ir kibas a matanitu ane God arlar ana kaklik, bel ir tolsot sur ir kas tingia.”

A gongon a barsan

(Matiu 19:16-30; Mak 10:17-31)

¹⁸ Ning a ningnigo i deken e Iesu mang, “Wakak a Tena Asaer, asaning ar toli sur ar kibas a lalaun tikin?”

¹⁹ E Iesu i kelesi mang, “Asa kamkamna ning u atong iau mang a wakak? Bel tik i wakak, e God ka.

²⁰ U tasman a warkuraila: ‘Gong u tol a toltol laulau ana ta hane anuna tik o ta barsan anuna tik, gong u umkol tik, gong u kinkinau, gong u artitiu asasongo, ur hanrawai e tamam pa e tnam.’ ”

Kisim Bek 20:12-16

²¹ A barsan ning i kelesi mang, “Turpasi ning a kaklik ot tuk onone, a sira mur a warkuraila rop ne.”

²² Ning e Iesu i longori, i atongi tana, “Ning a utna ot u kapan suri. Ur siuran sen anum a ututnala rop, pa mani onoi, ur tabar a kapan a tarai ono. Ning ur toli larne, anum a wakak a gongon kanisaot na langit. Lamur ur han ute pa ur mur iau.”

²³ Ning i longor a warwara ne i balmaris kol, anasa anuna gongon i galis kol.

²⁴ E Iesu i tai teteki pa i atongi mang, “I ngangaten kol tetek a tena gongonla sur lar kas ting na matanitu ane God!

²⁵ Ir ngangaten sur a kamel ir kas ting na mosol a sur a susuk, ika i ngangaten kol tetek a tena gongon sur ir kas ting na matanitu ane God.”

²⁶ Ning la longor a warwara ne, la deke mang, “Manglarning, esi ma ning dir alauni?”

²⁷ E Iesu i keles la mang, “Asaning a tarai bel lar tolsoti, e God ir tolsoti.”

²⁸ E Pita i atongi tana mang, “Oroi, mila ka han kusun anumila na ututnala rop, pa mila mur u.”

²⁹ E Iesu i atongi tanla mang, “A atong momoli tamulo, ning tik ir han kusun anuna rumai, o kusun anuna hane, o na tastasna, o kusun e tana, o e tamana, o na natnatna, kamkamna ana matanitu ane God,

³⁰ ana lalaun onone ir kibas a galis kol ana tarai pa utna ka han pas kusuni. Pa ana lalaun lamur dir tabari ana lalaun tikin.”

A munatol a warwara ane Iesu ana nuna minat (Matiu 20:17-19; Mak 10:32-34)

³¹ E Iesu i ben maskan pas anuna ning a bonot pa pisir naur a kakak a asaer, pa i atongi tanla mang, “Oroi, onone dala han amon usaot e Jerusalem, pa dir tolsot pas a ututnala rop ning a propetla la ka tumus tari ana Nat a Barsan.

³² Anasa dir saran tari tetek la ning bel a tarai Juda. Lar morot laulau ono, lar atong laulau i, lar namisi, lar mirasi, pa lar umkoli.

³³ Pa ana natol a pukakiar lamur ir kamtur ulak.”

³⁴ A kakak a asaerla bel la talapor ana ututnala rop ne. A kamkamna i kes mumun kusun la, pa bel la tasman asaning i warwara ono.

*E Iesu i apalpalas pas a kut
(Matiu 20:29-34; Mak 10:46-52)*

³⁵ Ning e Iesu i han milau e Jeriko, ning a barsan a kut i kes tar ting na ris a ngas, i sira nunung utna.

³⁶ Ning i longor a kunum a tarai la han milau amon, i deke mang, “Asaning?”

³⁷ Pa la atai i mang, “E Iesu a te Nasaret i han bolos dala.”

³⁸ Pa i kukuk mang, “Iesu, Nat e Dewit*, ur maris iau.”

³⁹ Pa la ning la nigo la sairasi sur ir kes wowowon. Ika i arkabah rakrakai kol mang, “Nat e Dewit, ur maris iau.”

⁴⁰ E Iesu i tur suai, pa i arsune sur dir ben pasi teteki. Ning ka han milau teteki, i dekeni mang,

⁴¹ “Asaning u mang sur ar toli hom?” I kelesi mang, “Leklek, a mang sur ar tai.”

⁴² Pa e Iesu i atai i mang, “Ur tai! Anum a tortorot ka alangolango pas u.”

⁴³ Ono otning ka tai, pa i mur e Iesu, pa i atong aitna pas e God. Pa tarai rop otleng ning la oroi, la rakan aleklek e God.

19

E Sakias pa e Iesu

18:34: 18:34 Mak 9:32 * **18:38: 18:38** A tarai Juda la atong a Mesaia mang a Nat e Dewit.

¹ E Iesu i kas tumo e Jeriko, pa i han bolos sur usaot e Jerusalem.

² Ning a barsan i kes tingia, a risana e Sakias, a ningnigo anuna tena los totokomla, pa i gongon kol.

³ I mang kol sur ir oroi e Iesu, ika e Sakias a potpot a barsan ka, pa bel i tolsot pasi sur ir oroi i, anasa a kunum a tarai la tur alar pasi.

⁴ Pa i dun usa lanigo, pa i abit kas ana rakai, sur ir oroi e Iesu, anasa ir han bolos ting na ngas ning.

⁵ Ning e Iesu i hanot tingia, i tadai usaot na rakai, pa i atongi tana mang, “Sakias, ur purum kapit ute. Anone ar kes taum hom ting na rumai ngasim.”

⁶ Pa i purum kapit, pa i ben pas e Iesu uting na rumai ngasna ana gasgas.

⁷ Ning a tarai rop la oroi, la ururai mang, “A barsan ne i han sur ir kes taum ana tena laulau ting na nuna rumai.”

⁸ E Sakias i tur pa i atongi tana Leklek mang, “Oroi, Leklek, ning a tuk ana nuk a gongon, ar tabar a kapan a taraila ono, pa ning ia kar asongo pas ta utna tana tik, ar mundiat na kelesi teteki.”

⁹ Pa e Iesu i atongi ta e Sakias mang, “Ono otne, e God i alaun la ning la kes te na rumai ne, anasa e Sakias otleng mitingia na mangis a tarai ane Abaram.

¹⁰ Anasa a Nat a Barsan i hanot sur ir tai sur la ning la rongo pa ir alaun pas la.”

19:7: 19:7 Luk 15:2 **19:8: 19:8** Kisim Bek 22:1; Namba 5:6-7
19:9: 19:9 Aposel 16:31; Luk 13:16 **19:10: 19:10** Luk 15:4; Jon 3:17; 1 Timoti 1:15

*A warwara larlar ana tena titol orosla ning di
saran tar a mani tetek la
(Matiu 25:14-30)*

¹¹ A tarai la longor a warwarala ne, pa la nuki mang a matanitu ane God ir hanot kapit, anasa e Iesu ka milau e Jerusalem. Pa i atong otleng ning a warwara larlar

¹² mang, “Ning a ningnigo ka sang sur ir han uting na hanua kaning bakbak, sur dir malmaling tari sur ir king, pa lamur ir ulak.

¹³ Lanigo ana nuna tinan, i kabah pas anuna ning a bonot a tena titol oros teteki pa i saran tar taktakai tuk a mani tanla, pa i atongi mang, ‘Mulor aitna i, tuk ning ar ulak.’

¹⁴ Ika a taraila miting na nuna hanua la ngeti, pa la sune sen dingla na tarai sur lar muri, pa la atongi mang, ‘Bel mila mang sur a barsan ne ir king anumila i.’

¹⁵ “Ning di ka akes tari sur ir king, i ulak. I arsune sur anuna tena titol orosla ning i saran tar a mani tanla, sur ir tasman asaning ka hanot ana anunla a titol ana mani.

¹⁶ Pa ningnigona i han teteki pa i atongi mang, ‘Leklek, anum a mani ia ka tol tar ning a bonot saot onoi.’

¹⁷ A leklek i atongi tana mang, ‘Wakak kol, u a wakak a tena titol oros! Ar suah tar u sur ur ningnigo ana ning a bonot a tatatnan hanua, anasa u momol ana natar a utna.’

¹⁸ Pa munaurna i han teteki pa i atongi mang, ‘Leklek, anum a mani ia ka tol tar dilima saot onoi.’

19 Pa leklek i atongi tana mang, ‘U otleng ur ningnigo ana dilima na tatatnan hanua.’

20 Ning a tena titol oros kale i han teteki pa i atongi tana mang, ‘Leklek, anum a mani kane ulak ma, a poroi tari ana kaen pa suah wakak tari.’

21 A matatan u, anasa u a tena ngalngaliah. U los a utna ning bel anumi, pa u sol a utna ning bel u oman tari.’

22 A leklek i atongi tana mang, ‘U a laulau a tena titol oros, ar warkurai u arlar ana num a warwara ot. U ka tasmani mang iau a tena ngalngaliah. A los a utna ning bel anuki, pa sol a utna ning bel a oman tari.’

23 Sur asaning bel u suah tar anuk a mani ting na beng sur ning ar hanot, ar kibas pas anuk a mani pa ta tuk otleng saot ono?’

24 “Lamur i atongi tanla ning la tur tingia mang, ‘Mulor los sen a mani kusuni, pa mulor sarani tetek esaning anuna ning a bonot.’

25 Pa la atongi tana mang, ‘Leklek, anuna ning a bonot a mani kaning ma.’

26 I keles la mang, ‘A atongi tamulo, esining i tong akes a galis, dir tabar ulaki ana galis. Ika esining bel i tong akes ta utna, dir kepsen otleng anuna siklik utna kusuni.’

27 “ ‘Ika mulor ben pas anuk a hiruala ning bel la mang sur ar king anunla, pa mulor umkol la ot te na matak.’ ”

*E Iesu i han usaot e Jerusalem arlar ana king
(Matiu 21:1-11; Mak 11:1-11; Jon 12:12-19)*

28 Ning e Iesu ka atong tar a warwara larlar ne, i nigo usaot e Jerusalem.

29 Ning i han milau e Betpage pa e Betani ting na mangir di atongi a Mangir Oliw, i sune naur miting na kakak a asaerla, ana warwara mang,

30 “Mur han uting na hanua kaning lanigo tamu. Ning mur han kas, mur han tar ana ning a barman a dongki kaning di dot akes tari, belot tik i kes tar ono. Mur pak seni pa mur beni ute.

31 Ning tik ir deken mu mang, ‘Asaning mu paki suri?’ mur atongi mang, ‘A Leklek i mang suri.’ ”

32 Dia han pa dia pastek pas a ututnala rop ning e Iesu ka atong tari tandiau.

33 Ning dia pak a barman a dongki la ning anunla, la deken diau mang, “Asaning mu pak sen a barman a dongki ning suri?”

34 Dia keles la mang, “A Leklek i mang suri.”

35 Pa dia ben pas a barman a dongki tetek e Iesu, pa dia kepsen anundiau naur a saket, pa dia suahi saot na palai a dongki pa dia akes tar e Iesu saot onoi.

36 Ning i han amon, dingla na tarai la sagen anunla na saket ting na ngas.

37 Ning ka milau a ngas ning i sel purum ana Mangir Oliw, a tnan gasgas i los a tarai a asaerla rop pa la rakan aleklek pas e God ana tnan elngenla ana ututnala na kulkulan ning la ka oroi pa la kukuk mang,

38 “A king ning i hanot ana risan a Leklek i angis!

Buk Song 118:26

A balmolmol saot na langit, pa matatar saot
tetek e God!”

³⁹ Dingla na Parisaio ting na kunum a tarai la atongi mang, “Tena Asaer, ur sairas anum a tarai a asaer.”

⁴⁰ Pa e Iesu i keles la mang, “A atongi tamulo, ning a taraila ne bel lar kukuk, a hatatla ot lar kukuk.”

E Iesu i tangis sur e Jerusalem

⁴¹ Ning e Iesu i han milau e Jerusalem i oroi i, pa i tangis suri, pa i atongi,

⁴² “A mang sur mulor tasman a ngas ning ir to pas a balmolmol onone. Ika i mumun kusun mulo!

⁴³ Ta pukakiar ir hanot, pa anumulo na hirua lar tur talilis anumulo a hanua, lar atur a woroh talilis alar mulo, lar tur alar anumulo na ngas a kaskas pa purpulum, pa lar um mulo kusun a risrisnala.

⁴⁴ Pa lar regen gingini sen a rumrumai, pa lar umkol mulo taum ana natnatumulo otleng ning mulo kes tingia. Pa bel lar noren sen tar ta hat ir borbor saot on ta hat, anasa bel mulo tasman lalan a taim ning e God ka hanot tetek mulo.”

E Iesu i kepsen a tena sisiuraila miting na rumai artabar

(Matiu 21:12-17; Mak 11:15-19; Jon 2:13-22)

⁴⁵ E Iesu i kas uting na woroh na rumai artabar, pa i lu purum sen la ning la sisiurai.

⁴⁶ Pa i atongi tanla mang, “Di ka tumus tari ting na Buk Tabu mang, ‘Dir atong anuk a rumai ana rumai a niaring.’”

Aisaia 56:7

Ika mulo ka tol lingir pasi sur ir arlar ana ‘pukna na mumun ana tena kinkinaula.’ ” *Jeremaia 7:11*

⁴⁷ E Iesu i asaer a tarai ting na rumai artabar ana pukakiarla rop. Ika a leklek a tena artabarla tetek e God, pa tena asaerla tagun a warkurai pa ningnigo anuna taraila, la nuknuk sur ta ngas ning lar umkoli ono.

⁴⁸ Ika la nuknuk panai tar sur ta utna ning lar toli, anasa a taraila rop la mang kol sur a warwarala ane Iesu.

20

Di kabah ana rakrakai ning e Iesu i sira titol ono (Matiu 21:23-27; Mak 11:27-33)

¹ Ning a pukakiar, ning e Iesu i asaer a tarai ting na woroh na rumai artabar, pa i warawai ana Wakak a Warwara, a leklek a tena artabarla tetek e God, pa tena asaerla tagun a warkurai, pa ningnigola la han teteki.

² Pa la atongi tana mang, “Ur atai mila, esi na ngas a rakrakai ning u tol a ututnala ne ono? Esi i saran a rakrakai ne tam?”

³ E Iesu i keles la mang, “Iau otleng ar deken mulo ana ning a kabah. Mulor atai iau.

⁴ Mitaha a rakrakai ning e Jon i baptais a tarai ono? Misaot na langit, o tana tarai ka?”

⁵ Pa la warwara artalai tanla mang, “Ning dalar atongi mang, ‘Misaot na langit,’ ir keles dala ka mang, ‘Sur asaning bel mulo tortorot onoi?’

⁶ Ika ning dalar atongi mang, ‘Tan a tarai,’ a tarai rop lar wolot kol dala ana hatatla, anasa la tortorot oe Jon mang i a propet.”

⁷ La kelesi mang, “Bel mila tasmani mitaha.”

⁸ Pa e Iesu i atongi tanla mang, “Iau otleng bel ar atai mulo ana rakrakai ning a sira tol a ututnala ne ono.”

A warwara larlar ana tarai a titolla ting na barim a wain

(Matiu 21:33-46; Mak 12:1-12)

⁹ E Iesu i atong a warwara larlar ne tetek a tarai, “Ning a barsan i oman tar a barim a wain, pa lamur i sarani kaba tana dingla na tena titol sur lar tai alari, pa i han uting na ning a hanua masak, pa i kes bongnan pasi tingia.

¹⁰ Ning a kalang ka sot sur dir git taum a wana wain, i sune sen ning a tena titol oros tetek a tena titolla, sur lar saran al wana wain miting na barim sur anunai otleng. Ika a tena titolla la umi, pa la sune ulak oros seni.

¹¹ I sune ulak ning a tena titol oros tetek la, pa la umi otleng, la ame tari, pa la sune ulak oros seni.

¹² Lamur i sune a munatol a tena titol oros, la um laulau tari, pa la kepsen seni.

¹³ Pa taman a barim a wain i atongi mang, ‘Asa ma ning ar toli? Ar sune sen a natuklik, ning a katnani, ngandek lar hanrawai i.’

¹⁴ Ika ning a tena titolla la oroi pasi, la warwara taum mang, ‘Esaning ir keles e tamana, i ma ine ot. Dalar umkoli, sur anundalai ma a barim a wain.’

15 Pa la migen purum seni kusun a barim, pa la umkoli.

“Asaning a taman a barim ir toli onla?

16 Ir hanot pa ir umkol a tena titolla, pa ir saran tar a barim tetek al tarai masik.” Ning la longor a warwara ne, la atongi mang, “Gong i hanot larne!”

17 Pa e Iesu i oroi la, pa i atongi mang, “Ning mulo nuki larne, asa kamkama warwara ne di ka tumus tari ting na Buk Tabu?

‘A hat ning na tena tol rumai la kepseni,
i ot ning a wakak a hat kes, ning di tol a
rumai saot ono.’ *Buk Song 118:22*

18 La rop ning la punga tar ana hat ne, lar tagingini, ika esining a hat ne ir punga tar ono, ir tamire arlar ana kubus.”

19 A tena asaerla tagun a warkurai pa leklek a tena artabarla tetek e God la tai sur ta ngas sur lar tong akes kapit pas e Iesu, anasa la tasmani mang i atong ka a warwara larlar ne onla. Ika la matatan a taraila.

A kabah ana totokom
(*Matu 22:15-22; Mak 12:13-17*)

20 A tena asaerla tagun a warkurai pa leklek a tena artabarla tetek e God la ngoson murmuri, pa la sune sen dingla na tarai sur lar batnani pa lar asongo mang la a momol a taraila. Pa la kes longoroi sur ta warwara ning ir atongi sur lar tiwi ono pa lar saran tari nahai a warkurai pa rakrakai anuna ningnigo tagun a matanitu Rom.

21 Pa la atongi mang, “Tena Asaer, mila tasmani mang i tostos anum a warwara pa anum a asaer. Bel u purpurngis tetek a taraila, pa u asaer la ana ngas ane God ana momol.

22 I mangasa, i tostos sur dir lou a totokom tetek a Sisar* o bel?”

23 E Iesu ka tasman sen anunla a asasongo, pa i atongi tanla mang,

24 “Mulor asangan iau ana ta mani. A manar pa tumtumus ne onoi an esi?” Pa la kelesi mang, “Anuna Sisar.”

25 Pa i atongi tanla mang, “Asaning anuna Sisar mulor sarani tetek a Sisar, pa saning ane God mulor sarani otleng tetek e God.”

26 Pa bel la tolsot sur lar asobori ana matana tarai ana nuna warwarala. La kulkulan ana nuna warwara na arkeles, pa bel ma ta warwara inla.

*A kabah ana lalaun ulak kusun a minat
(Matiu 22:23-33; Mak 12:18-27)*

27 Dingla na Sadusi, ning la sira puai ka mang bel ta lalaun ulak kusun a minat, la han tetek e Iesu, pa la dekeni mang,

28 “Tena Asaer, e Moses i tumus tari tetek dala mang, ning ta barsan ir mat pas kusun anuna hane, pa bel ta natundiau, e tasnalik ir ben pasi pa ir taulai i, sur ir aitna tar al kakakla ana risana e tasnalik ning ka mat.

29 Ning a kabaitas, mais a barsan rop ka. A ningnigona i taulai, pa i mat pas kusun anuna hane, pa bel ta natundiau.

* **20:22: 20:22** A Sisar a tnan ningnigo ana matanitu Rom, pa tarai Israel otleng la kes nahai anuna warkurai.

³⁰ Pa murmur tana maleng i taulai a hane ning, pa i le i mat ka kusuni.

³¹ Lamur a munatolna le. I arlar larning tetek mais la rop, la taulai i, la mat rop ka, ika a hane ning bel i agon tar ta kaklik tanla.

³² Pa lamur a hane otleng i mat.

³³ Ana lalaun ulak kusun a minat, a hane ning anun esi na halinla? Anasa mais la rop la ka taulai pas onoi.”

³⁴ E Iesu i atongi tanla mang, “A tarai tagun a raula ne la tautaulai,

³⁵ ika a tarai ning la tostos sur lar kamtur ulak kusun a minat, pa lar laun ana lalaun lamur, bel lar taulai ulak.

³⁶ Pa bel lar mat ulak, anasa la arlar kama ana angelola. La na natnat e God, anasa la ka laun ot kusun a minat.

³⁷ Ning a Buk Tabu i warwara ana rakai ning i irnga, e Moses i asangani mang a minatla lar kamtur ulak, anasa i atong a Leklek mang, ‘A God ane Abaram, a God ane Aisak pa God ane Jekop.’

Kisim Bek 3:6

³⁸ E God bel a God ana minatla, a God anun la ning la laun, anasa la rop la laun na matana.”

³⁹ Pa dingla na tena asaerla tagun a warkurai la atongi mang, “Tena Asaer, anum a warwara i wakak kol.”

⁴⁰ Pa bel ulak ma tik i deken e Iesu ana ta kabah, anasa la matmataut.

*A Karisito a Leklek ane Dewit
(Matiu 22:41-46; Mak 12:35-37)*

⁴¹ E Iesu i atongi tanla, “Sur asaning di atongi mang a Karisito a nat e Dewit?”

⁴² Anasa e Dewit ot i atongi ana Saksakla ting na Buk Tabu mang,

‘A Leklek i atongi tetek anuk a Leklek†,

“Ur kes te na sot a kuk,

⁴³ tuk ning ar tolsot pas anum na hiruala

sur lar kes nahaim.” ’ *Buk Song 110:1*

⁴⁴ E Dewit i atong a Karisito mang anuna Leklek. Manglarning, di tamana mangmangasa?”

E Iesu i atumarang a tarai ana toltol anuna tena asaerla tagun a warkurai

(Matiu 23:1-36; Mak 12:38-40; Luk 11:37-54)

⁴⁵ Ning a taraila rop la longor e Iesu, i atongi tan anuna kakak a asaerla mang,

⁴⁶ “Mulor tumarang mulo kusun a tena asaerla tagun a warkurai. La mang sur lar taltal ana wakak a kaenla, pa la mang sur a tarai lar saran a tnan hanrawai tetek la ting na puknala na tinan taum. Pa la mang sur a keskes salanigo na rumai lotula, pa keskes a leklek salanigo na ngasala.

⁴⁷ La sira arop a gongon ana laola, pa la sira kep la ana tol barah a niaringla. Ir itna kol a warkurai a arkeles ane God tetek la.”

21

A artabar ana lao

(Mak 12:41-44)

¹ Ning e Iesu i kes ting na rumai artabar, i tai tostos, pa i oroi a leklekla la migen tar anunla a artabar ting na pukna na suah mani.

† **20:42; 20:42** “ A Leklek” i warwara oe God, pa “anuk a Leklek” i warwara ona Karisito.

² Pa i oroi pas otleng ning a kapan a lao i migen tar ka naur a toia.

³ Pa e Iesu i atongi mang, “A atong momoli tamulo, a kapan a lao ne ka saran tar a tnan mani tanla rop ne.

⁴ La saran tar ka a tuk miting na tnan manila anunla, pa lao ne, i kapan, ika, ka saran arop sen asaning ir to pas anuna keskes.”

*A akinalangla ana ararop a pukakiarla
(Matiu 24:1-14; Mak 13:1-13)*

⁵ Dingla na kakak asaer la warwara ona rumai artabar mang di ka mermer tari ana wakak a hatatla pa artabarla ning di saran tari tetek e God. Ika e Iesu i atongi mang,

⁶ “A pukakiar ir hanot lamur ning a ututnala ne ning mulo oroi la, bel ta hat ir borbor saot on ta hat, dir regen arop sen la.”

⁷ La deken e Iesu mang, “Tena Asaer, nangse a ututnala ne ir hanot? Pa esi na akinalang ning ir asangani mang ka milau sur lar hanot?”

⁸ I keles la mang, “Mulor tai alar mulo, sakana dir asongo pas mulo. Anasa a galis lar hanot ana risak, lar atongi mang, ‘Iau a Karisito,’ o, ‘A pukakiar ka milau.’ Gong mulo mur la.

⁹ Ning mulor longor a harumla pa tatatnan mamahatla, gong mulo matmataut, anasa a ututnala ne lar hanot nigo, ika belot a ararop ana rakrakan hanua.”

¹⁰ Lamur e Iesu i atongi tanla mang, “Ning a mangis a tarai ir tur na harum tetek ning a

mangis a tarai, pa ning a matanitu ir tur na harum tetek ning a matanitu.

¹¹ A tatatnan mamaisla, munurak, a urmatana rakrakai a tinsaman ting na hananuala, pa urmatana ututnala misaot na bakut, ning ir amatmataut a tarai, pa tatatnan akinalangla misaot na bakut, lar hanot.

¹² “Lanigo ning a ututnala ne belot la hanot, dir dat pas mulo, dir akadik mulo, pa dir dat mulo uting na rumai lotula sur dir warkurai mulo, pa dir akas mulo uting na karabusla. Pa mulor tur ana warkurai lanigo tana kingla, pa tatatnan ningnigola, anasa mulo anuki.

¹³ A ututnala ne ir sapang a ngas sur mulor warwara talapor hok tetek la.

¹⁴ Ika lanigo tana, gong mulo nuknuk nigo sur asaning mulor warwara alar mulo onoi.

¹⁵ Anasa iau ot, ar anuknuk tar a warwara pa tastamai otleng ting na nuknukimulo, pa anumulo a hiruala rop bel lar keles sot pasi, pa bel lar puain seni.

¹⁶ A tamtamumulola pa kaba tnamulola, a tastumulola, a maimulola, pa halalumulola, lar saran sen mulo sur dir umkol al tarai omulo.

¹⁷ A taraila rop lar nget mulo anasa mulo anuki.

¹⁸ Ika e God ir tai alar mulo.

¹⁹ Ning mulor tur rakrakai mulor kibas a lalaun.

*E Iesu i atongi mang dir kamar sen e Jerusalem
(Matiu 24:15-21; Mak 13:14-19)*

20 “Ning mulor oroi a kunum a tarai a harum lar tur talilis pas e Jerusalem, mulor tasmani mang ka milau sur dir kamar seni.

21 La ning la kes ting na papar Judia, lar liu kumna usaot na mangirla, pa la ning la kes saot e Jerusalem lar purum, pa la ning la kes sa na bual gong ulak ma la kas.

22 Anasa a pukakiarla ning, a pukakiarla na arkeles sur e God ir tolsot pas a ututnala rop ning di ka tumus tari ting na Buk Tabu.

23 Ana pukakiarla ning, ir laulau kol tetek a tiananla, pa la otleng ning la aresus. A tnan kankan ir hanot ana hanua Israel, pa balakut ane God ir han tar ana tarai ne.

24 Al tarai dir umkol la ana liwan a harum, pa al tarai dir ben pas la sur lar karabus ting na hananuala rop. Pa la ning bel a tarai Juda lar pas ahat e Jerusalem tuk ana pukakiar ning e God ka asilang tari sur anunla keskes a ningnigo ir rop ono.

*A Nat a Barsan ir hanot
(Matiu 24:29-31; Mak 13:24-27)*

25 “A akinalangla saot na kamis, pa kalang, pa nangnangla ir hanot. Pa te lapiu a tarai miting na matanitula lar laulau ana matmataut pa nuknukinla ir talar ana top ning ir harum pa tinangisna otleng.

26 A tarai lar mat palpal ana matmataut ana ututnala ning ir um a rakrakan hanua, anasa a ututnala saot na bakut lar maler.

21:22: 21:22 Jeremaia 5:29; 46:10; Hosea 9:7 **21:24:** 21:24 Buk Song 79:1; Tatatai 11:2 **21:25:** 21:25 Aisaia 13:10; Esekiel 32:7; Joel 2:31; Tatatai 6:12-13

²⁷ Ana pukakiar ning, lar oroi a Nat a Barsan ir hanot ana diah bakut, ana rakrakai pa tnan matatar.

²⁸ Ning a ututnala ne ir turpasi sur ir hanot, mulor tur, pa mulor tadai, anasa a pukakiar ning e God ir alaun pas mulo ono ka milau.”

*A warwara larlar ana rakai a fig
(Matiu 24:32-35; Mak 13:28-31)*

²⁹ E Iesu i atong a warwara larlar ne tanla mang, “Mulo tasman ot a rakai a fig pa rakaila rop.

³⁰ Ning mulo oroi a pakpakanla ir sibul ot ulak, mulo ka tasmani mang a kalangla na laplapang ka milau.

³¹ Larotleng ning, ning mulor oroi a ututnala ning ia ka warwara tar ono ir hanot, mulor tasmani mang a matanitu ane God ka milau.

³² A atong momoli tamulo, a tarai tagun onone belot lar mat pa ututnala rop ne ir hanot.

³³ A langit pa rakrakan hanua diar rop, ika anak a warwarala bel ir rarop.

Mulor tai alar mulo

³⁴ “Mulor tai alar mulo, sakana mulor molot ana tol ngasa pa sipak, pa nuknuk kol ana ututnala ana lalaun te lapiu, pa pukakiar ning ir hanot tetek mulo arlar ana kun ning ir akulkulan mulo.

³⁵ Anasa ir hanot tetek a taraila rop te na rakrakan hanua.

³⁶ Mulor tai alar mulo ana pukakiarla rop, mulor araring sur mulor rakrakai sur mulor

alah kusun a ututnala ne, ning milau lar hanot, pa mulor araring otleng sur mulor tolsot pasi sur mulor tur ana matana Nat a Barsan.”

³⁷ Pa e Iesu i sira asaer a tarai ting na rumai artabar ana pukakiarla rop, pa ana pukakiarla ana morom i sira purum, pa i kes ting na mangir, a risana Oliw.

³⁸ Pa ana pukakiarla ana kobot ning ot, a taraila rop la sira han teteki ting na rumai artabar sur lar longori.

22

*E Judas i malmaling sur ir saran tar e Iesu uting na kunla
(Matiu 26:1-5, 14-16; Mak 14:1-2, 10-11; Jon 11:45-53)*

¹ Ka milau a lotu na bret ning bel al is ono, di atongi ana lotu na Han Lakai.

² Pa lekkek a tena artabarla tetek e God, pa tena asaerla tagun a warkurai, la nuknuk sur ta ngas sur lar um kumnan e Iesu ono, anasa la matatan a tarai.

³ Pa e Satan i kas tar oe Judas, ning a risana otleng e Iskariot, i ning a halin ning a bonot pa pisir naur a kakak a asaer.

⁴ I han tetek a lekkek a tena artabarla tetek e God, pa ningnigola ana tena tai alarla ting na rumai artabar, pa la warwara taum onoi sur ir asobor mangmangasa tar e Iesu tetek la.

⁵ La gas, pa la atongi mang lar lowi.

⁶ E Judas i malmaling, pa i nuknuk sur ta wakak a pukakiar ning bel al galis a tarai, sur ir saran tar e Iesu uting na kunla.

Naur a kaklik a asaer dia sang a utnala sur a lotu na Han Lakai

(Matiu 26:17-25; Mak 14:12-21; Jon 13:21-30)

⁷ A pukakiar a lotu na bret ning bel al is ono i hanot, ning di sira umkol a barman a sipsip sur a lotu na Han Lakai.

⁸ Pa e Iesu i sune sen e Pita pa e Jon pa i atongi tandiau mang, “Mur han pa mur sang andala utna na hangan sur a lotu na Han Lakai.”

⁹ Pa dia dekeni mang, “U mang sur miar sangi taha?”

¹⁰ I keles diau mang, “Ning mur hanot saot e Jerusalem, ning a barsan i los a tnan koto na malum ir pastetek mu, pa mur muri uting na rumai ning ir kas tingia.

¹¹ Pa mur atongi tetek a taman a rumai mang, ‘A Tena Asaer i atongi mang: Kanaha a tuk a rumai ning mila taum ana nuk a kakak a asaerla, milar ien a utna na Han Lakai tingia?’

¹² Pa ir asangan tar mu ana tnan tuk a rumai saot, ning di ka sang tari, pa mur sang a ututnala tingia.”

¹³ Dia han, pa dia pastek rop ot a ututnala ning e Iesu ka atong tari tandiau. Pa dia sang a ututnala na Han Lakai.

A ararop a utna na hangan ana Leklek

(Matiu 26:26-30; Mak 14:22-26; 1 Korin 11:23-25)

14 Ning a pukakiar ka sot, e Iesu pa aposella la kes ana utna na hangan.

15 Pa e Iesu i atongi tanla mang, “A mang kol sur ar ien a utna na Han Lakai taum omulo ning belot a kilang a kankan,

16 anasa a atongi tamulo mang, bel ar ien ulak ta utna na Han Lakai tuk ana pukakiar ning dir tolsot pasi ana matanitu ane God*.”

17 E Iesu i los pas a kap pa i atong wakak pas ono, pa i atongi tanla, “Mulor los pas a kap ne, pa mulor gang sauran pasi.

18 Anasa a atongi tamulo mang, bel ar gang ulak al wain, tuk ning a matanitu ane God ir hanot.”

19 Pa i los pas a bret, i atong wakak onoi, i kibiki, pa i tabar la ono. I atongi mang, “Ine a palaok, [a sarani sur mulo. Mulor toli larne, sur mulor sira nuk pas iau.”

20 Lar otleng ning, lamur ning ka rop a utna na hangan, i los pas a kap pa i atongi mang, “A kap ne, a tona kunubus, ana sulukik ning ir tapek omulo.]†

21 Ika a kuna esaning ir asobor tar iau, kane mia lolos taum ana logo na utna na hangan.

22 A Nat a Barsan ir mat arlar larning e God ka warkurai tari, ika ir laulau kol tetek a barsan ning ir saran tari tetek a hiruala.”

* **22:16: 22:16** E Iesu i warwara ona pukakiar ning ir hangan taum onla saot na langit. † **22:20: 22:20** Dingla na tena tastamai ana Buk Tabu la nuki mang e Luk bel i tumus a warwarala ning i kes potor ana naur a akinalang []. La nuki mang tik masuk i tumus tari lamur. **22:21: 22:21** Buk Song 41:9; Jon 13:21-22

23 Pa la deken artalai la mang, “Esi na halindala ir tol a utna ne?”

Esining i lekkek kol

24 La arlak mang esi na halinla dir atongi mang i lekkek kol.

25 Pa e Iesu i atongi tanla mang, “A kingla anun la ning bel a tarai Juda, la warkurai a tarai pa la oroi purpulum la. Pa anunla ningnigola ot ulak la atong la a wakak a tena arnangaila.

26 Ika mulo, gong mulo manglarne. Esining i lekkek tamulo ir arlar ka o esaning i natarna, pa esining i ningnigo ir arlar ka ana tena titol oros.

27 Esining i lekkek ta diau? Esaning i kes ana utna na hangan, o esaning i longor mut? I ot ning i kes ana utna na hangan, gepi? Ika iau, a kes ting na arpotor imulo arlar o esaning i sira longor mut.

28 “Ika mulo, mulo tur taum hok ana mamahatla ning i hanot tetek iau.

29 Pa ar saran tar a keskes a king tamulo, arlar oe Tata i saran tari tak,

30 sur dalar hangan pa dalar gang ana nuk a logo ana nuk a matanitu. Pa mulor kes ana keskesla na king, pa mulor warkurai ning a bonot pa pisir naur a mangis a tarai Israel.”

*E Iesu i warwara nigo ana puai ane Pita
(Matiu 26:31-35; Mak 14:27-31; Jon 13:36-38)*

31 E Iesu i atongi mang, “Saimon, Saimon, oroi i, e Satan ka nunung pas sur ir lar mulo, arlar

22:24: 22:24 Luk 9:46 22:25: 22:25 Matiu 20:25-27; Mak 10:42-45 22:26: 22:26 Matiu 23:11; Mak 9:35 22:27: 22:27 Jon 13:12-15 22:30: 22:30 Matiu 19:28

ana tena omomai ning i tang sauran a wit kusun a palpalna.

³² Ika ia ka araring hom, Saimon, sur gong anum a tortorot i punga kol. Ning u ka lingir ulak a nuknukim, ur arakrakai na tastasimla.”

³³ E Pita i atongi tana mang, “Leklek, bel a matmataut ning ar mur u uting na karabus pa ana minat.”

³⁴ Pa e Iesu i kelesi mange, “Pita, a atongi tam, onone ning a kakaruk belot ir kurkurirakuk ur puai munatol mang bel u tasman iau.”

Lar los a paus a suah mani, a rat pa liwan a harum

³⁵ Lamur e Iesu i deken anuna kakak a asaerla mang, “Ning a sune sen mulo, pa bel anumulo ta paus a suah mani o ta rat o ta su, i mangasa, mulo kapan ot sur ta utna?” Pa la kelesi mang, “Bel.”

³⁶ Pa e Iesu i atongi tanla, “Ika onone, esining anuna ta paus a suah mani, i wakak ning ir losi ot, pa rat otleng. Pa esining bel ta liwan a harum, i wakak ning ir siuran sen anuna ta kaen pa ir lou pas tik.

³⁷ A atongi tamulo, dir tolsot pas a tumtumus ne hok, ‘Di atong taum la ana tena laulaula.’

Aisaia 53:12

Anasa a ututnala ne di ka tumus tari hok, milau dir tolsot pasi.”

³⁸ Pa kakak a asaerla la atongi mang, “Oroi i, Leklek, naur a liwan a harum kanet.” Pa e Iesu i keles la mang, “I sot ka.”

E Iesu i araring
(*Matiu 26:36-46; Mak 14:32-42*)

³⁹ E Iesu i purum kusun a hanua, pa i han usaot na Mangir Oliw, arlar ot larning i sira toli. Pa kakak a asaerla la muri.

⁴⁰ Ning la hanot ting na pukna ning, i atongi tanla mang, “Mulor araring, sur gong mulo punga ana larlarla.”

⁴¹ I han siklik tar kusun la, i tur ana bokona hana, pa i araring mang,

⁴² “Tata, ning u mang, ur kibas sen a kap a mamahat ne kusun iau. Ika gong u mur a nuknukik, ur mur ot a nuknukim.”

⁴³ Ning a angelo misaot na langit i hanot teteki pa i arakrakai i.

⁴⁴ I araring rakrakai kol, anasa i kilang a rakrakai a balmaris kol, pa maragusna i arlar ana tutu na suluk i punga purum ting na piu.‡

⁴⁵ Ning ka araring rop, i kamtur pa i han ulak tetek a kakak a asaerla, pa i oroi la ning la ka borbor duman, anasa a palaonla i ngol ana balmaris.

⁴⁶ Pa i atongi tanla mang, “Sur asaning mulo borbor duman ka? Mulo kamtur, pa mulor araring sur gong mulo punga ana larlarla.”

Di tong akes pas e Iesu
(*Matiu 26:47-56; Mak 14:43-50; Jon 18:3-11*)

⁴⁷ Ning e Iesu kaning ot i warwara, a kunum a tarai la hanot. Pa e Judas, ning a halin ning a

‡ **22:44:** **22:44** Dingla na tena tastamai ana Buk Tabu la nuki mang e Luk bel i tumus naur a ves 43 pa 44. La nuki mang tik masak i tumus tari lamur.

bonot pa pisir naur a kakak a asaer, i nigon pas la. I han tetek e Iesu sur ir goro a ris a pahana.

⁴⁸ Ika e Iesu i dekeni mang, “Judas, i mangasa, u ka asobor tar a Nat a Barsan ana argoro?”

⁴⁹ Ning a tarai ning la han taum oe Iesu la oroi a ututnala ne ir hanot, la dekeni mang, “Leklek, u mang sur milar harum ana liwanla a harum?”

⁵⁰ Pa ning a halinla i umsem a talngana tena titol oros anuna ningnigo na tena artabar tetek e God.

⁵¹ Ika e Iesu i sairasi mang, “Gong!” Pa i tong a talngana a tena titol oros, pa i awakak ulak pasi.

⁵² E Iesu i warwara tetek a leklek a tena artabarla tetek e God, pa ningnigola anuna tena tai alarla miting na rumai artabar, pa ningnigola ana taraila ning la hanot suri. I atongi mange, “I mangasa, ngandek iau a tena harum pa tena kinkinau, sur i ma ine mulo hanot ana liwanla na harum pa puka buturla sur mulor tong akes iau?”

⁵³ Ana pukakiarla rop dala sira kes taum ting na woroh na rumai artabar pa bel mulo tong akes iau. Ika ine anumulo a pukakiar, ning a rakrakai ana mormorom i nigon mulo.”

E Pita i puain sen e Iesu

(Matiu 26:57-58, 69-75; Mak 14:53-54, 66-72; Jon 18:12-18, 25-27)

⁵⁴ La tong akes pas e Iesu, pa la ben maskan seni. La beni uting na rumai anuna ningnigo na tena artabar tetek e God. Pa e Pita i mur amon e Iesu, ika i bakbak ot kusuni.

⁵⁵ Ning la ka atna tar a iah ting na arpotor a pukna tumo lapiu, pa la kes taum, e Pita otleng i kes taum ot onla.

⁵⁶ Ning a basbas, a tena titol oros, i oroi pasi ning i kes tar milau a irnga na iah, pa i ngoson rakrakai i, pa i atongi mang, “A barsan ne dia sira armuri taum otleng oe Iesu.”

⁵⁷ Ika e Pita i puai mang, “Lak, bel a tasman e Iesu.”

⁵⁸ Lamur kale, ning a barsan male i oroi pas e Pita pa i atongi mang, “U otleng mulo.” Ika e Pita i kelesi mang, “Barsan, iau bel.”

⁵⁹ Lamur, ning ulak i warwara rakrakai, i atongi mang, “I momol ot, a barsan ne dia sira armuri taum ot oe Iesu, anasa i a te Galili.”

⁶⁰ E Pita i kelesi mang, “Barsan, bel a tasman asaning u warwara ono.” Ning kaning ot i warwara, a kakaruk i kurkurirakuk.

⁶¹ A Leklek i talingir, i tai tostos tetek e Pita, pa e Pita i nuk pas a warwara anuna Leklek ning ka atong tari tana mang, “Onone, ning a kakaruk belot ir kurkurirakuk ur puai munatol mang bel u tasman iau.”

⁶² Pa i purum kusun a pukna ning, pa i tangis koli.

*Di morot laulau oe Iesu pa di mirasi
(Matiu 26:67-68; Mak 14:65)*

⁶³ La ning la tai alar e Iesu, la morot laulau ono, pa la mirasi.

⁶⁴ La poroi alar tar a matana, pa la atongi tana mang, “U a propet, atai mila. Esi i dapis u?”

⁶⁵ Pa la atong saksakani ana galis a warwara otleng.

*E Iesu i tur na matana tarai a kiwung
(Matiu 26:59-66; Mak 14:55-64; Jon 18:19-24)*

⁶⁶ Ana kabakiar kobot, a ningnigola anuna tarai, a leklek a tena artabarla tetek e God pa tena asaerla tagun a warkurai la han taum. Pa la ben pas e Iesu tetek a tarai a kiwung ning,

⁶⁷ pa la atongi tana mang, “Ning u a Karisito, ur atai mila.” Pa e Iesu i keles la mang, “Ning ar atai mulo, bel mulor tortorot ana nuk a warwara.

⁶⁸ Pa ning ar deken mulo ana ta deke, bel mulor kelesi.

⁶⁹ Ika, turpasi onone, a Nat a Barsan ir kes ting na ris a sot a kuna e God, esaning i rakrakai kol.”

⁷⁰ Pa la rop la deken e Iesu mang, “U a Nat e God gepi?” Pa i keles la mang, “Mulo ka atong sot pasi, iau ot ne.”

⁷¹ Lamur la atongi mang, “Sur asaning dalar mang ulak sur al warwara na artitiu? Anasa dala ka longor tar anuna warwarala ne, ning dalar tiwi ono.”

23

*E Iesu i tur ana warkurai salanigo ta e Pailat
(Matiu 27:1-2, 11-14; Mak 15:1-5; Jon 18:28-38)*

¹ Lamur a tarai a kiwung rop la tur, pa la ben pas e Iesu tetek e Pailat.

² Pa la turpasi sur lar tiwi mang, “Mila oroi a barsan ne i ben rongon anumila na tarai, i sairas mila sur gong mila saran a totokomla tetek a

Sisar, pa i atongi otleng mang ai a Karisito, a king.”

³ E Pailat i dekeni mang, “U a King anuna tarai Juda?” Pa e Iesu i kelesi mang, “I ot ning u atongi.”

⁴ E Pailat i atongi tana leklek a tena artabarla tetek e God pa kunum a tarai mang, “Bel a deke tetek ta toltol ning a barsan ne i rongo ono.”

⁵ Ika la ngongos ka mang, “I akamtur a balan a tarai sur lar kutus a warkurai anuna matanitu, ana nuna asaer ting na papar Judia rop. I turpasi saot e Galili pa i tuk te.”

E Iesu i tur ana warkurai salanigo ta e Herot

⁶ Ning e Pailat i longori, i deken la oe Iesu mang, “Ai a te Galili?”

⁷ Ning ka tasmani mang e Iesu mitisa na papar Galili ning e Herot i ningnigo tingia, i sune seni teteki. Ana pukakiar ning e Herot otleng i kes tisaot e Jerusalem.

⁸ Ning e Herot i oroi pas e Iesu, i gas kol, anasa tagun lanigo ot i mang sur ir oroi i, anasa ka longor tar a warwara ono, pa i mang sur ir oroi ta utna na kulkulan ning ir toli.

⁹ E Herot i deken e Iesu ana galis a kabah, ika e Iesu bel i kelesi.

¹⁰ A leklek a tena artabarla tetek e God pa tena asaerla tagun a warkurai kaning la tur tingia, la tiu rakrakai e Iesu.

¹¹ E Herot pa anuna tarai a harum la morot laulau ono, pa la malani, la mer tari ana wakak a kaen kol, pa la sune sen ulaki tetek e Pailat.

¹² Lanigo e Herot pa e Pailat bel dia armoro taum, ika ana pukakiar ning dia bot armoro.

*E Pailat i warkurai e Iesu sur ir mat
(Matiu 27:15-26; Mak 15:6-15; Jon 18:39–19:16)*

¹³ E Pailat i kabah taum pas a leklek a tena artabarla tetek e God, pa ningnigola, pa tarai,

¹⁴ pa i atongi tanla mang, “Mulo ka ben tar a barsan ne tetek iau, arlar o esaning i ben rongon a taraila. Pa ia ka deken tari na matamulo, pa bel a deke tetek pas ta toltol ning a barsan ne i rongo ono.

¹⁵ E Herot otleng bel i pastek pas ta toltol ono, pa i sune sen ulaki ka tetek dala. Oro i, bel i tol tar ta utna ning ir hirua ono.

¹⁶⁻¹⁷ Ar dapis tari ka, pa ar pak seni.”*

¹⁸ Pa taraila rop la kukuk ana tnan elngenla mang, “A barsan ne ir hirua, pa ur pak sen tar e Barabas tetek mila.”

¹⁹ E Barabas i ning a barsan ning di akas tari uting na karabus anasa i harum ana matanitu saot na hanua Jerusalem, pa i sira umkol a taraila otleng.

²⁰ E Pailat i deken ulak la, anasa i mang sur ir pak sen e Iesu.

²¹ Ika la kukuk rakrakai ka mang, “Sai ahati saot na rakai kutus! Sai ahati saot na rakai kutus!”

²² Pa i munatol na deken la mang, “Sur asa? Esi na rongo ning ka tol tari? Bel a deke tetek

* **23:16-17:** **23:16-17** Dingla na tena tastasmai ana Buk Tabu la nuki mang dingla na warwara otleng i kes te na ves ne. I manglarne: *Ana taktakai lotu na Han Lakai, e Pailat i sira pak sen takai a karabus tetek a tarai.*

pas ta toltol laulau ning ir hirua ono. Ar dapis tari ka, pa ar pak seni.”

²³ Ika la kukuk ngongos ana tnan elngenla sur dir sai ahati saot na rakai kutus. Pa la tolsot pasi ot.

²⁴ Pa e Pailat i malmaling kama sur dir mur a nuknukinla.

²⁵ Lamur i pak sen e Barabas ning i kes ting na karabus anasa i tur na harum tetek a matanitu pa i umkol a taraila, esaning la nunung suri. I saran tar e Iesu tetek a tena harumla arlar ana nuknuk a taraila.

*Di sai ahat e Iesu saot na rakai kutus
(Matiu 27:32-44; Mak 15:21-32; Jon 19:17-27)*

²⁶ Ning la ben pas e Iesu sur lar sai ahati saot na rakai kutus, la dat pas ning a te Sairini, a risana e Saimon, ning i han miting na ning a hanua sur ir han usaot e Jerusalem. Pa la los tar a rakai kutus usaot na palaina, sur ir los murmur e Iesu ono.

²⁷ A tnan kunum a taraila la mur e Iesu. Arpotor inla, a gurarala otleng, ning la balmaris pa la tangsani.

²⁸ E Iesu i talingir pa i atongi tanla mang, “A gurara Jerusalem, gong mulo tangsan iau, mulor tangsan mulo ot taum ana natnatumulola.

²⁹ Anasa a pukakiarla ana kankan ir hanot tetek mulo pa mulor atongi mang, ‘A pombo na gurarala, ning bel la agon pa bel la asus al kakakla, la angis.’

³⁰ Lamur

‘lar atongi tetek a mangirla, “Mulor punga tar omila!”
pa tetek na puka lekkek, “Mulor pol alar mila!†” ’

Hosea 10:8

³¹ Ning lar tol a ututnala ne, ning a rakai kaning ot i laun, asa lar toli ning a rakai ka marang?”

³² Pa naur otleng, naur a laulau a barsan, di ben taum diau oe Iesu sur ditol ir hirua taum.

³³ Ning la hanot ting na pukna di atongi “A Lasa na Pukulundi,” la sai ahat e Iesu saot na rakai kutus tingia, pa naur a laulau a barsan otleng, ning a halindiau ting na sot, pa takai ting na kair.

³⁴ E Iesu i atongi mang, “Tata, ur kepsen anunla na toltol laulau, anasa bel la tasman asaning la toli.” Pa la pilai laki sur lar asalar anuna kaenla tetek la taktakai.

³⁵ A taraila la tur pa la oroi i, pa ningnigola la morot laulau oe Iesu, la atongi mang, “I alaun pas a tarai masik. Ning ai a Karisito ane God, ning e God ka aslang tari, i wakak ning ir alaun pasi ot.”

³⁶ Pa tena harumla otleng la morot laulau onoi. La han teteki, la saran tar a wain ning i mititir tana,

³⁷ pa la atongi, “Ning u a king anuna tarai Juda, onone ur alaun pas u ot.”

³⁸ Di tumus tar otleng a tumtumus saot na palai a rakai kutus mang,

“INE A KING ANUN A TARAI JUDA.”

† **23:30: 23:30** La mang sur a mangirla lar punga saot onla anasa la mang sur lar alah kusun a kankan. **23:34: 23:34** Aisaia 53:12; Buk Song 22:18 **23:35: 23:35** Buk Song 22:7-8 **23:36: 23:36** Buk Song 69:21

³⁹ Ning tagun naur a barsan laulau ning di akulam taum tar ditol, i morot oe Iesu mang, “Ning u a Karisito, ur alaun pas u pa miau!”

⁴⁰ Pa ning a halindiau i balakut teteki pa i atongi mang, “I mangasa, u bel u matmataut sur e God? Anasa u otleng datol rop datol kilang ning a ngas a kankan ka.

⁴¹ I tostos ot ondau, anasa di keles anundau a toltol laulau. Ika a barsan ne bel i tol ta toltol laulau.”

⁴² Lamur i atongi ta e Iesu, “Iesu, nuk pas iau, ning ur king ana num a matanitu.”

⁴³ Pa i kelesi mang, “A atong momoli tam, ono otne ur kes taum hok saot na Paradais.”

E Iesu i mat

(Matiu 27:45-56; Mak 15:33-41; Jon 19:28-30)

⁴⁴ Ning ka matana kamis tostos, a hananua rop i mormorom tuk ana 3 kilok ana rah,

⁴⁵ anasa a kamis bel i sasai. Pa kaen a alalar kutus tingui na rumai artabar i taksilir potor sur naur a dihna.

⁴⁶ E Iesu i kukuk rakrakai mang, “Tata a saran tar a inguk uting na naur a kum.” Ning ka atong tari larning, i suah sen a malwasna.

⁴⁷ Ning a ningnigo anuna tena harumla i oroi asaning i hanot, i rakan aleklek pas e God mang, “I momol ot, a barsan ne a tena tostos.”

⁴⁸ A kunum a taraila ning kaning la tur taum sur lar oroi a utna ne, ning la oroi i, la dapdapis a malwasinla ana balmaris pa la han.

⁴⁹ Ika na halalna e Iesu, pa gurarala ning la muri mitumo e Galili, la tur bakbak tar ot, pa la oroi a ututnala ne.

Di aborbor a minat e Iesu ting na kulam a minat (Matiu 27:57-61; Mak 15:42-47; Jon 19:38-42)

⁵⁰⁻⁵¹ Ning a barsan, a risana e Josep, mitumo e Arimatia, ting na papar Judia. I ning a wakak a barsan, pa tena tostos, ning i harnanai sur a matanitu ane God. I ning a halin a tarai a kiwung, ika bel i malmaling taum onla ana nunla a warkurai pa utna ning la toli.

⁵² I han tetek e Pailat pa i nunung sur a minat e Iesu.

⁵³ I los purum pasi, i irisi ana wakak a kaen, pa i aborbor tari ting na kulam a minat ning di ka kot tari ting na ris a hat, ning belot di aborbor tar ta minat tingia.

⁵⁴ A pukakiar ning, a pukakiar a sang, pa milau a Pukakiar Sabat ir turpasi.

⁵⁵ Pa gurarala ning la han taum oe Iesu mitumo e Galili, la mur e Josep, pa la oroi tar a kulam a minat pa ngas a aborbor ning di toli ana minat e Iesu.

⁵⁶ Ning la ulak, la sang pas a ututnala ning i tomtoboh wakak pa wel ning i tomtoboh otleng. Pa ana Pukakiar Sabat, la manah arlar ot ana warkurai.

24

E Iesu i kamtur ulak kusun a minat (Matiu 28:1-10; Mak 16:1-8; Jon 20:1-10)

¹ Ana kobot ning ot, ana ningnigo na pukakiar ana wik, a gurarala la han uting na kulam a minat, pa la los a ututnala ning i tomtoboh ning la ka sang tari.

² Pa la oroi i ning di ka lakir sen tar a hat kusun a taman a kulam a minat.

³ La kas, ika bel ma la oroi a minat a Leklek e Iesu.

⁴ Ning a nuknukinla i loklokron onoi, naur a barsan, anundiau naur a kaen i pil kol, dia hanot kulkulan tetek la.

⁵ La matmataut pa la kes tudu, la suah purum a patarinla ting na piu. Dia atongi tanla, “Sur asaning mulo tai sur a lalauna te napir a minatla?”

⁶ Bel i ma te, ka kamtur ulak. Mulor nuk pas a warwara ning ka atong tari tamulo, ning i kes ot tumo e Galili.

⁷ I atong tari mang, ‘Dir saran tar a Nat a Barsan ting na kuna laulau a tarai, pa dir sai ahati saot na rakai kutus, pa ana natol a pukakiar lamur ir kamtur ulak.’ ”

⁸ Pa la nuk pas a warwara ane Iesu.

⁹ Ning la ulak kusun a kulam a minat, la atatai ana ututnala rop ne tetek ning a bonot pa pisir takai a kakak a asaerla pa tetek la rop otleng ning la sira mur e Iesu.

¹⁰ A gurarala ning la atai a aposella ana ututnala ne, la ne: E Maria Makdalen, e Joana, pa e Maria e tana e Jems, pa dingla na gurara otleng ning la han taum onditol.

¹¹ Ika a aposella la longor a warwara ana

gurarala arlar ana warwara oros ka, pa bel la tortorot onla.

¹² Ika e Pita i tur, i dun sur a kulam a minat. I roh purum, pa i sidok pa i oroi a kaenla kama, la borbor masik tar. Pa i ulak, pa i nuknuk kol ana utna ne i hanot.

E Iesu i hanot tetek naur a barsan ana tinan usa e Imaus
(Mak 16:12-13)

¹³ Ana pukakiar ot ning, naur onla ning la sira mur e Iesu, dia han uting na hanua a risana e Imaus. A barah ana ngas ning i arlar ana ning a bonot pa pisir takai a kilomita misaot e Jerusalem.

¹⁴ Ning dia han amon dia warwara ana ututnala rop ne ka hanot.

¹⁵ Ning dia warwara, pa dia deken artalai diau, e Iesu ot i hanot tetek diau, pa ditol han taum.

¹⁶ Ika ning a utna i poroi alar pas a matandiau pa bel dia oroi lalan pasi.

¹⁷ E Iesu i deken diau mang, “Asaning mu warwara amon ono ting na numu a tinan?” Dia tur tar ka pa dia tatatai na balmaris.

¹⁸ Pa ning a halindiau a risana e Kliopas, i dekeni mang, “Ngandek u ka ning a wasira saot e Jerusalem, ning bel u tasman a ututnala ning i hanot saot ana pukakiarla ne?”

¹⁹ Pa i deken diau, “A ututnala na sa?” Pa dia kelesi mang, “A ututnala oe Iesu a te Nasaret, a propet, ning i asangani mang i rakrakai ana nuna titolla pa anuna warwarala otleng, ana matana e God pa taraila rop.

²⁰ A leklek a tena artabarla tetek e God pa anundala ningnigola la saran tari ana warkurai sur ir mat, pa di sai ahati saot na rakai kutus.

²¹ Mila tortorot ono mang i ning ir alangolango a tarai Israel. Pa onone otleng, ka natol a pukakiar alar a ututnala ning la toli.

²² Ine otleng, dingla na gurara omila, la akulkulan mila. Ning la han kobot uting na kulam a minat,

²³ la tatatai panai tar sur a minatna. Ning la ulak la atongi mang la oroi tar naur a angelo ana tatatai, pa dia atai la mang ka laun ulak.

²⁴ Lamur dingla na tarai otleng omila, la han pas uting na kulam a minat, pa la oroi tari mang ot larning a gurarala la ka atatai ono, ika bel la oroi e Iesu.”

²⁵ Pa e Iesu i atongi tandiau, “Mu longlong ka, bel mu tortorot kapit ana warwarala rop ning a propetla ka atong tari.

²⁶ La atongi mang a Karisito ir kilang a kankanla ne, pa lamur ir kas ana nuna matatar.”

²⁷ Turpasi ana bukla ane Moses pa propetla, e Iesu i papak tetek diau ana ututnala rop di ka tumus tari onoi ot ting na Buk Tabu.

²⁸ Ning ditol ka han milau a hanua ning dia han sur uting ia, e Iesu i tohoi sur ir han bolos ka.

²⁹ Pa dia sairasi, dia atongi mang, “Ur kes taum omiau, anasa ka rah, a Kamis ka mang ir sup ne.” I kas pa i kes taum ondiau.

³⁰ Ning ditol kes sur ditol ar hangan, e Iesu i los pas a bret, i atong wakak pas ono, i kibik pasi, pa i tabar diau ono.

³¹ Lamur, a matandiau i tapalas, pa dia bot oroi lalan pasi, pa i rorom pas kusun diau.

³² Pa dia warwara artalai tetek diau mang, “I momol ot, a balandau i pirok ana gasgas ning i warwara tetek dau ning datol han ting na ngas, pa i pak tar a warwara na Buk Tabu tetek dau.”

³³ Ana pukakiar ot ning, dia kamtur pa dia ulak usaot e Jerusalem, pa dia han tetek ning a bonot pa pisir takai a kakak a asaerla pa dingla na tarai otleng ning la kes taum.

³⁴ La atongi mang, “I momol ot! A Leklek ka kamtur ulak, pa ka hanot pas tetek e Saimon.”

³⁵ Lamur dia atatai ana saning i hanot tetek diau ting na ngas, pa ana nundiau a ororoi lalan ono ning i kibik a bret.

*E Iesu i hanot tetek anuna kakak a asaerla
(Matiu 28:16-20; Mak 16:14-18; Jon 20:19-23;
Aposel 1:6-8)*

³⁶ Ning kaning ot dia warwara ana ututnala ne, e Iesu ot i turot na arpotor inla, pa i atongi mang, “A balmolmol tetek mulo!”

³⁷ La matmataut kol pa palaonla i suren ono, la nuki mang a inguna ka ning la oroi i.

³⁸ Pa i atongi tanla mang, “Sur asa mulo matmataut pa mulo urmatana nuknuk?”

³⁹ Mulo oroi naur a kuk pa naur a hak. Iau momol ot ne. Mulor tuk iau, pa mulor oroi iau.

A ingun bel al palpalna, pa bel al sursurna otleng. Ika mulo oroi i mang iau a palaok ot pa sursurik otleng.”

⁴⁰ Ning ka atong tari lerne, i asangan tar naur a kuna pa naur a hana tanla.

⁴¹ La gas pa la kulkulan, ika belot la tortorot. Pa i deken la mang, “Bel ta utna kane sur ar ieni?”

⁴² Pa la tabari ana diah sis ning di ka tun tari.

⁴³ Pa i los pasi, pa i ieni na matanla.

⁴⁴ Pa i atongi tanla, “Nating ning a kes taum omulo, ia ka atong tar a warwara ne tetek mulo mang: A ututnala rop ning di ka tumus tari hok, ana warkuraila ane Moses, ana warwara anuna propetla pa ana Saksakla dir tolsot pasi.”

⁴⁵ Pa e Iesu i atalapor a nuknukinla sur lar tastasmai ana Buk Tabu.

⁴⁶ I atongi tanla mang, “Di ka tumus tari mang, a Karisito ir hirua, pa ana natol a pukakiar lamur ir kamtur ulak kusun a minat,

⁴⁷ pa dir warawai ana risana tetek a taraila miting na matanitu rop, turpasi saot e Jerusalem. Dir warawai tetek la mang lar lingir a nuknukinla pa e God ir kepsen anunla na toltol laulau.

⁴⁸ Mulo a tena warwarala ana ututnala ne mulo ka oroi tari.

⁴⁹ Oroi i, ar sune sen esaning e Tata ka lele tar onoi. Mulor kes ot te na hanua ne, tuk ning dir mermer tar mulo ana rakrakai misaot.”

*E Iesu i han kas usaot na langit
(Mak 16:19-20; Aposel 1:9-11)*

⁵⁰ Lamur i ben purum pas la misaot e Jerusalem, pa la hanot ting na ning a pukna milau e Betani, pa i tuslan tostos naur a kuna, pa i atong angis la.

⁵¹ Ning kaning ot i atong angis la, i han kusun la, pa e God i los kas pasi usaot na langit.

⁵² La lotu teteki, pa la ulak usaot e Jerusalem ana tnan gasgas.

⁵³ Pa la keskes ting na rumai artabar, la atong aleklek pas e God.

A Wakak a Warwara ane God
The New Testament in the Label language of Papua
New Guinea
Nupela Testamen long tokples Label long Niugini

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94